

# Yesu Ewi Dongua Finga Yokamai Kokonan Beinga Kam

Ena Luka yaromi ari Yesu ewi dongua finga yokamai kokonan beinga kam i boime. Koma yaromi bei moiro pepa ta i kam Luka kam boingua i boime. Ena okome yaromi bei moiro ari Yesu awi dongua finga yokamai kokonan beinga kam i boime. Ena no ka gurom towane kapuka ka borapunga mere i “Aposel” boipune.

Ena Luka bei moiro Yesu mora goingua kakom tei gama yokamai kokonan beinga kam i boime. Luka ka boingua i epe: Murom Sumuna uro Yesu gama yokamai minomdi ikai koi fungua kam epe boime. Te yaromi ama bei moiro Yesu gama yokamai koro koro furo gunom kam di mari deinga kam epe boime. Te Yura ari koma fi ki si teinga ena okome ari Yura ari moikeinga yokamai ama fi ki si teinga kam i ama boime.

---

Yesu yaromi “Murom awi dowaiye,” diro ka di guwo di eme

**1** <sup>1-2</sup> Tiofirasi yo, koma munom boi ereika Yesu tai bengua muruwo te ka mapunom ari nuwi si erongua muruwo boi ereiye. Te na koma pepa i boi ereikairai Yai Gumam Yesu akire di tongoro kamundi fungua ka i ama mora boi ereiye. Ena koma Yesu kamundi naro bengua Yai Gumam Murom Sumuna yoporam boi tongoro Yesu ewi dongua finga ari yokama ka yoporam boiro di eromie. Te Yesu ewi dongua finga ari komari mora gunom boi erome.<sup>a b</sup> <sup>3</sup> Yesu gam kipi kaingoro mora goingua tokoi ariro fu ewi dongua finga yokamai moingi tei fure yokamai “ ‘Na yokori moimie,’ duwaime,” diro tai ta ta yoporam boime. Ena iran aro kakom 40 moingoro yokamai kanime. Kaningoro yaromi Yai Gumam ari kiapanom bengua ka mapunom di erome.<sup>c</sup> <sup>4</sup> Te Yesu yokamai ama moinga ena Yesu “Ne yokamai Yerusarem tei ma dekeiyo! Ne tei moire na aunam ka koma di koi eiro ‘Na Murenam Sumuna erowaye,’ dunguai mukom

---

<sup>a</sup> 1:1 Lk 1:3   <sup>b</sup> 1:2 Mk 16:19; Lk 24:49-51   <sup>c</sup> 1:3 Lk 24:36-45; Ap 10:41

unangua kiapam moiyo! Na aunam kam i koma di ereye.<sup>d</sup> <sup>5</sup>Yoane ari yai opai nuwi wom sumuna bui eromba aro kakom suwo mora gounangua na aunam Murom Sumuna awi de erowangoro inaimie,” diro ka yoporam boire di eromie.<sup>e</sup>

**Yesu inako dero kamundi fume**

*Mk 16:19-20; Lk 24:50-53*

<sup>6</sup>Ena Yesu dourom boinga yokamai kuku boire “Ari Wanapao, ne epena kakomdi no Isirae man ikinom akainom tokoi kiapanom benapunga kokonan koro mapunom boire akire di norowano?” diro mina wako teingoro <sup>7</sup>“Taikan muruwo i fuka duwangua ne yokamai fikeimie. Tarom i na aunam yoporamdi dungoro ena ne yokamai kakom kapo kapo tai fuka duwangua fikeimba<sup>f</sup> <sup>8</sup>tarom i epe fiyo! Okome Yai Gumam Murom Sumuna awi dowangua ako mangi unangua denom minom ikai koi fure yoporam boi erowamie. Boi erowangoro ena ne yokamai na gunam kanam Yerusarem di erere te Yuria akai iki iki muruwo di erero te Samaria akai di erero te fure man man muruwo ka di mari dowainga konom benaime,” di erome.<sup>g</sup> <sup>9</sup>Ka i di gouru yokamai toren kan moingi Yesu u teme fure kamun kuwokauwari fungoro mora kankeimie.<sup>h</sup> <sup>10</sup>Ena Yesu fu teme fungua yokamai kamun toren kan moingoro ena yai surai gai feke fipika ure yokamai moingi tei arere moire<sup>i</sup> <sup>11</sup>“Gariri kapam ari yo, ta bengoro ne yokamai arere moire kamun toren kan moime? Yesu yaromi ne moingi tei ma dongoro Yai Gumam akiro kamundi fumie. Ena Yesu nenen kamundi funguamare epe tokoi dere ako mangi unamie,” epe dipire.<sup>j</sup>

**Yesu mouwomdi finga ari bei moiro yai Mataiasi gunom  
boi teingoro Yurasi kokonanom bengua akaiyom imie**

<sup>12</sup>Ena iran Yesu gama yokamai kopu i kam Oriwa ma dere fu tokoi Yerusarem fimie. Te kopu Oriwa i Yerusarem teina dunguarai epemere kon gurom towane wom dume.<sup>k</sup> <sup>13</sup>Ena yokamai wanere Yerusarem fure iki ta ikai fure fu iki munomdi keingi teme iwa fuka dire fimie. Yokamai moinga kanom i epe: Pita te Yoane te Yemesi te Enduru te Firipi te Tomasi te Bataromu te Matiyu te Afia wam Yemesi dom te Saimon yaromi nomane yoporam boingua yai moingua te Yemesi dom wam Yurasi.<sup>l</sup> <sup>14</sup>Yai gan yokamai kanom mora boika te opai suwo te Yesu mam Maria te Yesu emeroma ama ure kuku boire ka make ei moimie.<sup>m</sup>

<sup>15</sup>Kakom boromdi tei Yesu gama 120 kuku boingoro ena Pita yaromi suna arere <sup>16</sup>“Arinamao, koma ka mapunom boingi Yai Gumam Murom

<sup>d</sup> 1:4 Lk 24:49; Yo 14:16-17; Ap 2:33    <sup>e</sup> 1:5 Mt 3:11    <sup>f</sup> 1:7 Mk 13:32    <sup>g</sup> 1:8 Mt 28:19; Lk 24:48; Ap 2:32; 3:15; 5:32    <sup>h</sup> 1:9 Yo 6:62    <sup>i</sup> 1:10 Lk 24:4    <sup>j</sup> 1:11 Lk 21:27; Rew 1:7  
<sup>k</sup> 1:12 Lk 24:50-53    <sup>l</sup> 1:13 Mt 10:2-4; Mk 3:16-19; Lk 6:14-16    <sup>m</sup> 1:14 Yo 7:5

Sumuna bei moire Dawiri giramdi imari dero yaromi Yurasi kam dungoro ka mapunom boime. Ena ka mapunom boinguai mukom faimie. Mukom i epe faimia: Yurasi yaromi ari akire fu Yesu moingi tei fure imari de erongoro Yesu a ki sime.<sup>n</sup> 17A ki simba koma Yesu Yurasi yaromi gunom boingua ena yaromi nonon gere ama wanere Yesu ka mapunom kokonan bepunie,” Pita epe di erome. 18Yaromi tai niki dongua bengua kongom ire fure mansinom meina beme. Mansinom meina bengua tei Yurasi ako sume. Te birom koma ako mangi sungoro te maram sifu diro dem gope di mena ungoro goime.<sup>o</sup> 19Yai opai muruwo Yerusarem kei fainga yokamai ka wayom i firo ena Yurasi manom sinom i kam Akerama daime. Kam Akerama mapunom i aki akaiyom dume. 20ena Pita ka ta dungua: “Yai Gumam kam akire di teinga wi dinga pepam ikai koi Yurasi kam i epe boime:

Yaromi ikom yo duwamie. Yai ta ikai koi kei faikenamie.

Te wi dungua ka ta i epe dume:

Nenta yaromi kokonanom inamie.

Ka i epe boingua<sup>p</sup> 21-22 ena iran nonon nenta gunom boi towapune. Nonon epe kanapunga koma Yesu mansinomdi wan moingua yaromi te nonon te Ari Wanopanom Yesu ama moipune. Te yaromi kanongua Yoane Yesu nuwi bui tome. Te ama kanongua Yai Gumam Yesu kamundi akire di tome. Nonon yaromi epe kanapunga ena gunom boi towapune. Gunom borapungoro yaromi Yurasi kokonanom ire kakom kakom no wanapunga ama wanere ‘Yesu goiro tokoi arome,’ ari di mari de erowame,”<sup>q</sup> 23Pita epe dungoro ena ari tei moinga yai surai imari de ereime. Yai ta kam i Yosefe Yusatasi dunguai te ari suwo kam ta Basapa di teimie. Te imari deinga yai ta kam i Matiasi dume. 24-25Ena kanom i imari de erere ka make eiro “Ari Wanopao, ne ari muruwo nomanenom kanenie. Te Yurasi yaromi ewi dongua finga kokonan ma dere ena fu guwom akai fume. Fungoro epena yai surai tawa aripika eramom gunom borapungoro Yurasi kokonanom inamie? Opom di noro!” epe dire<sup>r</sup> 26 ena yokamai “Kam firapune,” diro sandu singoro Matiasi kam imari dongoro yaromi fure ewi dongua finga ari okonom koro koro muruwo kaunom towane kokonan ama imie.

### Yai Gumam Muromom Sumuna u mangi ume

**2** <sup>1</sup>Yura ari iron kakom Pendikosi ungua kakom tei Yesu gama muruwo fu akai towane furo kuku boime.<sup>s</sup> <sup>2</sup>Moiro ena kamun kai nokom ori wom sunguamere epe nokom fime. Nokom kamundi unguamere kene kene eire ungoro yokamai muruwo ikom ikai moingi tei

<sup>n</sup> 1:16 Sam 41:9   <sup>o</sup> 1:18 Mt 27:3-10; Lk 22:22   <sup>p</sup> 1:20 Sam 69:25; 109:8   <sup>q</sup> 1:22 Yo 15:27  
<sup>r</sup> 1:24 Yo 2:25   <sup>s</sup> 2:1 Lew 23:15-21

nokom fimie. <sup>3</sup>Te yokamai kaninga tai ta epe e dongua girayom fari sire donguamere epe fuka dire dou diro koro koro fure ari yokamai binomdi kopu tei towane towane de moimie.<sup>4</sup> <sup>4</sup>Ena Yai Gumam Murom ure Yesu gama muruwo denom minom ikai koi fure si di erome. Ena Murom Sumuna yokamai girawinom akire di erongoro ari ka kapo kapo dimie.”

<sup>5</sup>Ena koma Yura ari Yai Gumam ka mapunom gore dinga yokamai ikinom akainom koro koro ma dere Yerusarem ure aro kakom i tei moimie. <sup>6</sup>Yokamai moire nokonom fire uro yai opai munmane uro kuku boiro Yesu gama yokamai ari yai opai nenen kanom kapo kapo dinga firo ganom nouro diro <sup>7</sup>te inokore unanan eire ka epe “Yokamai ka kapo kapo dingai Gariri ari moimba” <sup>8</sup>ta bengoro yokamai nonon nenom manom dingamere epe dingoro fipunie? <sup>9</sup>Nonon ari iki iki yokamai i epe: Patia ari suwo te Miria ari suwo te Iram ari suwo te Mesopotemia ari suwo te Yura ari suwo te Kaporosia ari suwo te Pandusi ari suwo te Eisia ari suwo te <sup>10</sup>Firikia ari suwo te Pambiria ari suwo te Isipi ari suwo te Lipia ari Sairini teina tei kei fainga yokamai suwo te Yura ari suwo Roma ma dere tawa wingai te ari bam ta suwo koropane Yura ari ka mapunom gore dire Roma ama ma dere tawa wingai te <sup>11</sup>Kiriti ari suwo te Arepia ari suwo epe tei moipunie. No koro koro dere tawa upunba yokamai Yai Gumam tai ta ta ori benguai nonon kanom di mari deingoro fipunie,” dire” <sup>12</sup>ganom nouro dire inokore eire “Tai epe yokamai beinga mapunom i tora dume?” diro ka di ipo ka dere moime. <sup>13</sup>Ari suwo epe dimba ari suwo koropane Yesu gama gumanom bauwire “Yokamai nuwi wain koi nere binom mem du dime,” epe dime.

### Pita arero ka di mari dome

<sup>14</sup>Ari dinga iran Pita te ewi dongua finga yokamai okonom koro koro muruwo kaunom towane arere ena Pita u ori boire epe di eromie: “Yura arinamao te ne yokamai Yerusarem ari yo, na kanam duwaika fi goi iyo! Tai bepunga mapunom di erowaiye. <sup>15</sup>Ne yokamai ‘No yokamai nuwi wain nere binom mem du dime,’ epe di fimba ari koimoi nuwi wain nekeinga iran i no yokamai du dikepune. <sup>16</sup>Ma deiyo! No ka kapo kapo dupungairai komari Yai Gumam ka mapunom yai i kam Yo kam epe dunguamere<sup>x</sup>

<sup>17</sup>‘Yai Gumam epe dume, “Man man muruwo gounaro benangua kakom i na Murenam Sumuna awi dowaikoro ari yai opai muruwo inaimie. Inaingoro ena ne yokamai wanoma te aponoma na kanam mapunom di mari dowai. Te ne yokamai kora gaima kuwan epe kaningamere epe kanaime. Te ne yokamai

<sup>1</sup> 2:3 Mt 3:11    <sup>2</sup> 2:4 Yo 14:17; Ap 4:31; 10:44-46; 19:6    <sup>3</sup> 2:7 Ap 1:11    <sup>4</sup> 2:11 Rew 7:9

<sup>x</sup> 2:16 Yoe 2:28-32

yai dumanom kuwan kawom kanaime. <sup>18</sup>Kawom kakom tei na Murenam Sumuna awi dowaikoro ena na kokonanam beinga yai gan muruwo te na kokonanam beinga opai gan muruwo ire ka mapunom di mari dowaiame. <sup>19-20</sup>Te na tai ta ta ori beika kamundi teme iwa opom dowaiye. Tarom i epe: Aro dekenangoro te kapa i kou darangua aki epemere bename. Te na tai ta ori beika maniki ime opom dowaiye. Tarom i epe: aki te e dongua te enuku orinan fuka duwangoro ena ari ganom nouro duwaiame. Tarom i fuka diro gounangoro ena Ari Wanopanom yoporam boingua keranom sungua imari dowangua kakom i teina tei unamie. <sup>21</sup>Kakom tei nenta na Ari Wanopanom yana di narowangua akire di towaika nokapu morame,” Yai Gumam epe dume,’

ka epe Yo yaromi boime.’<sup>y</sup>

<sup>22</sup>Isirae arinamao, ka i fiyo! Nasareti yai Yesu yaromi ne yokamai moingi tei moingoro ena Yai Gumam ‘Yesu kawom awi deika mapunom firaime,’ diro Yesu yoporam boingoro tai ta ta ori beiro te ari ganom nouro dinga tarom ama beme. Yesu imari dongua tarom muruwo ne yokamai kanime.<sup>z</sup> <sup>23</sup>Ne yokamai Yesu suwaro okom a ki singa mapunom komari wom Yai Gumam kanere ka di guwo dume. Ena ne yokamai Yesu akire ari Yai Gumam kam gore dikeinga yokamai erere ‘Eri yoro bakomdi si goiyo!’ dingoro si goime.<sup>a</sup> <sup>24</sup>Ne yokamai Yesu si goimba Yesu si goinga kipi ori wom kaingua ma dengoro Yai Gumam ako arirome. Goinga mapunomom Yesu bire ime de towangua faikengoro ena Yai Gumam akire kamundi fume.<sup>b</sup> <sup>25</sup>Ena fiyo! Koma Dawiri yaromi Yesu kam epe dume:

‘Na Ari Wanopanam yo, ne gumanamdi moingere kakom kakom kaniye. Ne na moi ki teina tei moinga iran nenta tai ta bei niki de narowangua faikeme.<sup>c</sup> <sup>26</sup>Ena iran denam minam mun fire te ka dikai ama mun fiye. Te na “Goraika okome tokoi yokori moraiye,” di fika epena na ganam dinam inokore ei tere moiye. <sup>27</sup>Na ne yo tongua yaromi moikai goraika enainga manomdi kakom kakom moikenaiye. Te na ganam dipanom kuname. Kawom, ne “Mane,” duwane.<sup>d</sup> <sup>28</sup>Ne na kakom kakom yokori moraika konom opom di narenie. Ena ne na gere towane wom moiro na mun ori wom firaiye,’ dume.

<sup>29</sup>Arinamao, nonon awanom Dawiri kam di mari dowaiye. Yaromi mora goingoro man singoro te epena yaromi yono einga manomdi kanupune. Iran Dawiri nenen kam dikemie.<sup>e</sup> <sup>30</sup>Te Dawiri yaromi ka mapunom yai moingua ena Yai Gumam okom koi mapomdi dere ka kawom epe di tome.

<sup>y</sup> 2:21 Ro 10:13    <sup>z</sup> 2:22 Yo 3:2    <sup>a</sup> 2:23 Ap 4:27-28    <sup>b</sup> 2:24 Ap 3:15    <sup>c</sup> 2:25 Sam 16:8-11

<sup>d</sup> 2:27 Ap 13:35    <sup>e</sup> 2:29 1 Kin 2:10; Ap 13:36

‘Ne wanum ta u mari nangua te ne ari kiapanom bei erengamere yaromi epe ari kiapanom bei erowame,’ epe di tome.<sup>f</sup> <sup>31</sup>Di tongoro ena Dawiri Yai Gumam tai okome benaro bengua Mesia arero towamie kanumie. Ena yaromi ‘Yai Gumam Mesia awi dowangua akire di norowangua yaromi ari goinga einga manomdi tei ma dekenangore gam buiro dipanom kunamie,’ epe dume.<sup>g</sup> <sup>32</sup>Ena iran Yai Gumam Yesu akire di tongoro arere yokori moingua nonon kanero di mari dopune.<sup>h</sup> <sup>33</sup>Yai Gumam Yesu akire di tongoro teme iwa fure epena Yai Gumam okomwomdi moime. Tei moingoro Auwom Murom Sumuna kam koma ‘Na Murenaw awi dowaiye,’ diro di koi engua yarom tongoro awi de norome. Norongoro tarom muruwo bepunga ne yokamai mora fire kanimie.<sup>i</sup> <sup>34</sup>Dawiri yaromi gam dinomge kamundi iwa kingua yaromi nenen kam dikemie. Ena Dawiri ka ta

‘Yai Gumam na Ari Wanopanaw epe di tomie, “Ne na okonaw womdi ame de moro!”<sup>j</sup> <sup>35</sup>Ne tei moingi ne kianuma ewi ne kaunum oropo ipo de erowaiye,” di tome,’

Dawiri dume. <sup>36</sup>Ena iran, Isiraw arinama muruwo, tarom i fuka dungua ne yokama na kanam dikai fi kun daiyo! Yesu yaromi ne yokamai eri yoro bakomdi yoko ingarai Yai Gumam akire di tongoro yaromi Ari Wanopanaw moiro te Yai Gumam awi dongua akire di norongua yai Mesia ama moimie,” Pita ka epe di erome.

<sup>37</sup>Ka di erongoro yokamai fingoro denom minom kipi kaingoro ena yokamai Pita yaromi te ewi dongua finga yokamai, “Arinomaw, no yokamai tamere benapune?” diro mina wako ereime.<sup>l</sup> <sup>38</sup>Mina wako ereingoro Pita “Ne yokamai nomanenom ikai koi si awa tere firaingaw Yai Gumam bianom kore dowame. Ena ne yokamai Yesu gama moingaw nuwi buiyo! Epe benaingere Yai Gumam Murom Sumuna ne yokama erowangoro inaimie.<sup>m</sup> <sup>39</sup>Koma Ari Wanopanaw nonon Yai Gumanaw bei moiro ne yokama te ne ganomaw te ari yai opai muruwo fakai fakai moingaw yokamai ka di koi eiro ‘Na moiki tei wiyo! Na Murenaw erowaiye,’ epe di erongua yokamai inaimie,” Pita ka epe dume.<sup>n</sup> <sup>40</sup>Te Pita ka ta munmane ama yokamai di mari dero yoporaw boiro di erome, “Ne yokama ari bianom faingaw yokamai ma dowaingaw Yai Gumam akire di erowangoro fuka diro nokapu moraimie,”<sup>o</sup> <sup>41</sup>di erongoro ena yokamai Pita kam dungua fi kun daingoro nuwi bui erome. Aro kakom i ari yai opai munmane wom epemere 3000 fi ki sire Yesu gama birom ikumo sire<sup>p</sup> <sup>42</sup>te Yesu ewi dongua finga yokamai ka mapunom dingaw firo ena ari fi ki singaw yokamai fana gairo moime. Yokamai kuku boire “Yesu

<sup>f</sup> 2:30 2 Sam 7:12; Sam 89:3-4; 132:11    <sup>g</sup> 2:31 Sam 16:10    <sup>h</sup> 2:32 Ap 1:8    <sup>i</sup> 2:33 Ap 1:4; 7:55-56; 1 Pi 3:22    <sup>j</sup> 2:34 Sam 110:1    <sup>k</sup> 2:34 Ap 5:30-31    <sup>l</sup> 2:37 Lk 3:10, 12; Ap 16:30  
<sup>m</sup> 2:38 Lk 24:47; Ap 3:19    <sup>n</sup> 2:39 Ais 57:19; Ef 2:12-13, 17    <sup>o</sup> 2:40 Diu 32:5; Fir 2:15  
<sup>p</sup> 2:41 Ap 2:47; 4:4; 5:14

goingua kam firapune,” dire kua kopuna ama nere te ka make ei moimie.<sup>q</sup>  
<sup>43</sup>Yai Gumam bei moiro Yesu ewi dongua finga yokamai yoporam boi erongoro ena yokamai tai ta ta ori bei moingoro yai opai muruwo ganom nouro diro kuri fime.<sup>r</sup> <sup>44</sup>Ari muruwo Yesu fi ki si teinga yokamai fana gairo moire te nenen guwai gainom ako moimba nenta tai dikengua teimie.<sup>s</sup>  
<sup>45</sup>Yokamai teingamere epe guwai gainom ire te manom sinom ire meina beire kongo mukom ire fi ki singa nenta tai ako nekengua ipu sire teimie.  
<sup>46</sup>Te kakom kakom yokamai fu Yura ari fi mun ei teinga iki fure ama kuku boire nomane towane eire ka make eime. Te yokamai ikinomdi koro koro fure kua kopuna ama nere mun ori wom fimie.<sup>t</sup> <sup>47</sup>Te yokamai Yai Gumam kam akire di teingoro ari Yesu gama moikeinga yokamai muruwo kanere kanom fi ereime. Te kakom kakom Ari Wanopanom ari akire di erongoro Yesu fi ki si teinga yokamai birom ikumo si erome.<sup>u</sup>

### Pita bei moiro yai ta kauwom niki dongua yaromi bei nokapu de tome

**3** <sup>1</sup>Ena aro kakom ta aro u oropo taro fungua kakom Isirae ari ka make ei moinga kakom Pita te Yoane yai surai “Ka make enapuiye,” dire Yura ari fi mun ei teinga iki fipikoro <sup>2</sup>kanipikai yai ta moime. Koma yaromi mam kui nongua kakom tei yaromi kauwom niki dongua kon wankengua ena epena ama kon wankeme. Kakom kakom ari yaromi akire fure fi mun ei teinga iki kori gumamdi i kam Nokapu wom tei eime. Ena yaromi tei moiro ari yai opai ikai koi naro beinga “Kongo nareiyo!” di erome.<sup>v</sup> <sup>3</sup>Te yaromi tei moiro kanongua Pita te Yoane fi mun ei teinga iki ikai naro beipikoro ena yaromi “Yai surai, tai ta nareiyo!” di erongoro <sup>4</sup>yai surai toren kanere ena Pita ka epe “Ne no surai toren nokano!” di tongoro<sup>w</sup> <sup>5</sup>ena yaromi surai ekanero “Surai tai nareingoro inaye,” epe di fimba <sup>6</sup>Pita ka epe dume, “No surai kongo ako nekepunba akire di erowapune. Yesu Kirisito, Nasareti yai moingua yoporam narowangua na ‘Arire mangi fo!’ di ereye,” di tere<sup>x</sup> <sup>7</sup>ena okomwomdi akoro akire dungoro kene kene wom eiro kauwom te kauwom okoinom sino tero yoporam boingoro <sup>8</sup>yaromi arire bu dire ure sire kon wan fure yai surai fi mun ei teinga iki ikai ama fure ure ure sire wanero Yai Gumam kam akire dume.<sup>y</sup> <sup>9</sup>Te yaromi epe bengua yai opai muruwo ikai koi moinga kanere <sup>10</sup>“Yaromi kori gumamdi i kam Nokapu wom tei ame dere moiro ‘Kongo nareiyo!’ dume,” diro ena yaromi nokapu fungua yokamai “Aiya Maiya,” diro ganom nouro diro inokore munmane eime.

### Pita fi mun ei teinga iki moiro gunom kam di mari dome

<sup>11</sup>Ena yaromi ure Pita te Yoane okonom a ki sungoro ari yai opai muruwo ganom nouro ori wom dinga bu dire u Pita te Yoane moipiki tei

<sup>q</sup> 2:42 Ap 20:7   <sup>r</sup> 2:43 Ap 5:11-12   <sup>s</sup> 2:44 Ap 4:32-35   <sup>t</sup> 2:46 Lk 24:53   <sup>u</sup> 2:47 Ap 2:41; 6:7; 11:21, 24   <sup>v</sup> 3:2 Ap 14:8   <sup>w</sup> 3:4 Ap 14:9   <sup>x</sup> 3:6 Ap 3:16; 16:18   <sup>y</sup> 3:8 Ap 14:10

ure kuku boime. Pita te Yoane surai fi mun ei teinga iki maminom tei moipikai kam i Soromon. <sup>12</sup>Pita yaromi ari muruwo kuku boinga kanero “Isirae nenom yo, tora bengoro ne yokamai ganom nouro dime? Yaromi nokapu furo wanongua ‘Nonon yoporam boipika bo nonon tai yo tongua beipika bo no surai bei nokapu de tepire,’ di fimo? Ma deiyo! Ena no surai toren nokankeiyo! <sup>13-15</sup>Ne yokamai Yesu yaromi mapunom fimo? Ne yokamai yaromi ari kianom okonomdi eire te yai Pairoti yaromi ‘Na yaromi awi mena dowaye,’ dungua ne yokamai ‘E e,’ diro mounom wako teime. Te Yesu yo tongua yai moiro te nokapu wom moimba ne yokamai mounom wako tere Pairoti epe di teimie, ‘Yai ta ari ei goire bengua yaromi awi mena do!’ dime. Ena iran ne yokamai yokori morapunga konom opom di norongua yaromi si goimba Yai Gumam yaromi Aparam te Aisaki te Yakopo te non awanom yokamai Yai Gumanom moingua yaromi bei moiro kokonan gan Yesu ako arere kam akire di tome. No surai tarom i kanere di mari dere moipuiye.<sup>z a</sup> <sup>16</sup>Te Yesu yoporam boi tongoro ena kauwom niki dongua yaromi ne yokamai gumam kaningarai nokapu moimie. Yaromi Yesu fi ki si tongua iran yaromi nokapu moingoro ne yokamai tarom i kanime.

<sup>17</sup>Ena, arinamao, na epe di fiye. ‘Ne yokamai te kiapanom bei ereinga yokamai tai beinga mapunom fikeinga ena Yesu gam kipi kaingua bei teime,’ mora kaniye.<sup>b</sup> <sup>18</sup>Te komariki Yai Gumam dunguamere epe ka mapunom yokamai ‘Mesia gam kipi kokonan iname,’ di mari deime. Ena epena kakomdi ka i mukom faimie.<sup>c</sup> <sup>19</sup>Ena iran ne yokamai nomanenom si awa tere Yai Gumam inokore ei teiyo! Epe benainga Yai Gumam bianom kore dere te bei nokapu de erowangoro nokapu moraime.<sup>d</sup> <sup>20</sup>Te okome Yai Gumam Yesu Kirisito awi dowangoro ne yokamai moingi tei uname. Koma Yai Gumam Yesu yaromi gunom boi tongua awi de erowame. <sup>21</sup>Awi dowamba epena Yesu kamundi moime. Koma ka mapunom yokama Yai Gumam kokonan inga yokamai moingoro Yai Gumam ‘Okome na taikan muruwo bei kun dai teikoro umari name,’ di erome. Ena ka mapunom ari yo tonguai di erongua ka i mora mukom fanangoro Yesu tokoi ako mangi uname. <sup>22</sup>Ena te ka mapunom yai Mose epe dume, ‘Ari Wanopanom ne yokama Yai Gumanom yaromi nawi dunguamere epe ne yokamai arinom ta iro awi dowangoro ka mapunom yai moramie. Yaromi ka muruwo di erowangoro ne yokamai gore duwaime.<sup>e</sup> <sup>23</sup>Nenta yaromi ka di erowangua gore dikenangua Yai Gumam si gorangoro yaromi gama moikenangua i fanamie,’ Mose epe dumie. <sup>24</sup>Te Mose yaromi te ka mapunom yai ta Samue te ka mapunom ari okome winga yokamai muruwo tai epena kakomdi fuka duwangua

<sup>z</sup> 3:13 Eks 3:6, 15; Lk 23:13-25; Ap 2:23    <sup>a</sup> 3:15 Ap 2:32; 4:10; 5:30    <sup>b</sup> 3:17 Lk 23:34; 1 Ti 1:13    <sup>c</sup> 3:18 Lk 24:27    <sup>d</sup> 3:19 Ap 2:38    <sup>e</sup> 3:22 Diu 18:15, 18-19; Ap 7:37



kam di mari deime. <sup>25</sup>Ne yokama Yai Gumam ka mapunom yokamai ganoma moime. Yai Gumam ne awanoma ka gowa si ei erere te Aparam ka epe ‘Na ne ganuma bei nokapu de erowaikoro ena yokamai ari yai opai man man muruwo moinga bei nokapu de erowaime,’ di tome.<sup>f</sup> <sup>26</sup>Ena iran ne yokama Aparam gama moinga koma wom Yai Gumam kokonan yaromi Yesu gunom boire awi de erome. Boware guwo di erowaro bengoro ne yokamai mapunom niki dongua ma dowaro beinga Yesu awi de erome,” Pita ka epe di erome.<sup>g</sup>

**Yura ari mokoinga yokamai fure Pita te Yoane gere ka kori di ereime**

**4** <sup>1</sup>Ena Pita te Yoane ari yai opai ka yo di ere moipiki ari fi mun ei teinga yokamai u te kiminem fi mun ei teinga iki kiapam beinga yai ori u te Sarusi ari yokamai u yai surai moingi tei wime.<sup>h</sup> <sup>2</sup>Te yai surai “Yesu yono manomdi arironguamere ari goinga ama epe arirowaimie,” ka epe di mari de moipikoro ena ari winga yokamai niki de fire<sup>i</sup> <sup>3</sup>yai surai a ki sire taroma engua iran “Koimoi ka kori bei erowapune,” diro kan si ereime.<sup>j</sup> <sup>4</sup>Si ereimba ari yai opai munmane yai surai kanom fi kun daime. Fi kun daingoro ena epena ari munmane wom epemere 5000 Yesu fi ki si teime.<sup>k</sup>

<sup>5-6</sup>Ena kamun takongoro koimoi Yura ari wanopa yokamai te ari dumanom ori beinga yokamai te ka di guwo dungua nuwi si ereinga yokamai te fi mun ei teinga ari ori i kanom Anasi te Kaiyafasi te Yoane te Eresanda te fi mun ei teinga yai ori ariyoma suwo u Yerusalem tei ure kuku boire <sup>7</sup>ewi dungua finga yai surai akire fure suna tei dere mina wako ereime, “Eramom ne yai surai yoporam boi erongoro tai beipire? Te eramom ‘Beiyo!’ di erongoro beipire?” di ereingoro <sup>8</sup>Yai Gumam Murom Pita miriyom ikai koi si di tere yoporam boi tongoro ena “Yura ari wanopao,<sup>l</sup> <sup>9</sup>‘Kauwom niki dongua yaromi ne yokama gumanomdi tei moingua tamere beiro nokapu moime?’ di firo ka kori di norowaimo? <sup>10</sup>Ena ne yokama te Isirae ari yai opai muruwo na kanam dikai fiyo! Ne yokamai Yesu Kirisito Nasareti akai yai moingua ire eri yoro bakomdi si goingoro ena Yai Gumam ako yono manomdi arirome. Yesu i yoporam boiro moingua ena yai kauwom niki dongua yaromi u nokapu fume.<sup>m</sup> <sup>11</sup>Te ne yokamai iki keinga ne yokamai kokonan gan yokamai kongo ta ‘I niki dongua,’ dire ma deingoro ena ari suwo ure kongo i ire iki kowiri kauwom towane beime. Yokamai kongo i ma deingamere ari epe Yesu ma deimba Yesu yai ori fuka dire moime.<sup>n</sup> <sup>12</sup>Ena iran Yai Gumam Yesu awi mansinomdi dongua yaromi towane nonon akire di norongoro moi

<sup>f</sup> 3:25 Yen 22:18; Gar 3:8    <sup>g</sup> 3:26 Ap 13:46    <sup>h</sup> 4:1 Lk 22:4, 52    <sup>i</sup> 4:2 Ap 23:8    <sup>j</sup> 4:3 Ap 5:18    <sup>k</sup> 4:4 Ap 2:41; 5:14    <sup>l</sup> 4:8 Mt 10:19-20    <sup>m</sup> 4:10 Ap 3:6, 13-16    <sup>n</sup> 4:11 Sam 118:22; Mt 21:42

kuwom suwapunga akaiyomdi tei morapune. Yai ta akire di norowangua i faikeme,” Pita epe dume.<sup>o</sup> <sup>13</sup>Ena Pita te Yoane kuri fikere ka dipikai te munom ganom iki ikai fipikai te surai ari wanopa moikeypikai ari yokamai inokore munmane eiro te “Yai surai Yesu ye ama wan moipire,” firo kanime. <sup>14</sup>Te yokamai kaningai yai kauwom niki donguai nokapu moingua yai surai moipiki tei ama moingoro ena ka mokom di erowainga faikeme. <sup>15</sup>Ena iran ari yokamai yai surai “Kuku boipunga ikom ma dere u mena fiyo!” di erere mora mena fipikai ari nenen di ipo ka dero epe <sup>16</sup>“Nonon yai surai tora bei erowapune? Ari yai opai Yerusarem kei fainga yokamai kaningai yai surai tai ori yoporam boingua beipire. Kaninga iran nonon di eke dowapunga faikemie.<sup>p</sup> <sup>17</sup>Yai surai kanom wayom i u man man fure ari yai opai muruwo firaro beikeinga nonon kura kam diro ‘Yesu kam ari di erekeiyo!’ ama di erowapune,” <sup>18</sup>yokamai diro yai surai unom boire epe di ereime, “Yesu kam ari kirawa si erekere te ama di mari de erekeiyo!” di ereimba<sup>q</sup> <sup>19</sup>Pita te Yoane surai mokom bairo “Nonon ne yokamai kanom dinga gore duwapunbo Yai Gumam kam dungua gore duwapune? Ne yokamai inokore ei fire ipu siyo!” <sup>20</sup>Te nonon mora ipu supunie. Tarom i fipika te tarom i kanipika kakom kakom di mari dowapire,” epe dipikoro <sup>21-22</sup>yai surai kuri firaro beipika kuku boinga yokamai kura kam dire “Ne fiyo!” di ereime. Yai kauwom niki dongua nokapu moingua yaromi non iki 40 fume. Yaromi nokapu moingoro ari yai opai muruwo kanere Yai Gumam kam akire di teinga iran kuku boinga yokama yai surai kupa eikeimie.

### Yesu gama yokamai ka make ei teime

<sup>23</sup>Ena Yura ari ori yokamai Pita te Yoane ewi deingoro yai surai u mena ure Yesu gama moingi tei fure fi mun ei teinga yokamai te ari dumanom ori beinga yokamai kanom dingamere epe di erepire. <sup>24</sup>Di erepikoro ena Yesu gama muruwo fire nomanenom towane ei moiro Yai Gumam ka make ei teime, “Ari Wanopao, ne Yai Gumam moire kamundi te man man muruwo te fui nuwi te taikan muruwo ikai koi moinga bei enie.<sup>s</sup> <sup>25</sup>Te ne ka di norenga ne bengamere epe: Ne Muronum Sumuna ne kokonan gan Dawiri di tongoro ena no awanom Dawiri giramdi dunguamere epe:

Tora bengoro ari Yura ari moikeinga yokamai niki de firo ka di gou dimba kanom fuka dikenamie.<sup>t</sup> <sup>26</sup>Mansinomdi ari ori te yokamai kiapanom beinga ari ori kuku boire ‘Nonon Ari Wanopanom te Yai Gumam awi dongua yai Mesia kura boi erowapune,’ epe dime.

<sup>27</sup>Dawiri epe dungua mapunom i epe: Epena kakom i yai ori surai Eroti te Pondiasi Pairoti te ari Yura ari moikeinga yokama te Isirae ari iki

---

<sup>o</sup> 4:12 Mt 1:21; Yo 14:6    <sup>p</sup> 4:16 Yo 11:47    <sup>q</sup> 4:18 Ap 5:28, 40    <sup>r</sup> 4:19 Ap 5:29    <sup>s</sup> 4:24 Sam 14:6    <sup>t</sup> 4:25 Sam 2:1-2

birom ori tawa kuku boire ne kokonan gan Yesu yo tongua yai kura boi teime. Yesu i yo tongua yai moingoro ena ne kiapanom bengua kokonan tene.<sup>u</sup> <sup>28</sup>Ne yoporam boinga te ‘Na epe benaye,’ di finga ne ka di guwo dinie. Ena iran yokamai kuku boire tai ta muruwo koma ne ka di guwo di enga beimie.<sup>v</sup> <sup>29</sup>Ari Wanopao, yokamai ‘Nonon noinaimie,’ ka epe dinga ne firo akire di noro! Akire di norowanga nonon ne kokonan ganuma moipunga kuri fikere ne gunom kanum di mari dowapune.<sup>w</sup> <sup>30</sup>Te ne yoporam boiro ari nupi fainga bei nokapu de ero! Te Yesu ne kokonan gan moingua te yo tongua yai moingua ena nonon yaromi kam diro kokonan ori munmane te ari ganom nouro dinga tarom munmane benapune,” ka make epe mora ei teingoro <sup>31</sup>yokamai kuku boiro ka make einga ikom koka tongoro Yai Gumam Murom fu yokamai denom minom ikai koi fure si di erongoro ena yokamai kuri fikere Yai Gumam gunom kam di mari deime.<sup>x</sup>

**Yesu gama yokamai guwainom gainom ako  
neinga iro ari akire di ereime**

<sup>32</sup>Ena ari fi ki singa yokamai muruwo nomanenom towane eire ka towane fime. Epe firo yokamai “Tai i na tainam dume,” dikeimba yokamai guwai gainom ako neinga ari suwo ereimie.<sup>y</sup> <sup>33</sup>Te Yesu ewi dongua finga yokamai yoporam boire Ari Wanopanom Yesu arongua kam dingoro Yai Gumam bei nokapu wom de erome. <sup>34-35</sup>Te ari suwo manom sinom woi neinga bo ari suwo ikinom kei fainga yokamai ari erere kongo mukom ire fu ewi dongua finga yokama moingi tei fure ereingoro ena yokamai ire ari guwai gainom dikengua ipu sire ereimie. Kongo ipu si ereinga ena ari guwai gainom ako nekeinga moikeyme.<sup>z</sup>

<sup>36</sup>Ena yokamai meina epe beinga yai ta i kam Yosisi ama moingoro te ewi dongua finga yokama kam ta Banapasi dire eime. Banapasi kam mapunom i epe dungua: ari denom minom bei erowai te erongua yai. Yaromi Liwai wam moiro te Saipasi akai tei kui nome.<sup>a</sup> <sup>37</sup>Te Banapasi mansinom ari erere meina teiri iro uro ewi dongua finga yokama erome.

**Anania efem biyai Sapaira surai mapunom beipika kam dume**

**5** <sup>1</sup>Banapasi epe eromba yai ta epe erekeme. Yaromi kam i Anania, te efem biyai kam Sapaira. Ena yaromi manom sinom koro ari erere kongo mukom ire <sup>2</sup>suwo eke dere “Nanan nowaiye,” diro ako moingoro te efem biyai ama kanere “O” dume. Ena te Anania meina koro ire “Meina koro i man meinam muruwo dunguarai,” diro fu ewi dongua finga yokamai moingi tei furo eromba<sup>b</sup> <sup>3</sup>Pita ka i “Ananiao, ne manum sinom

<sup>u</sup> 4:27 Mt 27:1-2; Lk 23:7-11; Ap 3:13-14    <sup>v</sup> 4:28 Ap 2:23    <sup>w</sup> 4:29 Ef 6:19    <sup>x</sup> 4:31 Ap 2:44  
<sup>y</sup> 4:32 Ap 2:44    <sup>z</sup> 4:34 Ap 2:45    <sup>a</sup> 4:36 Ap 11:22-26; 13:2-3    <sup>b</sup> 5:2 Ap 4:34-35

meinam koro eke dere ako moinga ne Yai Gumam Murom kasu di tene. Satan yaromi ne kinum sungoro ta bengoro ka dungua gore dine?<sup>c</sup> 4Koma ne man meina ikenga nenen manum sinom dume. Te okome ne meina inga nenen meinanum ama dume. Ena tora bengoro ne ‘Man meinam muruwo ereiye,’ di norere meinam koro norene? Ne ari kasu bei erenba ne Yai Gumam kasu ama bei tenie,” epe di tongoro 5yaromi ka i firo goiro ako mangi faingoro ari muruwo ka wayom i finga kuri ori wom fime. 6Ena ari kora gaima ure gai ire yono yo buire daure akire dire ire furo man si teime.

7Te moi fure aro suna ungoro Anania efem biyai uro wiyom biyai goingua fikere u ikai ungoro 8Pita mina wako tome, “Ne winum biyai man meinam muruwo ire ure noromo?” di tongoro oparomi “O, nonon surai man meinam muruwo eropune,” di tongoro 9ena Pita ka epe di tome. “Tora bengoro ne surai ka di guwo dire Ari Wanopanom Murom Sumuna gumam bauwi teipire? Kano! Ari yokamai ne winum biyai man si teinga mora ure kori gumamdi tei arire moiro ne ama endire kau kire dire u mena naime,” di tongoro 10ena boromdi oparomi Pita kauwomdi tei ako faire goingoro ari kora gaima ikai ure kaninga oparomi mora goingoro ama kau iro furo wiyom biyai eingi teina tei man si teime. 11Ari Yesu fi ki si teinga yokama te ari suwo ka wayom i finga kuri ori wom fime.

### **Yesu ewi dongua finga ari tai ta ta ori beime**

12Ena ewi dongua finga yokamai tai ta ta ori beire te ari ganom nouro dinga tarom munmane ama beime. Te fi ki singa ari muruwo nomanenom towane eire fu Yura ari fi mun ei teinga iki fure maminom i kam Soromon kuku boime.<sup>d</sup> 13Kuku boingoro te fi ki sikeinga ari yokamai Yesu gama yokamai kanom akire dimba yokamai furo gama yokamai gere ama kuku boikeimie. 14Te ari yai opai munmane Ari Wanopanom fi ki si teingoro ena Yesu gama yai opai munmane fuka dime.<sup>e</sup> 15Ewi dongua finga yokamai tai ta ta ori beinga iran ari yokamai nupi fainga ari endire u kon mori munmane tei fure kuki boromdi kopu de erere “Pita gunom fure ari nupi fainga gunom muruwangua arire nokapu moraimie,” di fire wime. 16Te ari munmane Yerusarem koro koro kei fainga ma dere nupi fainga ari te murom niki dongua ikai koi si dungua ari endire fu Yerusarem tei fingoro ena ari yai opai nupi faingai muruwo u nokapu fime.<sup>f</sup>

### **Ari yokamai bei moiro ewi dongua finga yokamai bei niki de ereime**

17Ena Yura fi mun ei teinga yai ori te ariyoma i ari Sarusi yokama nomanenom niki ori wom dongua ewi dongua finga ari yokamai di fi

<sup>c</sup> 5:3 Yo 13:2 <sup>d</sup> 5:12 Ap 2:43; 14:3 <sup>e</sup> 5:14 Ap 2:41; 21:20 <sup>f</sup> 5:16 Mk 6:56; Ap 19:11-12

ereime.<sup>g</sup> <sup>18</sup>Niki de fire ena ure ewi dongua finga ari a ki sire endire fure kan iki deimba <sup>19</sup>giruwangua kakom Ari Wanopanom kamundi nuwi kokonan gan awi dongoro ure kan iki kori gumam yaure ewi dongua finga yokama endire u mena ure<sup>h</sup> <sup>20</sup>“Ne yokamai fure fi mun ei teinga iki ikai koi fure ari moingi tei yokori morainga konom kam di mari de ereiyo!” di erongoro <sup>21</sup>ena yokama ka i fire koimoiri wom fu fi mun ei teinga iki ikai fure yai opai ka di mari de ereime.

Ena iran kakom gawo toka goungoro fi mun ei teinga yai ori te yaromi ariyoma yokamai u fi mun ei teinga iki ori ure Isirae ari ori muruwo “Kuku borapune,” di ereingoro wime. Ena yokamai ka di kan iki tei dere “Ewi dongua finga yokamai endire wiyo!” dingoro <sup>22</sup>kiminem yokamai kan iki fure kaninga ewi dongua finga yokama moikeyngoro ena yokamai dere inako dere ure ka epe di ereime, <sup>23</sup>“No kan iki fure kori gumamdi kanopunga kori kei ki singoro te kiminem kiapam yokamai ama moingoro te no kori i yaure ikai fure kanopunga ari ta ikai moikeymie,” di ereingoro <sup>24</sup>ena fi mun ei teinga iki kiminem yai ori te fi mun ei teinga yokama ka i fire inokore munmane eire “Toramere fuka duwame?” di fime. <sup>25</sup>Yokamai di fingoro yai ta ure “Fiyo! Ari ne yokama kan iki de ereinga yokamai fure fi mun ei teinga iki tawa ikai ure ari yai opai ka di ere moimie,” di erongoro <sup>26</sup>ena fi mun ei teinga iki kiminem yai ori te kiminem ari suwo koropane fure ewi dongua finga yokamai endire kupa eikere wime. Te kiminem yokama “No Yesu gama yokamai kupa einapunga ari kongo fia sire nonon noinaimie,” dire kuri fire ena yokamai kupa eikeime.<sup>i</sup> <sup>27</sup>Kiminem yokamai endire ure kaunsel ari moingi suna tei de ereingoro ena fi mun ei teinga yai ori ka i <sup>28</sup>“Nonon ne yokama ka yoporam boiro ‘Yesu kam mapunom ari yai opai di erekeiyo!’ di eropunga kano! Ne yokama Yerusalem ari muruwo mora di mari de ereingoro fime. Ari ‘Nonon yaromi si goipune,’ di firaro beinga ne yokamai epe beimie,” di erongoro<sup>j</sup> <sup>29</sup>ena Pita te ewi dongua finga yokama gere ka mokom bairo dire “No yokama ari kanom gore duwapunga Yai Gumam kam koma gore duwapune.<sup>k</sup> <sup>30</sup>Te ne yokama Yesu eri yoro bakomdi si goimba no awanoma Yai Gumanom akire di tongoro arome.<sup>l</sup> <sup>31</sup>Ena Yai Gumam bei moiro ‘No Isirae ari nomanenom si awa towaingoro bianom kore dowaiye,’ diro Yesu akire kamundi iwa fure okomwomdi ei tongoro ena Yai Ori moiro te no akire di norongua yai ama moime.<sup>m</sup> <sup>32</sup>No yokamai te Yai Gumam Murom tarom i ama kanere di mari dopune. Te ari yai opai muruwo Yai Gumam kam dinguamere epe gore dingoro ena Murom Sumuna erome,” di ereime.<sup>n</sup>

<sup>g</sup> 5:17 Ap 4:1-3    <sup>h</sup> 5:19 Ap 12:7-10    <sup>i</sup> 5:26 Mt 14:5    <sup>j</sup> 5:28 Mt 27:25; Ap 4:18    <sup>k</sup> 5:29 Ap 4:19    <sup>l</sup> 5:30 Ap 3:15    <sup>m</sup> 5:31 Ap 2:33-34; Ef 1:20; Ip 2:10; 12:2    <sup>n</sup> 5:32 Ap 1:8

<sup>33</sup>Ena kuku boinga yokami ka i fire denom minom niki ori wom de fire “Yokamai ei gorapune,” di fime.<sup>o</sup> <sup>34</sup>Epe di fimba Kaunsel yai ta arire suna tei moime. Yaromi kam Gamarie te yaromi Feresi yai moime. Yaromi Mose ka di guwo dungua nuwi si erongua ari yai opai muruwo yaromi kam akire dime. Ena yaromi kiminem “Ewi dongua finga yokamai endire mena fiyo!” di erongoro<sup>p</sup> <sup>35</sup>mena fingoro ena yaromi kiapanom ari di erome, “Ne Isirae ari yokamao, ne yokamai ‘Ari yokamai tora bei erowapune,’ di fime? Ena koma inokore ei fi kaniyo! <sup>36</sup>Koma yai ta i kam Turasi u mari uro ‘Na yai ori moiye,’ dungoro ena ari munmane epemere 400 mouwomdi fimba yokamai si goingero yaromi gama tongi koro koro fingoro te yokamai kokonanom yo ako sume. <sup>37</sup>Tarom i epe mora bengua ena kiap gaman yai opai yokamai kanom boingua kakom Gariri yai ta i kam Yurasi u mari ungoro ari munmane mouwomdi fimba yaromi ama si goingoro ena mouwomdi finga yokamai tongi koro koro fime. <sup>38</sup>Ena iran epena ka i di ereye, ‘“Tai epe bei erowapune,” di finga ma deiyo!’ di ereye. Te yokamai kokonan i te ka kirawa si ereingai ari mapunom towane duwangua ena iran yo ako suwame. <sup>39</sup>Suwamba kokonan i Yai Gumam mapunom duwangua yo ako sikename. Te Yai Gumam kokonan duwangua ena ne yokamai bei moiro yokamai bire ime de erowainga faikenamba Yai Gumam kura boi towaimie,” yaromi epe di erome. <sup>40</sup>Ena epe dungoro kiapanom ari yokama yaromi kam gore dire ewi dongua finga yokamai unom boingoro ikai wingoro kupa eiro ka yoporam boiro “Ne yokama ari yai opai Yesu kam mapunom di erekeiyo!” di erero ewi deingoro<sup>q</sup> <sup>41</sup>ena u mena fure mun ori wom fire “Nonon Yesu fi kun dai topunga ganom kipi kaingoro mun fipungai faime,” dime.<sup>r</sup> <sup>42</sup>Ena kakom kakom yokamai fi mun ei teinga iki bo te yokamai nenen ikinomdi tei moire “Yesu yaromi Yai Gumam awi dongua akire di norongua yai Mesia moimie,” diro ari yai opai nuwi si erere di mari de ereime.<sup>s</sup>

**Yai Gumam gama bei moiro akire di ereinga yokamai  
okonom koro muruwo koro surai gunom boi ereime**

**6** <sup>1</sup>Ena epena kakom i Yesu gama munmane fuka dingoro ena Isirae ari Giriki ka dinga yokamai moire Isirae ari Yura ari kanom dinga yokamai niki de fi erere ka epe di ereime, “Aro kakom kakom ne yokamai ari kua kopuna ipu sire ereinga nonon opai werainom erekeimie,” epe di ereingoro <sup>2</sup>ena ewi dongua finga ari okonom koro koro muruwo te kaunom suwo bei moiro Yesu gama muruwo unom boire “Wiyoy!” di erero wingoro “No yokamai Yai Gumam kam di mari

<sup>o</sup> 5:33 Ap 7:54   <sup>p</sup> 5:34 Ap 22:3   <sup>q</sup> 5:40 Ap 4:18   <sup>r</sup> 5:41 Mt 5:10-12; 1 Pi 4:13   <sup>s</sup> 5:42 Ap 9:22; 17:3

dopunga ma dere kua kopuna ipu suwapungai faikenamie. <sup>3</sup>Faikenangua ena arinoma, ne yokama ari okonom koro muruwo te koro surai gunom boiyo! Ne yokamai kaninga Murom Sumuna ure yokamai denom minom ikai koi si di erowangua te yokamai ka nokapu firainga te ari yai opai ‘Yokamai ari nokapu moime,’ duwainga gunom boiyo! Gunom boingoro kua kopuna ipu suwainga kokonan inaimie. <sup>4</sup>Inaingoro ena iran nonon kakom kakom ka make eiro te Yai Gumam kam mapunom kirawa siro di mari dowapune,” epe di ereime. <sup>5</sup>Te Yesu gama yokama ewi dongua finga yokamai kam dinga mun fire ena yokamai kanom gunom boingamere epe: yai ta fi ki oriwo si tongua te Murom Sumuna dem miriyom ikai koi si di tongua yaromi kam i Sitiwin, te yai ta i kam Firipi, te yai ta Porokorusi, te yai ta Naikena, te yai ta Timon, te yai ta Pamena, te iki birom ori ta i kam Andiako yai ta kam i Nikora. Yaromi koma ariyoma ka mapunom ma dere ena Yura ari ka mapunom dourom boime.<sup>t</sup> <sup>6</sup>Yokamai gunom boire endire ewi dongua finga yokamai moingi tei fingoro ena ka make eire yokamai kokonan inaro beinga okonom ei binomdi kopu de ereime.<sup>u</sup>

<sup>7</sup>Yai Gumam kam mapunom man man fume. Te Yesu gama Yerusarem akai tei kei fainga yokamai munmane fuka dime. Te Yura fi mun ei teinga ari munmane Yesu kam fi ki si teime.<sup>v</sup>

#### Yokamai uro Sitiwin okom akoro a ki sime

<sup>8</sup>Ena Yai Gumam tai nokapu munmane yai Sitiwin bei tongoro yaromi yoporam boiro erowai tome. Erowai tere ena tai ta ta ori beire te ari ganom nouro dinga tarom ama beme.<sup>w</sup> <sup>9</sup>Bemba ari koropane ure Sitiwin kura kam tokomere ka di ipo ka deime. Yokamai Sairini ari te Eresandia ari moiro te koma yokamai nuwi kokonan gan moimba epena kiapanom ari ewi deime. Ewi deinga iran yokamai ka nuwi si ereinga iki gawo keire Yai Gumam kam akire di teime. Ena yokamai te Yura ari suwo yokama Sirisia man te Eisia man kei fainga yokamai ure kuku boire Sitiwin kura ka di ipo ka deimba <sup>10</sup>Yai Gumam Murom ka Sitiwin imari de tongoro ena Sitiwin kam dungua moko teme fungoro Yura yokamai kam dinga iwe de tome.<sup>x</sup> <sup>11</sup>Iwe de tongoro ena yokamai fure ari koropane kongo erere “Kasu diyo!” di ereingoro ena ari suwo kasu epe dime, “No yokama fipunga yaromi Yai Gumam kam te Mose kam ka sume,” epe dingoro<sup>y</sup> <sup>12</sup>epe dingarai iran ari yai opai te Yura ari ori te ari ka di guwo dungua nuwi si ereinga yokamai denom minom bai taki sire fu Sitiwin moingui tei fure a ki sire akire Kaunsel ari moingi tei fure <sup>13</sup>te kasu dinga ari suwo ama endire wingoro ena kasu dinga yokamai ka epe dime. “Yaromi

<sup>t</sup> 6:5 Ap 8:5-40; 21:8    <sup>u</sup> 6:6 Ap 13:3    <sup>v</sup> 6:7 Ap 2:41; 16:5    <sup>w</sup> 6:8 Ap 2:43    <sup>x</sup> 6:10 Lk 21:15  
<sup>y</sup> 6:11 Mt 26:59-61

kakom kakom fi mun ei teinga iki yo tongua bo te Yai Gumam ka di guwo dungua kam i ka sume.<sup>z</sup> 14 Te no yokama fipunga yaromi epe dumie, ‘Yesu Nasareti yai fi mun ei teinga iki i towi ire te Mose mapunom koma norongua ma dere mapunom ta norowame,’ dume,” epe kasu dime. 15 Dingoro ena Kaunsel ari kuku boinga muruwo Sitiwin gumam toren kaninga gumam yororo dikemba kamundi nuwi kokonan gan gumam dunguamere i epe dume.

### Sitiwin ka di mari dome

**7** 1 Ena fi mun ei teinga yai ori “Ka i ari yokamai dinga i kawom dumbo?” diro Sitiwin mina wako tongoro 2 yaromi mokom bairo ka epe dume, “Arinama te nenama yokamao, ka duwaika i fiyo! Koma nonon awanom Aparam yaromi iki birom ori Keran tei kei faikengua kakom i yaromi Mesopotemia man tei yo moingoro Yai Gumam kamundi bau boingua kapukom moingua yai Aparam moingui tei fuka diro 3 ka epe dume. ‘Ne arinuma te manum sinom ma dere mansinom ta na opom di erowaika fol’ di tongoro 4 ena akaiyom Karia ma dere fure iki birom ori Keran ure kei faime. Okome auwom goingoro Yai Gumam awi dongoro ure nonon epena moipungi manom sinomdi tei ume.<sup>a</sup> 5 Aparam umba Yai Gumam mansinom tawa tekeme. Mansinom gawo toka ama tekemba Yai Gumam epe dume, ‘Okome na bei moiro mansinom tawa muruwo i erowaikoro ako morangere te ne ganum gaunoma ama ako moraimie,’ di tomie. Te ka i di tongua kakom tei Aparam gan kui eikeme.<sup>b</sup> 6 Ena Yai Gumam ka ta epe di tome. ‘Ne ganum gaunoma yokamai mansinom akainom ta moraingana non iki munmane epemere 400 nuwi kokonan gan yokamai moiro ganom kipi kokonan inaimie.<sup>c</sup> 7 Te ne ganum gaunoma nuwi kokonan mansinom ari erowaingoro ena okome na mansinom ari yokamai einaiye. Na mora einaika ne ganum gaunoma man i ma dere fure inako dere u man tawa ure na kanam akire di narowaimie,’ epe dume.<sup>d</sup> 8 Ena Yai Gumam Aparam ka gowa si ei tere epe ei tome. ‘Ne ganum gaunoma yai gan ganom guwo duwainga i yokamai na kanam gowa si ei ereika gore duwaima opom di narowaimie,’ Yai Gumam di tome. Epe di tongua iran Aparam gan ta Aisaki kui engua aro kakom 8 kan moiro gam go dume. Te okome Aisaki wam Yakopo kui eire gam ama go dume. Te Yakopo nonon girinom awanoma 12 kui eire ganom ama go dume.<sup>e</sup>

9 Ena no awanoma yokama emenom Yosefe niki de fi tere ari okonomdi tei erere kongo imie. Ingoro ari Yosefe akire Isipi man tei fure nuwi kokonan teimba Yai Gumam yaromi gere ama moire<sup>f</sup> 10 tai ta ipun

<sup>z</sup> 6:13 Mt 26:59   <sup>a</sup> 7:2-4 Yen 11:31-12:5   <sup>b</sup> 7:5 Yen 12:7; 17:8   <sup>c</sup> 7:6 Yen 15:13-14; Eks 12:40   <sup>d</sup> 7:7 Eks 3:12   <sup>e</sup> 7:8 Yen 17:9-11   <sup>f</sup> 7:9 Yen 37:11, 28; 39:1-3, 21-23



dongua muruwo fuka di tongua akire di tome. Yosefe Isipi yai ori i kam Fero okom muromdi yoporam boiro te ka nokapu dungoro ena Fero kanere Yosefe kam akire dume. Fero yaromi Isipi man kiapanom bengua kokonan te nenen taikan muruwo kui nongua kokonan Yosefe tome.<sup>s</sup> <sup>11</sup>Kakom i meran ori wom Isipi akai te Keinan akai fuka dungoro ari yai opai ipun oriwom dongua fuka di erome. No awanoma kua kopuna wandouro kankeime.<sup>h</sup> <sup>12</sup>Ena 'Isipi man koi kua kopuna dumie,' dingoro Yakopo firo nonon awanoma koma wom ewi dome.<sup>i</sup> <sup>13</sup>Inako dere wingoro te okome tokoi ewi dungoro fingoro Yosefe 'Na ne yokama emenom moiye,' yokama di mari de erome. Te Yosefe nem te auwoma emerom yokamai moinga kam Fero ama fimie.<sup>j</sup> <sup>14</sup>Ena Yosefe nem uwom boiro 'Na moiki tei uwo!' di tongoro nem te ariyoma munmane epemere 75 dere Isipi man wime.<sup>k</sup> <sup>15</sup>Yosefe nem Yakopo u Isipi akai fure okome goingoro te wama yokama nonon awanoma moinga ama goingoro<sup>l</sup> <sup>16</sup>yokamai yono iro furo Sikem akai fime. Koma Aparam bei moiro Emo gama kongo erere Sikem akai tei imie. Ena no awanoma yono man i si ereime.<sup>m</sup> <sup>17</sup>Yai Gumam koma ka di koi eiro Aparam di tonguamere ena kam i mukom fanangua kakom unaro bengoro nonon arinama Isipi tei moinga munmane makire moime.<sup>n</sup> <sup>18</sup>Kakom i yai ori ta Isipi man kiapam bemie. Yaromi Yosefe taikan muruwo bengua kankero<sup>o</sup> <sup>19</sup>ena no awanoma gumanom bauwire bei niki de erero nonon awanoma gan kui einga goraro beinga 'Fiasi mena do!' di erome.<sup>p</sup> <sup>20</sup>Epe beingi kakom i mam Mose kui engoro ganom nokapu moime. Ena oparomi nenen ikom wam kui nongoro kapa suraiye fume.<sup>q</sup> <sup>21</sup>Fungoro fiasi mena de teingoro Fero apom gan i kanero iro furo nenen wam farere kui nongoro<sup>r</sup> <sup>22</sup>ena yokamai Mose Isipi ari mapunom kirawa si teingoro ka yoporam boiro diro te tai ta ta bengua ama yoporam boime. <sup>23</sup>Mose moi fungua okome non iki 40 gungoro ena 'Na fure na Isirae arinama Isipi tei moinga kanaiye,' di fire fure <sup>24</sup>kanungua Isipi yai ta bei moiro Isirae yai sungoro ena Mose fure ariyom akire di tero Isipi yai ta si goime. <sup>25</sup>Si goingua iran 'Na arinama akire di ereika yokama "Nonon akire di norowaro bengua i Yai Gumam na nawi dome," di firaime,' Mose epe di fimba ariyoma epe di fikeime. <sup>26</sup>Mose wi fairo koimoi arere tokoi fure kanungua Isirae ari surai kura boipikoro nomanenom towane einaro beipika Mose 'Ne surai arinama awom moipire. Nenen kura boipika i faikeme,' di eromba <sup>27</sup>yai nen emerom sungua Mose a sin boi tero mina wako tome, 'Ne kiapanom bei norenga te no ka kori dupunga ne finga eramom "Epe beyo!" di

<sup>s</sup> 7:10 Yen 41:37-44; Sam 105:21    <sup>h</sup> 7:11 Yen 41:54    <sup>i</sup> 7:12 Yen 42:1-5    <sup>j</sup> 7:13 Yen 45:1-5, 16    <sup>k</sup> 7:14 Yen 45:9-11; 46:27    <sup>l</sup> 7:15 Yen 46:1-7; 49:33    <sup>m</sup> 7:16 Yen 23:2-20; 33:19  
<sup>n</sup> 7:17 Eks 1:7    <sup>o</sup> 7:18 Eks 1:8    <sup>p</sup> 7:19 Eks 1:10-22    <sup>q</sup> 7:20 Eks 2:2; Ip 11:23    <sup>r</sup> 7:21 Eks 2:3-10

erome? <sup>28</sup>Te ongo ne Isipi yai si goingamere epe na nainano?’ epe diro mina wako tongoro<sup>s</sup> <sup>29</sup>Mose ka i firo tongi fure fu Mirian akai fure ari yokoi yai dairo okome wam surai kui eme.<sup>t</sup>

<sup>30</sup>Ena non iki 40 goungoro Mose ari moikeinga akaiyomdi tei wan moire Sinai kopu teina tei moingoro Ari Wanopanom nuwi kokonan gan fure eri gaingua dere baurom ungui tei fure fuka dume. <sup>31</sup>Mose tai fuka dunguai kanere gam nouro dire ‘Kanaro fuiye,’ dire u teina fungoro ena Ari Wanopanom ka di tome, <sup>32</sup>‘Ne awanuma Yai Gumam moiye. Aparam te Aisaki te Yakopo yokamai Yai Gumanom moiye,’ epe di tongoro Mose kuri fire tai kankeme. <sup>33</sup>Ena Ari Wanopanom ‘Ne akai arere moingai na akainam dungua iran ne kaunum tou ma do! <sup>34</sup>Na arinama Isipi tei moingai ganom kipi kokonan inga kaniye. Yokamai ama kai meinga fiye. Ena iran na ako mangi ure akire di erowaro wiye. Ena ne uwo! Na ne ewi Isipi akai dowaiye,’ tokoi di tome. <sup>35</sup>Ena, arinamao, na Sitiwin kanam duwaika fiyo! Koma Mose yaromi nenen Isirae ari yokamai mounom wako teime. Yokama ‘Eramom “No Isirae ari kiapanom bei noro! No ka kori dupunga fiyo!” epe di erome?’ diro mina wako teime. Ena okome Yai Gumam nenen Mose yaromi awi dongoro Isipi akai fure Isirae ari yokamai akire di erere kiapanom bei erome. Koma Mose kanungua Yai Gumam nuwi kokonan gan u eri gaingua dero baurom ungui tei ungua gan i ama furo Mose akire di tongoro epe beme.<sup>u</sup> <sup>36</sup>Te Mose Isirae ari yokamai enom dire Isipi man ma dere fume. Yaromi te ariyoma yokamai gere Isipi man tei moiro tei fui nuwi i kam Nuwi Kou teina tei moiro te ari moikeinga akaiyomdi tei moiro non iki 40 fungoro Mose tai ta ta ori te ari ganom nouro dinga tarom beme.<sup>v</sup> <sup>37</sup>Mose yaromi Isirae ari epe di erome, ‘Yai Gumam nawi donguamere epe nen ta ne yokamai arinom moingua gunom boire awi de erowangoro yaromi Yai Gumam ka mapunom di mari de erowame,’ di erome.<sup>w</sup> <sup>38</sup>Mose te Isirae ari gere ari moikeinga akai kuku boingoro ena Mose Sinai kopu moko fungua Yai Gumam nuwi kokonan gan ka di tongoro ka kakom kakom di derewo duwangua kam ire norome.<sup>x</sup> <sup>39</sup>Noromba no awanoma Mose kam dungua gore dikere mounom wako tere ‘Tokoi Isipi inako dero naro bepune,’ di fire<sup>y</sup> <sup>40</sup>Aron yaromi di teime, ‘Ne yai gumam kasu yai bei norengere Isipi kon opom di norowame. Mose yaromi no yokama Isipi tei no dire ure amai fume? No yokama kankepune,’ di teime. <sup>41</sup>Kakom i yokamai yai gumam kasu yai beingamere epe non burumakau gam kuiam ta beire ena non sipsip si goiro yai gumam kasu yai fi mun ei teinga kakom i yai gumam kasu yai kam akire di tere mun ori wom fi teime.<sup>z</sup> <sup>42</sup>Ena epe

<sup>s</sup> 7:23-28 Eks 2:11-15    <sup>t</sup> 7:29 Eks 2:21-22    <sup>u</sup> 7:30-35 Eks 3:1-10    <sup>v</sup> 7:36 Eks 7:3; 14:21; Nam 14:33    <sup>w</sup> 7:37 Diu 18:15; Ap 3:22    <sup>x</sup> 7:38 Eks 19:3; Diu 9:10; Ap 7:53    <sup>y</sup> 7:39 Nam 14:3    <sup>z</sup> 7:40-41 Eks 32:1-6

beinga iran Yai Gumam yaromi bei moiro yokamai mouwom wako erero bei moingoro ena yokamai aro te kapa te kui mokome ka make ei teime. Yokamai epe beinga ka mapunom ari yokama epemere ama munom boima fiyo!

Isirae ari yo, ne yokama ari moikeinga akai non iki 40 moiro non burumakau te sipsip te meme si goinga tarom fi mun ei na narekeime.<sup>a</sup> <sup>43</sup>Ne yokama Yai Gumam kasu i kam Moroko ire sel iki ikai eire ikirai kaure iro fime. Te ne yokamai Yai Gumam kasu ta i kam Refan kui mokome kuiam i a ki sime. Te ne yokamai Yai Gumam kasu surai kanom akire di erowaro beinga kuianom okonomdi beimie. Epe beinga iran na ne yokamai ekiro uro fakai wom ewi Bapiron koro tei dowaiye,

ka mapunom ari epe munom boime.

<sup>44</sup>Ena no awanoma ari moikeinga akai tei moingi Yai Gumam Mose 'Na sel iki opom di erowaikamere epe keyo!' di tonguamere epe beimie. Iki mora keingoro Yai Gumam ikai koi moiro ari yai ka di erome.<sup>b</sup> <sup>45</sup>Okome no awanoma bei moiro sel ikirai wanoma kui einga ereingoro yokamai ire kaure fime. Te Yai Gumam bei moiro mansinom tawa kapakom yokamai fiasi mena dongoro yokamai man ta fingoro ena no awanoma te yai Yasuwa gere man i imie. Yokama moi fure fure fure Dawiri yaromi kui engoro sel ikirai yo dume.<sup>c</sup> <sup>46</sup>Te Dawiri yaromi yai nokapu moingua Yai Gumam mun fi tongoro ena yaromi Yai Gumam ka epe mina wako tome, 'Na bei moiro ne Yakopo Yai Gumam moinga iran ka mapunom iki kei erowaiyo?' diro mina wako tome.<sup>d</sup> <sup>47</sup>Mina wako tomba Yai Gumam 'E e,' dungoro ena Dawiri wam Soromon ikirai Yai Gumam kei tome.<sup>e</sup> <sup>48</sup>Iki kamba kamundi Yai Ori ari iki keingi koi faikeme. Ka mapunom yai ka epe dunguamere i epe:

<sup>49-50</sup>Kamundi Ari Wanopanom i epe dume,

'Na kamundi moire ari kiapam beika iran na ame dere kamundi teme iwa moire na kaunam mansinom boromdi eiye. Te na man kamun muruwo bei eiye. Na epe moika tora iki kei narowaime? Te na amai ame dero iron moraiye?' dume.

Ka mapunom yai epe dume.<sup>f</sup>

<sup>51</sup>Ya, ne yokamai kou kou eime. Ne yokamai nomanenom fingamere epe Yai Gumam fi ki si tekeime. Te ne yokama Yai Gumam kam dungua kawom di fikeimie. Ne yokamai awanoma Murom Sumuna mounom wako teingamere ne yokamai ama mounom wako teimie.<sup>g</sup> <sup>52</sup>Te koma ne yokama awanoma fure ka mapunom yai towane bei niki de teimo?

<sup>a</sup> 7:42 Yer 19:13; Eim 5:25-27 <sup>b</sup> 7:44 Eks 25:8, 9, 40 <sup>c</sup> 7:45 Yos 3:14-17; 18:1 <sup>d</sup> 7:46 2 Sam 7:1-16; Sam 132:1-5 <sup>e</sup> 7:47 1 Kin 6:1, 14 <sup>f</sup> 7:48-50 Ais 66:1-2 <sup>g</sup> 7:51 Eks 32:9; Yer 9:26

E e, yokamai fure muruwo bei niki de ereime. Koma ka mapunom ari yokamai ‘Yai yo wom tongua unamie,’ di mari deingoro ne yokamai awanoma fure yokamai ama ei goime. Ena epena ne yokamai yai yo wom tongua irai imari dere si goimie.<sup>h</sup> <sup>53</sup>Te Yai Gumam kamundi nuwi kokonan gan yokamai uro ne yokamai ka di guwo dungua imari de ereimba ne yokama gore dikeimie,” Sitiwin ka epe dungoro<sup>i</sup> <sup>54</sup>kiapanom ari yokamai ka dungua fire u boi denom minom suna ipo de fingoro giranom ki guwo gawo dungoro niki ori wom de fi teime.<sup>j</sup> <sup>55</sup>Beimba Yai Gumam Murom Sumuna uro Sitiwin dem miriyom ikai koi si di tongoro ena toren kan kamundi dere kanungua Yai Gumam keranom sungua te Yesu Yai Gumam okomwomdi arere moimie.<sup>k</sup> <sup>56</sup>Epe kanungua ena “Kaniyo! Na kanika kamundi tei giram koingoro Ari Gaunom wam i Yai Gumam okomwomdi tei arere moime,” dungoro<sup>l</sup> <sup>57</sup>ena yokama au ori wom dire kinanom a fere koire ariro bu diro furo Sitiwin ako ki sire <sup>58</sup>fiasi iki birom ori mena deime. Ena yokamai suna gai kui sire ei kora gaima yai ta i kam Sauro moingui tei eingoro yaromi kiapam moimie. Ena yokamai kongo fiasi dere singoro<sup>m</sup> <sup>59</sup>Sitiwin ka make epe eme, “Yesu Ari Wanopanomyo, na kuianam iyo!” diro<sup>n</sup> <sup>60</sup>kauwom gurom boi moiro u boire “Ari Wanopanomyo, yokamai bianom i beinga mokom bai erekeiyo!” epe dire goime.<sup>o</sup>

**8** <sup>1</sup>Te yokamai Sitiwin si goingua Sauro “O” diro moime.<sup>p</sup>

### Sauro yaromi furo Yesu gama yokamai bei niki de erome

Ena kakom boromdi tei ari yai opai Yerusarem tei moinga Yesu fi ki si teinga yokamai ka kori di erero bei niki wom de ereingoro ena yokamai tongi Yuria akai te Samaria akai fimba ewi dongua finga yokamai towane Yerusarem tei moimie. <sup>2</sup>Te ari suwo Yai Gumam kam gore dinga yokamai ure Sitiwin ire fure kai ori wom mei tere man si teime. <sup>3</sup>Si teimba Sauro “Fi ki singa yokamai ei gounaro beiye,” di fire bei niki dere te u iki koro koro muruwo ikai fure yai opai muruwo gurere endire furo kan si erome.<sup>q</sup>

### Firipi yaromi fu Samaria akai tei furo ka mapunom di mari dome

<sup>4</sup>Ena fi kun dainga yokama tongi koro koro finga ka mapunom di mari deime. <sup>5</sup>Te yai Firipi fu Samaria akai fure iki birom ori ikai fure “Yesu i Mesia Yai Gumam awi dongua akire di norongua yai moime,” di mari de erome.<sup>r</sup> <sup>6</sup>Ena yai opai munmane Firipi kam fire te ari ganom nouro dinga tarom bengua kanere inokore eimie. <sup>7</sup>Firipi muronom niki deinga

<sup>h</sup> 7:52 2 Kro 36:16; Mt 23:31 <sup>i</sup> 7:53 Ap 7:38; Gar 3:19; Ip 2:2 <sup>j</sup> 7:54 Ap 5:33 <sup>k</sup> 7:55 Mt 22:44; Ap 2:33-34; 5:31 <sup>l</sup> 7:56 Kor 3:1 <sup>m</sup> 7:58 Ap 22:20 <sup>n</sup> 7:59 Sam 31:5; Lk 23:46 <sup>o</sup> 7:60 Lk 23:34 <sup>p</sup> 8:1 Ap 7:58; 8:4; 11:19 <sup>q</sup> 8:3 Ap 9:1, 13; 22:4; 26:9-11 <sup>r</sup> 8:5 Ap 6:5

yai opai ikai koi moingi ewi mena dongoro muronom au diro fime. Te ari kaunom goingua bo te kaunom niki dongua yokamai kon wanaro finga Firipi bei nokapu de erongoro kon nokapu wan fimie.<sup>s</sup> <sup>8</sup> Yaromi epe bengoro ena iran Samaria ari mirinom ori wom moko ime.

<sup>9</sup> Yai ta koma iki birom ori tei ure moime. Yaromi kam Saimon. Yaromi gene mane kanero tai mapunom mapunom bengoro Samaria ari ganom nouro dime. Ena yaromi “Na yai ori moiye,” dungoro <sup>10</sup> ari yai opai kanom wanungua bo kanom wankengua Saimon kam dungua fi kun daire “Yai Gumam yoporam boingua yaromi tongoro tarom i epe beme. Ena iran kamundi yai ori moime,” dime. <sup>11</sup> Te kakom kakom tai gene mane mapunom mapunom bungua iran yokamai ganom nouro dire dourom boime. <sup>12</sup> Te okome Firipi ure Yesu Kirisito kam mapunom te Yai Gumam kiapanom bei norowangua kam di mari de erongoro ena ari fi ki si tere yai opai nuwi buime. <sup>13</sup> Te Saimon nenen ama fi ki sire nuwi buiro Firipi mouwomdi koro koro fure kanungua Firipi tai ta ori ari ganom nouro dinga tarom bengoro inokore munmane eme.

<sup>14</sup> Ena Samaria ari Yai Gumam kam mapunom fi ki singoro Yesu ewi dongua finga yokama Yerusalem tei moinga kam wayom i fire Pita te Yoane surai ewi Samaria man tei deime. <sup>15</sup> Ena surai Samaria man tei fure “Fi ki singa yokamai Yai Gumam Murom inaimie,” diro surai ka make eipire. <sup>16</sup> Koma Samaria ari yokamai Yesu Ari Wanopanom fi ki si teingua nuwi buimba Murom Sumuna denom minom ikai koi kungoro ena iran epena yai surai ka make eire <sup>17</sup> okonom yokamai binomdi akopikoro Murom Sumuna denom minom ikai koi fume.<sup>t</sup>

<sup>18</sup> Ena Saimon yaromi kanongua ewi dongua finga yai surai okonom yokamai binomdi akopikoro yokamai Murom Sumuna i mora ingoro yaromi kongo ire fu surai moipiki tei uro <sup>19</sup> “Ya, ne yai surai yoporam boi narowaipikai na ari yokamai binomdi akonaikoro Murom Sumuna denom minom ikai koi inainga kongo erowaiye,” di erongoro <sup>20</sup> ena Pita, “Ne epe ‘Na tarom i Yai Gumam ari yo erongua kongo baraiye,’ di finga ena iran ne te ne kongonum guwom akai ama namie. <sup>21</sup> Yai Gumam kanongua ne nomanenum di fingai faikengua no ka mapunom kokonan bepunga ne ama beikenane.” <sup>22</sup> Ena iran ne nomanenum si awa tere tai niki dongua bei moinga ka make epe eyo! ‘O Ari Wanopanom, na bianam ta beire te na nomanenam di fika i ne kore de naro!’ diro ka make ei to! <sup>23</sup> Na di fika ne gikenga yai moire ne bianum fainga ne nomanenum goingoro dipanom ume,” Pita epe di tongoro <sup>24</sup> Saimon ka mokom bairo epe dume, “Ne surai kanom dinga fuka dikenaro bungua akire di narero Ari Wanopanom ka make ei teiro!” dume.

<sup>25</sup> Ena ewi dongua finga yai surai Pita te Yoane Ari Wanopanom taikan bei eronguamere epe imari dere te Ari Wanopanom ka mapunom di mari

<sup>s</sup> 8:7 Mt 10:1; Mk 16:17    <sup>t</sup> 8:17 Ap 9:17; 19:6; 1 Ti 1:6    <sup>u</sup> 8:21 Sam 78:37

depika ena inako dero Yerusarem tokoi fipire. Surai kon bakom fure Samaria iki ikai koro koro Yesu gunom kam di mari depire.

**Firipi furo Itiopia yai ta akiro di tongoro Yesu fi ki si tome**

<sup>26</sup>Ena Ari Wanopanom nuwi kokonan gan Firipi yaromi moingui tei ure “Ne arire u oropo koi fo! Ne fu konmori Yerusarem fungua konom i ma dere u oropo Gasa man tei fungua bakom tei fo!” di tome. Kon bakom ta ari moikeingi akai tei fume. <sup>27</sup>Ena Firipi arere fume. Te Itiopia yai ori kon bakom ta ume. Yaromi Itiopia akai kiapam bengua opai Kandusi kongom te guwai gaiyom kiapam beme. Yaromi koma “Yai Gumam kam akire di towaiye,” dire fu Yerusarem fure’ <sup>28</sup>te epena dero ikom akaiyom name. Yaromi non kosi kari gurongua fungua ikai koi moire ame dere ka mapunom yai Aisaiya munom boingua kerere fume. <sup>29</sup>Fungoro Yai Gumam Murom Firipi “Ne kari teina fure koi ama wan fo!” di tongoro” <sup>30</sup>ena Firipi bu di teina fure fungua yaromi Aisaiya ka mapunom boingua kere moingoro “Ne ka mapunom kerengai mapunom finbore fikene?” di tongoro ena <sup>31</sup>“Na mapunom toramere beiro firaiye? Nenta na mapunom di mari de narowangua firaiye. Ena iran ne ungere ama napune,” di tongoro Firipi fure kari ikai koi ama ame dere moime. <sup>32</sup>Koro yaromi Yai Gumam ka mapunom kerongui i epe:

Yokamai non sipsip suwaro iro wingamere epe yokamai yaromi iro ure sime. Te non sipsip gam wiyom go duwaro beinga ge dikenguamere epe yaromi kai meikeme.<sup>x</sup> <sup>33</sup>Yokamai yaromi kam ka sire ime de tere te ka kori nokapu di tekeime. Te yaromi mangi moingua gongua iran wama apoma kawom kui eikenname. Kui eikenangua iran nenta gama kam ari yai opai di erekename. ka mapunom epe dume. <sup>34</sup>Ena iran yai ori bei moiro Firipi epe di tome, “Ka mapunom yai munom boingua na kereikai nenen kam dumbore yai ta kam dumbore eramom kam dume? Di naro!” di tongoro <sup>35</sup>ena Firipi ka mapunom yaromi kerongua koro mapunom boiro diro Yesu ka mapunom di mari de tome. <sup>36</sup>Surai kon bakomdi fu moire nuwi akai tei wipikoro ena yai ori “Nuwi kano! Ne nuwi bui narowangai faimo?” di tongoro<sup>y</sup> <sup>37</sup>Firipi “Ne Yesu fi ki ori wom si towanga nuwi burane,” di tongoro “Na Yesu Yai Gumam wam moimia fi ki siye,” dire <sup>38</sup>ena “Kari si goro!” dungoro surai kari tei ma dere u mangi tei ure u nuwiri tei fure Firipi yaromi nuwi bui tome. <sup>39</sup>Te surai nuwiri tei ma dere u teme wipikoro ena Ari Wanopanom Murom Sumuna ure Firipi akire akai ta fungoro yai ori Firipi tokoi kankemba mun ori wom firo kon dourom boiro fume.<sup>z</sup> <sup>40</sup>Te Murom Sumuna Firipi akire fu iki birom ori Asoto fuka dume. Ena Firipi

<sup>y</sup> 8:27 Ais 56:3-7    <sup>w</sup> 8:29 Ap 10:19    <sup>x</sup> 8:32 Ais 53:7-8    <sup>y</sup> 8:36 Ap 10:47    <sup>z</sup> 8:39 1 Kin 18:12

Asoto ma dere kon bakom tei fure iki birom ori muruwo Yesu gunom kam di mari dero furo Sisaria akai ume.<sup>a</sup>

**Sauro yaromi nomanem si awa tome**

*Ap 22:4-16; 26:9-18*

**9** <sup>1</sup>Firipi kon bakom tei fure Yesu gunom kam di mari dongui ena Sauro Yerusarem tei moingua yoporam boiro diro “Ari Wanopanom gama yokamai ei goraiye,” diro fu fi mun ei teinga yai ori moingui tei fure<sup>b</sup> <sup>2</sup>epe di tome, “Na iki birom ori Damasusi fure yai opai Yesu konom wan finga yokamai kan si erero endire Yerusarem inako dero unaro beika ena ne munom ganom boiro Damasusi ka mapunom nuwi si ereinga iki muruwo kapakom awi de ero!” di tongoro <sup>3</sup>yaromi munom ganom boiro tongoro mangi fume. Ena Sauro Damasusi iki dungui teina tei ungoro kamundi kewa ta de Sauro moingui tei de tongoro <sup>4</sup>ena yaromi ako mangi fairo nokom fingoro “Sauro Sauro ne tora bengoro bei niki de narene?” ka i epe di tongoro <sup>5</sup>“Ari Wanopanomyo, ne eramom moine?” dungoro ka i epe mokom bairo “Na Yesu. Ne na bei niki de narenie.<sup>c</sup> <sup>6</sup>Narenba ne arere fu iki birom ori ikai tei fo! Okome yai ta ne kokonan benanga di erowame,” di tome. <sup>7</sup>Te ari Sauro gere ama winga yokamai arere moire ka dungua fimba yai ta kankeinga iran ka ta dikeime. <sup>8</sup>Ena Sauro arero okom murom fura domba tai ta ta muruwo kankengoro ena ari yokamai okom ako ire Damasusi tei fime. <sup>9</sup>Te Sauro okom murom yo si boi dere dungoro kua kopuna te nuwi ama nekengoro aro kakom suraiye fume.

<sup>10</sup>Ena Yesu gama yai ta Damasusi tei moingui kam i Anania. Ena yaromi kuwan kanongua Ari Wanopanom kam uwom boingoro “Ari Wanopanomyo, na moiye,” di tongoro <sup>11</sup>“Ne arere konmori ta i kam Yo Tongua tei fure yai ta i kam Yurasi ikom tei fure Tasisi yai ta i kam Sauro wandoure fo! Sauro yaromi ka make ei moire<sup>d</sup> <sup>12</sup>kuwan kanongua yai ta i kam Anania ure okom biromdi kopu tei akore okom murom tokoi bei nokapu de tome,” Yai Gumam epe di tongoro <sup>13</sup>ena Anania ka mokom bairo “Ari Wanopanomyo, ari munmane yaromi kam dingoro na fika yaromi ne ganuma yo teinga yokamai Yerusarem moinga tai niki dungua bei erome.<sup>e</sup> <sup>14</sup>Te yaromi ari yokamai ne kanum dainga yokamai kan si erowaro bengua ena fi mun ei teinga ari ori yoporam boi teingoro yaromi tawa ume,” epe di tongoro<sup>f</sup> <sup>15</sup>“Yaromi moingui tei ne fo! Na yaromi gunom boi tongoro ena i fure ari Yura ari moikeinga yokamai te ari ori yokamai te Isirae kapakom yokamai na kanam di mari de erowame.<sup>g</sup> <sup>16</sup>Te yaromi na kanam di mari dere gam kipi ori wom karangua opom

<sup>a</sup> 8:40 Ap 21:8   <sup>b</sup> 9:1 Ap 8:3   <sup>c</sup> 9:5 Ap 5:39; 1 Ko 15:8   <sup>d</sup> 9:11 Ap 21:39   <sup>e</sup> 9:13 Ap 8:3  
<sup>f</sup> 9:14 Ap 9:1-2, 21   <sup>g</sup> 9:15 Ap 25:23; 27:24; Ro 1:5

di towaiye,” Yai Gumam di tome.<sup>h</sup> <sup>17</sup>Ena iran Anania fure ikom ikai furo okom Sauro biromdi tei akoro “Na arinam, Sauroyo, Ari Wanopanom Yesu ne konmori tei umari funguarai nawi dongoro wiye. Ne okonum murom fura dere kaningoro Murom Sumuna ure ne denum minum ikai koi si duwaro bengua nawi dome,” di tongoro <sup>18</sup>ena taikan Sauro okom muromdi tei dunguai epemere nuwi kapu gam dunguai ako siro fungoro tokoi nokapu kanere ena arere nuwi buime. <sup>19</sup>Te Sauro kua kopuna nere yoporam boiro moime.

### Sauro Damasusi tei moiro Yesu gunom kam di mari dome

Ena Sauro aro kakom suwo moire Damasusi Yesu gama gere moingi tei ama moime. <sup>20</sup>Kakom i Sauro fu Yura ka mapunom nuwi si ereinga iki muruwo tei fure “Yesu yaromi Yai Gumam wam moime,” di mari dongoro <sup>21</sup>ari yai opai muruwo kam fire inokore munmane eiro ka epe dime, “Yaromi ari Yerusarem tei moinga yokama Yesu kam dainga yokamai bei niki de erome. Te yaromi Damasusi Yesu gama yokamai kan siro endiro fi mun ei teinga ari ori moingi tei naro bengua tawa ume,” dime.<sup>i</sup> <sup>22</sup>Dimba Sauro ka mapunom di mari dongua yoporam boiro “Yesu yaromi kawom Yai Gumam awi dongua akire di norongua yai Mesia moimie,” diro i mari dongoro Yura ari Damasusi tei kei fainga yokamai kanom i iwe dongoro te Sauro kam dunguai moko teme iwa fume.<sup>j</sup>

<sup>23</sup>Ena aro kakom munmane gongoro Yura ari yokamai kuku boiro “Sauro si gorapune,” dime.<sup>k</sup> <sup>24</sup>Dimba Sauro si gorapune kam wayom fimie. Te kamun takongua kakom te kama sungua kakom yokamai yaromi si goraro beinga iki birom ori kira kori kiapam beimba <sup>25</sup>giruwangua kakom Sauro mouwomdi finga yokamai akire fure kouma gai ori dungui gai ikai tei gire gai koyom kan koire iki birom ori kira arari singi munomdi teme tei mena deingoro Sauro ariro fume.<sup>l</sup>

### Sauro Yerusarem tei fume

<sup>26</sup>Ena Sauro fu Yerusarem tei furo “Yesu gama ama kuku borapune,” di fimba Yesu gama “Sauro ama Yesu gama moime,” diro fi kun daikere kuri fime.<sup>m</sup> <sup>27</sup>Ari muruwo kuri fimba yai Banapasi akire di tere Sauro ire Yesu ewi dongua finga yokamai moingi tei fure “Sauro konmori bakom tei fure Yesu Ari Wanopanom kanongoro te Ari Wanopanom Sauro ka di tongoro ena Damasusi tei fure kuri fikere Yesu yoporam boinguamom i iro kam di mari dome,” epe di erome.<sup>n</sup> <sup>28</sup>Ena iran kakom kakom Sauro Yesu gama gere moime. Yaromi kuri fikere iki birom ori Yerusarem tei yo arowa tere wanere Ari Wanopanom yoporam boinguamom i iro kam di mari

<sup>h</sup> 9:16 2 Ko 11:23-28    <sup>i</sup> 9:21 Ap 8:3; 9:14    <sup>j</sup> 9:22 Ap 17:3; 18:5, 28    <sup>k</sup> 9:23 Ap 23:12

<sup>l</sup> 9:25 2 Ko 11:32-33    <sup>m</sup> 9:26 Gar 1:17-19    <sup>n</sup> 9:27 Ap 9:4; 9:20; 1 Ko 15:8



dere <sup>29</sup>te Yura ari Giriki kam dingai yokamai ka di erere te ka di ipo ka de erongoro ena yokamai “Yaromi si gorapune,” di fime. <sup>30</sup>Yesu gama ka wayom i finga Sauro akire fu Sisaria fure awi Tasisi akai tei deingoro fume.<sup>o</sup>

<sup>31</sup>Ena Yesu fi ki si teinga yokamai Yuria man tei moinga te Gariri man tei moinga te Samaria man tei moinga yokamai nokapu moingoro ari yokamai bei niki de erekeime. Te Yai Gumam Murom Yesu gama yokamai akire di erere yoporam boi erongoro yokamai Ari Wanopanom kam akire di tere munmane umari fime.

**Pita furo yai Iniasa te opai Dokosa surai  
akire di erongoro u nokapu fipire**

<sup>32</sup>Ena Pita yaromi Yesu gama yo teinga yokamai kanaro koro koro muruwo furo ena okome u Yesu gama Lira man moingi tei uro moime. <sup>33</sup>Moiro kanungua yai ta moime. Yaromi kam Inia. Yaromi kauwom koro koro goingua maniki wankere boiri wi towane fai moingoro ena non iki okonom koro muruwo te koro suraiye fungoro <sup>34</sup>ena Pita yaromi “Iniao, Yesu Kirisito ne bei nokapu de eromie. Ena ne arere boinum bei kun daro!” di tongoro ena kene kene eiro arerome.<sup>p</sup> <sup>35</sup>Lira ari te Saron ari muruwo yaromi nokapu moingua kanere nomanenom si awa tere Ari Wanopanom fi ki si teimie.

<sup>36</sup>Ena Yesu gama opai ta iki birom ori Yopa tei kei faime. Oparomi kam i Tapita. Dumba oparomi kam ta Giriki ka i Doka. Kakom kakom oparomi kokonan nokapu beire te ari guwai gainom ako nekeinga yokamai akire di erome. <sup>37</sup>Kakom i oparomi nupi fairo goingoro ari oparomi gam bi sire iki munomdi keingi teme tei eime. <sup>38</sup>Ena iki birom ori Yopa i teina tei Lira akai dungua iran Yesu gama ka finga “Pita Lira tei moimie,” dingoro ena ari surai ewi deingoro fure yana di tepire, “Ne no yokama moipungi tei bei moikere kua uwo!” di tepikoro <sup>39</sup>Pita arere yai surai i gere ama fime. Ena iki tei wingoro yokamai Pita akire iki munomdi keingi teme tei fingero ena opai werai yokamai Pita moingui teina tei ure kai meire gai suna te oropo gai Doka bei erongua opom di teime. <sup>40</sup>Opom di teimba Pita ari yai opai muruwo ewi mena dero ena kauwom gurom boiro ka make eiro te awa tere opai gam dinom kanere “Tapitao, ariyo!” di tongoro oparomi okom murom fura dero Pita kanero arero ame dongoro<sup>q</sup> <sup>41</sup>ena Pita okom akore wiyom yaungoro oparomi arome. Ena Pita Yesu gama yo teinga yokamai te opai werai yokamai unom boingoro ure kaninga oparomi yokori moime. <sup>42</sup>Ena iran ari yai opai muruwo Yopa tei kei fainga ka wayom i fire munmane Ari Wanopanom fi ki si teime. <sup>43</sup>Te Yopa man tei yai ta kei faime. Yaromi

<sup>o</sup> 9:30 Ap 11:25; Gar 1:21    <sup>p</sup> 9:34 Yo 5:8-9    <sup>q</sup> 9:40 Mk 5:40-41

kam i Saimon. Te yaromi non burumakau gam dinom fiki beinga mapunom firo kokonan ime. Te aro kakom munmane Pita yai Saimon ikom tei ama moimie.<sup>r</sup>

**Yai Gumam nuwi kokonan gan ta u Koniria moingui tei uro ka di tome**

**10** <sup>1</sup>Ena yai ta Sisaria man tei kei faime. Yaromi kam i Koniria. Yaromi bei moiro kiminem Itari man garom boinga yokamai 100 kiapanom bei erome. <sup>2</sup>Yaromi te ari yaromi ikomdi tei towane fainga yokamai gere Yai Gumam ka mapunom a ki sire kam akire di teime. Te yaromi furo Yura ari tai ako nekeinga yokamai tai munmane akire di erere te kakom kakom ka make eme. <sup>3</sup>Ena kakom ta aro u oropo taro fungoro kuwan epemere kanongua Yai Gumam nuwi kokonan gan ikai ure uwom boingoro<sup>s</sup> <sup>4</sup>yaromi toren kanere kuri fire “Yae, ta beme?” di tongoro nuwi kokonan gan ta mokom bairo “Ne ka make ei tenga te ari yai opai guwai gainom ako nekeinga yokamai taikan akire di erenga Yai Gumam kanere mun ori wom fi erome.” <sup>5</sup>Ena epenai ne ari suwo koropane ewi Yopa iwa dengere fure yai ta i kam Saimon Pita uwom boraime. <sup>6</sup>Yai dom Saimon yaromi non burumakau gam dinom fiki beinga mapunom firo kokonan iro te fui nuwi bunamdi tei kei faingoro Saimon Pita ama tei moime,” epe di tongoro<sup>u</sup> <sup>7</sup>ena nuwi kokonan gan mora fu dongoro Koniria nenen kiminem ta Yai Gumam ka mapunom ama a ki sungua te nenen nuwi kokonan gan surai unom boiro <sup>8</sup>taikan muruwo fuka dungua di erere ewi iki birom ori Yopa tei dome.

### **Pita kuwan kanume**

#### *Ap 11:4-10*

<sup>9</sup>Ena yokama fure kon bamdi tei faire koimoiri arere tokoi fure fu iki birom ori Yopa teina tei fingoro aro oromene kakom Pita “Ka make enaiye,” dire iki birom kopu tei fume. <sup>10</sup>Yaromi iki birom kopu moire meran goiro “Kua nowaye,” di fimba ari yokamai kua yo kenom bei moingoro ena Pita kuwan epemere kanere <sup>11</sup>epe kanongua kamun giram koingoro ena gai ori wom onamdi koro koro ako ingai ma dere ako mangi ume. <sup>12</sup>Te gairi ikai koi non kei mapunom mapunom muruwo moinga te onopa moinga te kapuka ama moimie. <sup>13</sup>Kanongoro nokom ka dume, “Pitao, arere tai si kei no!” epe di tongoro <sup>14</sup>“Ari Wanopanomyo, Na ‘Nemane!’ diye. Yokamai kapu i ‘Nemane,’ dingoro ena koma na nekeiye,” dungoro<sup>v</sup> <sup>15</sup>ena ka ta tokoi di tome, “Yai Gumam ‘Ne nowanga i faime,’ duwangua ne ‘Nemane,’ dikeyo!” di tome.” <sup>16</sup>Tarom i kakom suraiye u mari fungoro gai ori wom i moko kamundi iwa tokoi fu dome.

<sup>r</sup> 9:43 Ap 10:6   <sup>s</sup> 10:3 Ap 9:10   <sup>t</sup> 10:4 Rew 8:4   <sup>u</sup> 10:6 Ap 9:43   <sup>v</sup> 10:14 Lew 11:1-47; Esi 4:14   <sup>w</sup> 10:15 Mk 7:15, 19

<sup>17</sup>Ena Pita inokore munmane eire “Kuwan kanikai mapunom i tora dume,” inokore epe ei moingoro ena ari Koniria ewi dongua mina wako erere Saimon ikom dungui tei kam fire kakom boromdi uro kori gumamdi tei arero <sup>18</sup>u boire, “Saimon Pita yaromi tawa moimbore moikeme?” dime.

<sup>19</sup>Ena Pita kuwan kanonguai inokore ei moingoro Yai Gumam Murom bei moiro epe di tome. “Yae, ari suraiye uro ne wandou wimie.<sup>x</sup> <sup>20</sup>Ena iran ne arere oropo fure yokamai ama fiyo! Ne inokore munmane eikeyo! Nanan yokamai ewi deikoro wime,” di tongoro <sup>21</sup>ena Pita u oropo fure “Ne yokama yai wandou wingai na moiye. Ta bengoro wime?” di erongoro <sup>22</sup>yokamai epe dime, “Koniria yaromi kiminem 100 kiapanom bengua yaromi nowi dongoro upune. Yaromi nokapu wom moire te Yai Gumam kam akire di tongoro Yura ari muruwo yaromi mun fi teime. Ena epena Yai Gumam nuwi kokonan gan yo tongua u yaromi moingui tei ure ‘Ne Pita uwom boro! Yaromi ne ikinumdi tei ure kam duwangua firo!’ epe di tome,” ari suraiye Pita epe di teingoro<sup>y</sup> <sup>23</sup>“Ne yokamai ikai wiyo!” di erongoro kopuna nere wi faime.

**Pita fu Koniria ikomdi tei furo Yai Gumam  
gunom kam di mari de erome**

Ena koimoi yokamai arere kon bakom tei fime. Te Yopa fi ki singa ari suwo koropane ama fime. <sup>24</sup>Yokamai kon wan fure kama sungoro kon bam tei faire koimoi arere tokoi fure iki birom ori Sisaria tei wingoro te Koniria kiapam bei moime. Yaromi ariyoma te yokoi ei nongua yokamai unom boiro kuku boiro Pita kiapam moimie. <sup>25</sup>Pita ikai naro bengoro Koniria u Pita moingui tei uro kauwomdi tei gome dero kam akire di tomba <sup>26</sup>Pita urom yau arero “Ne ariyo! Na mangi yai ama moiye,” di tome.<sup>z</sup> <sup>27</sup>Pita ka di moiro ikai furo kanongua yai opai munmane kuku boire moime. <sup>28</sup>Ena Pita ari yokamai epe di erome, “Yura ari fure ari bam ta ari moraingi suna tei morainga faikeme. Yokamai ‘Nemane,’ dingoro ne yokama mora kanime. Epe dumba Yai Gumam na ‘Ari bam ta niki dongua moingoro na suna moraika faikeme,’ dikenaya opom di narome. <sup>29</sup>Ena iran ne yokamai ‘Uwo!’ di nareinga na inokore eikere wiye. Ena ta bengoro ‘Uwo!’ di nareime?” di erome.

<sup>30</sup>Ena Koniria ka epe dume, “Tai na moiki tei fuka dunguai ena epena aro kakom suwo ire suwo ire goumie. Te tai fuka dunguai epe: Kakom aro u oropo taro fungoro na ikinam ikai moiro ka make ei moikoro ena yai ta gaiyom kan i keranom sungua gumanamdi tei arere <sup>31</sup>‘Koniria, ne ka make enga Yai Gumam mora fime. Te ne ari tai ako nekeinga yokamai akire di erenga ama kanumie. <sup>32</sup>Ena iran ne ari ewi iki birom

<sup>x</sup> 10:19 Ap 11:12; 13:2    <sup>y</sup> 10:22 Ap 10:1-2    <sup>z</sup> 10:25-26 Ap 14:13-15; Rew 19:10

ori Yopa tei dengere fure yai ta i kam Saimon Pita uwom boraimie. Yaromi dom Saimon non burumakau gam dinom fiki beinga mapunom firo kokonan iro te fui nuwi bunamdi tei kei faingoro ena Saimon Pita ama tei moime,' epe di narongoro <sup>33</sup>ena na kene kene eiro ari 'Yaromi uwom boiyo!' di erere ewi ne moingi tei dere ena ne tawa unga mun fiye. Te epena nonon muruwo uro Yai Gumam okom muromdi moipunie. Ena iran ka muruwo Yai Gumam ne di eronguamere epe di norengere firapune," epe dume.

<sup>34</sup>Epe dungoro ena Pita ka epe dume, "Yai Gumam 'Ari yai opai kounom kounom moimie,' di fingua epena na kaniye.<sup>a</sup> <sup>35</sup>Ari suwo koropane man man moinga tai mapunom yo tongua beire te Yai Gumam kam akire di teinga yokamai Yai Gumam 'Arirai nokapu moimie,' dume. <sup>36</sup>Ena ne yokama mora ka finga Yai Gumam no Isirae ari ka epe di norome, 'Yesu Kirisito yaromi ari muruwo Ari Wanopanom moingua iran yaromi kam mapunom "Ari muruwo wira di moraimie," epe di mari dome,' di norome.<sup>b</sup> <sup>37</sup>Te ne yokama tai ta fuka dungua ama finga koma Yoane yaromi 'Ne yokamai nuwi buiyo!' di mari dongoro ena okome Yesu kam wayom fu Gariri man man fure te Yuria man man ama fume.<sup>c</sup> <sup>38</sup>Te ne yokamai tai i ama finga Yai Gumam Yesu Nasreti yai Murom Sumuna tere te yoporam boingua tongoro yaromi fure kokonan beiro ari yokamai Satan bei niki dungua de erongua yokamai bei nokapu de erongoro nokapu moime. Yaromi Yai Gumam gere moipika epe beme.<sup>d</sup> <sup>39</sup>Ena no yokamai taikan muruwo yaromi Yura ari mansinomdi moire te iki birom ori Yerusarem moire bengua kanupune. Yokamai yaromi eri yoro bakomdi eire si goimba <sup>40</sup>aro kakom suraiye gongua Yai Gumam wiyom yaungoro arongoro imari domie.<sup>e</sup> <sup>41</sup>Imari domba ari muruwo yaromi kankeime. Tamanumie. No yokamai suwo koropane yaromi kanupune. Koma Yai Gumam 'Yokamai kanere di mari dowaimie,' dire nonon gunom boingoro ena Yesu tokoi arirongua no yokamai kua kopuna te nuwi yaromi ama nopunie.<sup>f</sup> <sup>42</sup>No yaromi gere ama nopunga kakom tei yaromi 'Ne yokamai ari yai opai ka epe di mari de ereiyo! "Yai Gumam na gunom boi narongoro ena na ari yokori moinga muruwo te ari mora goinga muruwo ka kori di erere ipu suwaiye," di ereiyo!' di norome.<sup>g</sup> <sup>43</sup>Te ka mapunom ari muruwo yaromi kam di mari dere 'Ari yokamai yaromi fi ki si towainga Yai Gumam Yesu kokonan bengua di fire ari yokamai bianom faingua kore dowame,' epe dime," Pita epe dume.<sup>h</sup>

<sup>a</sup> 10:34 1 Sam 16:7; Ro 2:11; Gar 2:6    <sup>b</sup> 10:36 Ais 52:7; Ef 2:13-14; Rew 17:14    <sup>c</sup> 10:37 Mt 4:12-17    <sup>d</sup> 10:38 Mt 3:16; Lk 4:17-20    <sup>e</sup> 10:40 1 Ko 15:4-7    <sup>f</sup> 10:41 Yo 14:19, 22-24; 15:27; Ap 1:8; Lk 24:42-43    <sup>g</sup> 10:42 Ap 17:31; 2 Ti 4:1; 1 Pi 4:5    <sup>h</sup> 10:43 Ais 53:5-6; Yer 31:34; Dan 9:24

**Ari Yura ari moikeinga yokamai Murom Sumuna endi imie**

<sup>44</sup>Pita ka i yo di moingoro ena Yai Gumam Murom Sumuna ako uro ari muruwo ka i fi moingi denom minom ikai koi si di erongoro<sup>i</sup> <sup>45-46</sup>yokamai ka kapo kapo dire te Yai Gumam kam akire di teinga iran Yura yokama Yesu fi ki singa te Pita ama wingai mora fingai Yai Gumam ari Yura ari moikeinga yokamai Murom Sumuna ama eromie. Ena iran Yura ari yokamai ganom nouro dime.<sup>j</sup> <sup>47</sup>Ena Pita epe dume, “No yokamai Yai Gumam Murom ipungamere epe yokamai ama imie. Inga iran na nuwi bui erowaika yai ta ‘E e,’ duwangua faikeme.<sup>k</sup> <sup>48</sup>Ena ne yokama Yesu Kirisito kam boromdi ari tei moinga nuwi bui ereiyoi!” epe di erongoro nuwi buime. Ena Koniria ariyoma gere Pita “Ne aro kakom suwo koropane ama tei moro!” di teime.<sup>l</sup>

**Pita furo Yai Gumam gama Yerusarem tei moinga yokamai tai fuka di tongua tarom di mari de erome**

*Ap 10:9-23*

**11** <sup>1</sup>Ena Yesu ewi dongua finga yokamai te Yesu gama ta Yuria koro koro moinga yokamai ka finga ari Yura ari moikeinga yokamai Yai Gumam kam fi ki sime. <sup>2</sup>Yokamai epe fire ena Pita Yerusarem tei ungua Yura ari Yesu fi ki si teinga yokamai kura kam di tere <sup>3</sup>“Ne ari bam ta ikom ikai fure kua kopuna ama nenie. Tai mapunom i faikeme,” epe di teingoro<sup>m</sup> <sup>4</sup>ena Pita tai ta muruwo fuka di tongua di mari dome. Tai ta kou si eikeme. <sup>5</sup>Pita epe dume, “Na iki birom ori Yopa tei moika ka make ei moire na kuwan epemere kanika tai i epemere gai ori wom onamdi koro koro ako inga kamundi ma dere ako mangi ure na moiki tei ume. <sup>6</sup>Ena na gairi ikai koi toren kanikai non kei mapunom mapunom muruwo moiro te onopa moiro te kapuka ama moimie. <sup>7</sup>Na mora kanikai ka i epe di narome, ‘Pitao, arere si kei no!’ di naromba <sup>8</sup>‘Ari Wanopanomyo, na “Nemane,” diye. Koma yokamai kapu i ‘Nemane,’ dingoro ena kakom kakom na nekeiye,’ dikoro <sup>9</sup>ena ka ta tokoi di narome, ‘Yai Gumam “Tai ne nowanga i faime,” duwangua ne “Nemane” dikeyoi!’ epe di narome. <sup>10</sup>Tarom i kakom suraiye u mari fungoro ena gairai kamundi iwa tokoi fu dome. <sup>11</sup>Kakom boromdi ari suraiye u na moiki ikom tei wime. <sup>12</sup>Ena Yai Gumam Murom Sumuna ‘Ne inokore munmane eikere yokamai ne gere fiyo!’ di narongoro ena na Yesu gama okonom koro muruwo koro towane tawa moingi endire fure Koniria ikom ikai fupune. <sup>13</sup>Fupungoro yaromi ‘Na kanika Yai Gumam nuwi kokonan gan u na ikinam ure “Yae, ne ari suwo koropane ewi Yopa tei dengere

<sup>i</sup> 10:44 Ap 11:15; 15:8    <sup>j</sup> 10:46 Ap 2:4; 19:6    <sup>k</sup> 10:47 Ap 8:36    <sup>l</sup> 10:48 Ap 2:38; Mt 28:19  
<sup>m</sup> 11:3 Ap 10:28; Gar 2:12

fure Saimon Pita yaromi uwom boraimē.<sup>n</sup> <sup>14</sup>Yaromi unangua ka suwo di erowangoro ena Yai Gumam ne te ne arinuma akire di erowangoro ne yokamai moi kuwom suwainga akaiyomdi tei moraimē,” epe di narome,’ Koniria epe di norome.<sup>o</sup> <sup>15</sup>Ena na ka i fire ka mapunom koro mapunom boiro dikoro Murom Sumuna koma no denom minom ikai koi funguamere epe yokamai denom minom ikai koi fume.<sup>p</sup> <sup>16</sup>I kai koi fungua na nomane fika koma Ari Wanopanom ka epe dume, ‘Yoane yaromi nuwi wom sumuna ari bui eromba Yai Gumam Murom Sumuna erowangoro ne yokamai inaimie,’ epe dume.<sup>q</sup> <sup>17</sup>Ena iran no Ari Wanopanom Yesu Kirisito fi ki si topunga Yai Gumam Murom noronguamere epe yokamai ama erongua na Yai Gumam konom si fere dowaika faikeme. Na yai gawo moika si fere dekenaiye,” Pita epe dungoro <sup>18</sup>yokamai ka i finga ena niki de finga mora goume. Goungoro yokamai Yai Gumam kam akire di tere epe dime, “Ari Yura ari moikeinga yokamai nomane si awa tere kakom kakom moi kuwom suwainga inaimē. Yai Gumam epe bei erome,” dime.<sup>r</sup>

**Yai Gumam gama Andiako tei moinga  
yokamai kokonanom nokapu beime**

<sup>19</sup>Koma Sitiwin yaromi goingua kakom tai ipun ori wom dongua fi ki singa ari fuka di erongua ena ari tongi koro koro fime. Yokamai finga ari suwo Fonisia man tei fingoro te suwo Saipasi man tei fingoro te suwo iki birom ori Andiako tei fime. Ena yokama fure Yai Gumam gunom kam ari Yura ari moikeinga yokamai di mari de erekeime. Tamanumie. Yokamai Yura ari towane di ereime.<sup>s</sup> <sup>20</sup>Di ereimba Saipasi ari koropane te Sairini ari koropane fu iki birom ori Andiako tei fure Ari Wanopanom Yesu gunom kam ari Yura ari moikeinga yokamai di mari de ereingoro <sup>21</sup>Ari Wanopanom yoporam boi erongoro ena iran ari yai opai munmane fi ki sire Ari Wanopanom dourom boime.<sup>t</sup>

<sup>22</sup>Ena yokamai epe dourom boingoro Yesu fi ki si teinga yokamai Yerusalem tei moinga ka i fire Banapasi awi Andiako tei deingoro<sup>u</sup> <sup>23</sup>yaromi furo kanongua Yai Gumam bei nokapu de erongoro mun fire “Ne yokamai kakom kakom Ari Wanopanom kam gore diyo!” di erome.<sup>v</sup> <sup>24</sup>Te Banapasi yaromi yai nokapu moingoro te Yai Gumam Murom yaromi dem miriyom ikai koi si di tongoro yaromi Yai Gumam fi ki ori wom si tome. Yaromi epe moingua iran ari yai opai munmane Ari Wanopanom fi ki si teime.<sup>w</sup>

<sup>25</sup>Ena Banapasi dere fu iki birom ori Tasisi tei fure Sauro wandou fume.<sup>x</sup> <sup>26</sup>Ena yaromi wandouro kanere akire inako dero Andiako tei

---

<sup>n</sup> 11:13 Ap 10:23, 45    <sup>o</sup> 11:14 Ap 16:31    <sup>p</sup> 11:15 Ap 2:4    <sup>q</sup> 11:16 Ap 1:5    <sup>r</sup> 11:18 Ap 13:48; 14:27    <sup>s</sup> 11:19 Ap 8:1-4    <sup>t</sup> 11:21 Ap 2:41    <sup>u</sup> 11:22 Ap 4:36    <sup>v</sup> 11:23 Ap 13:43; 14:22    <sup>w</sup> 11:24 Ap 2:41    <sup>x</sup> 11:25 Ap 9:30

ume. Ena yai surai non iki towane moiro ari yai opai Andiako moinga ka mapunom nuwi si erepire. Te ari Andiako moinga yokamai suwo koropane mapunom boiro epe dime, “Ari Yesu fi ki si teinga yokamai Kirisito gama moime,” dime.

<sup>27</sup>Ena kakom tei ka mapunom ari suwo Yerusarem ma dere fu Andiako tei wime.<sup>y</sup> <sup>28</sup>Wingoro ena ka mapunom yai ta i kam Akapu arere suna tei moingoro Yai Gumam Murom yoporam boi tongoro ena yaromi epe di mari dome, “Meran ori wom man man fuka duwame,” epe dume. Ena iran yaromi ka dunguamere yai ori Koriasi man man kiapanom bengua kakom i meran i epe fuka dume.<sup>z</sup> <sup>29</sup>Ena meran fuka dungua Yesu gama Andiako moinga kuku boire ka di ipo ka dere, “Nonon towane towane guwai gainom ako nopungamere epe nonon arinoma Yuria moingi tei erowapune,” dire<sup>a</sup> <sup>30</sup>ena tai ta ta Banapasi te Sauro ereingoro yai surai ire fu Yerusarem fure Yesu gama kiapanom bei ereinga ari erepire.<sup>b</sup>

**Yai Gumam nuwi kokonan gan ta uro Pita kan  
iki moingui tei awi mena de tome**

**12** <sup>1</sup>Ena kakom tei gaman yai ori Eroti Yesu fi ki si teinga yokamai suwo bei niki di erero <sup>2</sup>te ama bei moiro kiminem yai ta “Ne furo Yoane auwom Yemesi akire di kupa furaki ire si goro!” epe di tongoro ena si goime.<sup>c</sup> <sup>3</sup>Eroti epe beire kanongua Yura ari mun fingoro ena Pita ama kan si tome. Yaromi Yura ari kaime dori bum dikengua neinga kakom i epe beme.<sup>d</sup> <sup>4</sup>Ena yokamai Pita kan si teinga iro furo kan iki de tere kiminem 16 yokamai “Yaromi kiapam beiyo!” di ereingoro ena suwo ire suwo ire ipu sire kakom kakom kiapam bei moimie. Te Eroti epe di fime, “Yura ari ‘Komariki no awanoma Isipi tei moinga Yai Gumam eikeme,’ di finga iron kakom mora gounangoro Pita ire fu Yura ari moingi tei fure ka kori di towaiye,” epe di fime. <sup>5</sup>Yaromi epe di fingu Pita kan iki tei faingoro te Yesu fi ki si teinga yokamai Yai Gumam ka make ei teingamere epe “Pita akire di to!” diro ka make ei teime.<sup>e</sup>

<sup>6</sup>Ena Eroti Pita akire ka kori di towaro bengua kakom i ongo giruwangua Pita kiminem surai moipiki suna tei faime. Te yokamai kan sen okom koro koro koingoro te kan iki kori gumamdi tei kiminem surai kiapam moipire.<sup>f</sup> <sup>7</sup>Ena Ari Wanopanom nuwi kokonan gan ta u kan iki ungoro kewa ikai dongoro te Pita kipam akore wiyom yauro “Ne kene kene eire aro!” di tongoro ena kan sen okomdi forau sire ako sume.<sup>g</sup> <sup>8</sup>Ako sungoro ena gan Pita epe di tome, “Ne non gam fi dere te kaunum tou eyo!” di tongoro Pita epe bengoro ka ta “Gai suna fire mounamdi uwo!”

<sup>y</sup> 11:27 Ap 13:1; 15:32    <sup>z</sup> 11:28 Ap 21:10    <sup>a</sup> 11:29 Ro 15:26    <sup>b</sup> 11:30 Ap 12:25    <sup>c</sup> 12:2 Mt 4:21    <sup>d</sup> 12:3 Ap 4:3; Eks 23:15    <sup>e</sup> 12:5 Ef 6:18; Yem 5:16    <sup>f</sup> 12:6 Ap 5:23    <sup>g</sup> 12:7 Ap 5:19; 16:26

di tongoro <sup>9</sup>ena Pita gan mouwomdi fure kan ikom ma domba Pita nuwi kokonan gan tai bei tongua fikeme. Yaromi “Na kuwan kaniye,” di fime. <sup>10</sup>Ena wan fipika surai kiminem yai towane kirako beire fure kiminem yai ta kirako beire fu kira ain kori gumamdi mena naro beingi tei ure kori gumam nenen opa boingua ena yai surai u mena ure konmori tei fipikoro kene kene eire nuwi kokonan gan Pita ma de tero fu dome.<sup>h</sup> <sup>11</sup>Fu dongoro ena Pita fore de firo “Epena na mora kaniye. Eroti te Yura ari bei niki de narowaimba Ari Wanopanom nuwi kokonan gan awi dongoro na moiki tei ure naikire fume,” epe di fime. <sup>12</sup>Pita epe mora inokore eire fu Maria oparomi Yoane Mako mam moingua ikom fume. Ikomdi tei ari munmane kuku boire ka make ei moime.<sup>i</sup> <sup>13</sup>Ena Pita ure ikom mena moiro kori gumamdi gure dungoro ena kokonan opai i kam Rota ure “Kori yaunaiye,” diro ure <sup>14</sup>Pita nokom firo dem miriyom koi mun ori wom firo kori yaukere bu di ikai furo yokamai moingi tei furo “Pita i kori gumamdi arere moime,” di erongoro <sup>15</sup>ena “Ne du dine,” di teimba oparom yoporam boiro “Ma do! Kawom yaromi moime,” di erongoro “Ma do! Yaromi kuiam uro moime,” di teime.<sup>j</sup> <sup>16</sup>Dimba Pita kori gumamdi gure di moingoro ena yokama kori yauro kanere ganom nouro dime. <sup>17</sup>Ena yokamai ka dikenaro beinga Pita okom akire diro Ari Wanopanom yaromi akire kan iki ma dere mena ungua kam mora di mari dere “Ne yokamai kam i Yoane auwom Yemesi dom te Yesu gama ama di ereiyo!” di erere dere akai ta fume.<sup>k</sup> <sup>18</sup>Ena okome kamun takongua Pita moikengua kiminem yokamai ganom nouro dire “Pita amai fume?” diro inokore eime.<sup>l</sup> <sup>19</sup>Te Eroti “Ne yokamai wandou kaniyo!” dungoro yokamai wandouimba yaromi kankeime. Yokamai yaromi kankeinga iran Eroti kiminem yokamai ka kori di erere “Ei goiyo!” dungoro ei goime. Ena Eroti Yuria man ma dero fu Sisaria tei moime.

### Eroti yaromi mora goime

<sup>20</sup>Ena koma Eroti Taiya te Sairon ari yai opai yokamai kianom bei erome. Ena yokama kuku boire fu Eroti kanaro fime. Te koma yokama yai ta i kam Barasita di teime. Yaromi Eroti ikom kiapam bei moime. Ena yokamai te Barasita gere ka di ipo ka dere yaromi akire di erowangua kam nomane towane eingoro ena Taiya te Sairon ari fu Eroti moingui tei fure “No ne arinuma tai woinga kongo meina baipunga iran nonon te ne yokamai nomane towane ei morapune,” di teime. <sup>21</sup>Te okome yaromi yokamai kanom mokom bai erowangua kakom ungua Eroti gai nokapu wom fire yai ori boiyomdi tei ame dere ka arari yokamai di erongoro <sup>22</sup>ena yokamai au dire “Yaromi ari ka dingamere dikeme. Yaromi ka

<sup>h</sup> 12:10 Ap 5:19    <sup>i</sup> 12:12 Ap 12:25; 15:37    <sup>j</sup> 12:15 Ap 26:24; Mt 18:10    <sup>k</sup> 12:17 Ap 12:7-8

<sup>l</sup> 12:18 Ap 5:22-24



dungua kamundi yai moimie,” epe dimie. <sup>23</sup>Te ari yokamai ka epe dinga Eroti Yai Gumam kam akire dikengua ena boromdi Ari Wanopanom nuwi kokonan gan ure yaromi sungoro ena simin dem miriyom ikai koi kaingoro goime.

<sup>24</sup>Ena Yai Gumam kam yoporam boiro man man muruwo fume.<sup>m</sup>

<sup>25</sup>Te Banapasi te Sauro surai Yerusarem akai tei moire kokonanom beipika mora gougoro ena surai Yoane Mako ire inako dere fu iki birom ori Andiako tei fipire.

**Yesu gama Andiako tei moinga yokamai bei moiro  
Banapasi te Sauro yai surai ewi deime**

**13** <sup>1</sup>Ena ka mapunom ari te ka nuwi si ereinga ari Yesu fi ki si teinga yokamai Andiako moingi suna tei moime. Yokamai kanom i epe: Banapasi te Simiyon yaromi kam ta i Naisa te Sairini yai ta i kam Lusiasa te Sauro te Maneyan yaromi yai ori Eroti kounom kounom surai moipire.<sup>n</sup> <sup>2</sup>Te yokamai Ari Wanopanom kam akire di towaro beinga kua kopuna moi teingoro ena Yai Gumam Murom “Na Banapasi te Sauro kokonan erowaika iran ne yokamai yai surai gunom boi ereiyoi!” di erongoro<sup>o</sup> <sup>3</sup>ena iran yokamai ka make enaro beinga kopuna moi tere ka make eire okonom ei yai surai binom kopu dere ewi deingoro fipire.<sup>p</sup>

**Banapasi te Sauro yai surai fu Saipasi man moirom bei engui tei fipire**

<sup>4</sup>Ena Murom Sumuna Banapasi te Sauro yai surai ewi dongoro surai fure ako fu Serusia tei fure nuwi kopare endingoro nuwi boromdi fure fu Saipasi man moirom bei engui tei fipire.<sup>q</sup> <sup>5</sup>Ena surai u iki birom ori Saramasu ure Yura ari ka nuwi si ereinga iki muruwo ikai fure Yai Gumam gunom kam di mari depire. Te Yoane Mako ama fure yai surai akire di erome.<sup>r</sup>

<sup>6</sup>Ena yai surai Saipasi man koro koro wan fure ena okome u iki birom ori Pafoso ure tei moiro Yura yai ta gumanom boime. Yaromi kam i Bayesu. Yaromi gene mane mapunom kanere te ka mapunom kasu bengua yai ama moime. <sup>7</sup>Te Bayesu yaromi man tei kiapam bengua yai ori akire di tome. Yai ori yaromi kam i Sesia Porusu. Yai ori i nomane nokapu wom fai tongoro ena “Yai Gumam kam firaiye,” dire Banapasi te Sauro surai unom boime. <sup>8</sup>Te gene mane mapunom kanongua yaromi i kam Bayesu te yaromi Giriki kam i Eraima. Ena yaromi ure “Yai ori fi kun daikenname,” diro yai surai bire ime de ere moimba<sup>s</sup> <sup>9</sup>Yai Gumam Murom Sauro yaromi kam ta i Pauro dem miriyom si di tongoro yaromi Eraima toren kanere <sup>10</sup>“Ne Satan wam moine. Te taikan yo tongua

<sup>m</sup> 12:24 Ais 55:11; Ap 6:7; 19:20    <sup>n</sup> 13:1 Ap 11:27    <sup>o</sup> 13:2 Ap 9:15    <sup>p</sup> 13:3 Ap 6:6

<sup>q</sup> 13:4 Ap 15:39    <sup>r</sup> 13:5 Ap 12:12, 25; 13:13    <sup>s</sup> 13:8 2 Ti 3:8

muwuwo ne kianum fai te moinie. Te ne kasu dine. Ne ari gumanom ama bauwine. Te ne Ari Wanopanom konom bei niki denie.<sup>t</sup> <sup>11</sup>Ena ne fi moro! Epena Ari Wanopanom ne einangoro okonom murom gi duwangoro kakom suwo koropane ne aro kankenanie,” epe dungoro ena Eraima okom muromdi kama sire gi dungoro yaromi “Yai kon mori opom duwame,” dire fu unanan furo yai wandouro fume.<sup>u</sup> <sup>12</sup>Ena man kiapam bengua yai ori tarom i kanere Yai Gumam fi ki si tome. Te yaromi yai surai Ari Wanopanom kam di mari depika fire gam nouro dume.

**Pauro te Banapasi surai Andiako tei fipikoro  
Pauro gunom kam di mari dome**

<sup>13</sup>Ena Pauro te ari koiro waninga yokamai iki birom ori Pafoso dere nuwi kopare endire nuwi boromdi fure iki birom ori Peka wime. Ari fai koro koro deingoro te iki birom ori Peka i Pambiria man suna tei dumie. Te yokamai tei fingoro ena Yoane ema dere inako dere Yerusarem tei fume.<sup>v</sup> <sup>14</sup>Ena yokamai iki birom ori Peka ma dere fu iki birom ori Andiako fime. Ari fai koro koro deingoro te Andiako i Pisiria man suna tei dume. Ena Yura ari iron kakom ungoro yokamai Yura ari ka nuwi si ereinga iki ikai koi fure ame dere moime. <sup>15</sup>Yokamai Mose kam boingua te ka mapunom ari kam boinga mora kereinga ena Yura ari ka nuwi si ereinga iki ari ori awi Pauro te ariyoma moingi tei dere “Arinamao, ne yokama ari yai opai nomanenom yoporam boi erowangua kam duwainga ena ne yokamai diyo!” epe di ereime.<sup>w</sup>

<sup>16</sup>Ena Pauro arere okom akire diro, “Isirae ari yo, te ne yokamai Yura ari moikeimba Yai Gumam kam akire di teinga ne yokamai na ka duwaika fiyo!<sup>x</sup> <sup>17</sup>No Isirae ari Yai Gumanom no awanoma gunom boi erongoro yokamai Isipi tei moinga munmane kui eime. Ena Yai Gumam yoporam boiro yokamai endire mansinom i ma dere ume.<sup>y</sup> <sup>18</sup>Yokamai fure ari moikeinga akaiyomdi tei wan finga non iki 40 i deime. Te yokamai tai niki dongua beimba Yai Gumam yokamai gere ama wan fime.<sup>z</sup> <sup>19</sup>Ena Yai Gumam bei moiro ari Keinan man bunam koro koro tei moinga okonom koro muruwo koro surai yokamai ei gouru mansinom i yokamai erongoro ime.<sup>a</sup> <sup>20</sup>Te non iki munmane epemere 450 gougoro ena ari ipu einga yokama fuka dire moi fure moi fingoro ena ka mapunom yai Samue fuka dume.<sup>b</sup> <sup>21</sup>Kakom i no awanoma ‘No yai ori inapune,’ dingoro ena Yai Gumam Kisu wam Sauro erongoro yaromi non iki 40 ari yai opai kiapanom yai moime. Yaromi Bensamin yai moimie.<sup>c</sup> <sup>22</sup>Te Yai Gumam Sauro yaromi ma de tere ena yai ori ta i kam Dawiri kiapam bengua

---

<sup>t</sup> 13:10 Yo 8:44   <sup>u</sup> 13:11 Ap 9:8   <sup>v</sup> 13:13 Ap 13:5; 15:38   <sup>w</sup> 13:15 Ap 15:21   <sup>x</sup> 13:16 Ap 12:17   <sup>y</sup> 13:17 Eks 1:7; 6:6; 12:51   <sup>z</sup> 13:18 Eks 16:35; Nam 14:34; Diu 1:31   <sup>a</sup> 13:19 Diu 7:1; Yos 14:1   <sup>b</sup> 13:20 1 Sam 3:20   <sup>c</sup> 13:21 1 Sam 8:5, 19; 10:20-24

kokonan tome. Yaromi kiapam bengua ena Yai Gumam epe dume, ‘Na mora kanika Yesi wam Dawiri na denam minam koi mun kaniye. Yaromi na kanam dika dourom boime,’ epe dire<sup>d</sup> 23 Dawiri yaromi gama yai ta i kam Yesu awi dongoro yaromi no Isirae ari akire di norowame. Koma Yai Gumam ka di koi eiro ‘Epe benaiye,’ dungua epena mukom faime.<sup>e</sup> 24 Te Yesu ako mangi unangua kakom teina ungoro Yoane koma ure Isirae ari ka epe di erome: ‘Ne yokamai bianom faingua nomanenom si awa tere nuwi buiyo!’ di mari de erongoro<sup>f</sup> 25 ena Yoane kokonan i gounaro bengoro ‘Ne yokamai na eramom moime di fi nareime? Ne yokama “Na Mesia moime,” di fi nareimo? Yaromi na moikeiye. Yaromi nenen okome uname. Na yaromi kauwom tou kanom forau si dowaika na yaromi kounom moikeiye,’ epe di erome.<sup>g</sup>

26 Ena, arinamao, ne yokamai Aparam gama moinga te ne ari Yura ari moikeinga Yai Gumam kam akire di teinga yokamao, Yai Gumam akire di norere nokapu morapunga kam i di norome. 27 Di noromba ari yokamai Yerusarem kei fainga te yokamai arinoma mokoinga yokamai Yesu mapunom fikeime. Yokamai Yura ari iron kakom kakom ka mapunom ari kanom boinga kereimba yaromi mapunom fikeime. Fikere Yesu si goinga yokamai ‘O’ dingoro ena iran ka mapunom ari kanom mora mukom faime.<sup>h</sup> 28 Te yokamai yaromi si gorainga mapunom wandou fimba mapunom kankeimie. Ena yokamai yai Pairoti ‘Ne yaromi si gorano?’ di fi teingoro ‘O’ diro yaromi si goime.<sup>i</sup> 29 Ena ka mapunom Yesu kam boi teingamere epe mukom faingoro yokamai Yesu eri yoro bakomdi i mangi dero yono einga akaiyom tei man si teime.<sup>j</sup> 30 Si teimba Yai Gumam yono manomdi wiyom yaungoro arirome.<sup>k</sup> 31 Ena aro kakom suwo munmane Yesu nenen imari dongoro ari yokamai yaromi gere Gariri man ma dero Yerusarem ama finga ekanime. Te epena yokamai Yesu arirongua kaningai Isirae ari di mari de ereime.<sup>l</sup>

32-33 Ena no yokama Yesu ka mapunom di eropunie. Ka i epe: Yai Gumam Yesu goingua akire di tongoro arome. Tarom i Yai Gumam no awanoma ka di koi eiro di eronguamere epe mukom faingoro no awanoma gama kanupune. Te koma Yai Gumam dunguamere epe kam akire di teinga wi dinga pepam giwi surai boime.<sup>m</sup>

Ne na wanam moinie. Te epena aro kakom na ne aunum moiye.

34 Te Yai Gumam yaromi yono manamdi wiyom yaungoro arirongua gam dinom buikenangua Yai Gumam dunguamere boime:

‘Na Dawiri yaromi bei nokapu de towaiye,’ diro ka di koi eikamere epe na ama ne erowaiye.<sup>n</sup>

<sup>d</sup> 13:22 1 Sam 13:14; 16:13; Sam 89:20    <sup>e</sup> 13:23 2 Sam 7:12-16; Ais 11:1    <sup>f</sup> 13:24 Mt 3:1-2

<sup>g</sup> 13:25 Yo 1:20, 27    <sup>h</sup> 13:27 Yo 16:3; Ap 3:17    <sup>i</sup> 13:28 Mt 27:22-23    <sup>j</sup> 13:29 Mt 27:59-60

<sup>k</sup> 13:30 Ap 2:24    <sup>l</sup> 13:31 Ap 1:3, 8    <sup>m</sup> 13:33 Sam 2:7    <sup>n</sup> 13:34 Ais 55:3

35 Te Yai Gumam kam akire di teinga wi dinga pepam ta i epe boime:  
 Yai Gumam yo tongua yaromi ‘Yae, ne ganum dinom buikename,’  
 epe diro di guwo di tomie.

Ka i boingua Dawiri kam dikeme.<sup>o</sup> 36 Yai Gumam Dawiri kokonan  
 tongoro kokonanom gongua yaromi goingoro awoma teina tei man si  
 teingoro gam buime.<sup>p</sup> 37 Buimba Mesia yaromi goingua Yai Gumam akire  
 di tongoro arongua gam dinom buikeme. 38 Ena arinamao, fiyo! Yesu  
 nenen moingua ‘Ne bianom faingua Yai Gumam kore dowame,’ di mari  
 de erowaiye.<sup>q</sup> 39 Yai Gumam bei moiro ari yai opai Yesu fi ki si teinga  
 yokamai ‘Ne yokamai yo tere moime,’ di erowame. Te Mose ka di guwo  
 dungua kam i yo tongua mapunom ari bei erekename.<sup>r</sup> 40 Ena iran ne  
 yokamai kiapam moiyo! Kiapam moikenainga ka mapunom ari dinga  
 tarom i ne yokamai fuka di erowame.<sup>s</sup> 41 Ka mapunom ari epe dime:

Ne yokamai ka mapunom kam ka singa yokamai fiyo! Ne yokamai  
 mangi moingi yai ta na kokonan benaika imari de erowamba ne  
 yokamai fi kun daikenaime. Enau ne yokamai ganom nouro dire  
 goraimie.

Ka mapunom ari epe boime,” Pauro epe di erome.

42 Ena Pauro te Banapasi yai surai mena naro beipikoro ari yai opai  
 “Ya, iron kakom ta ne surai inako dero ka i tokoi di mari de noro!” epe  
 dime. 43 Yokamai Yura ari ka nuwi si ereinga iki ikai koi kuku boinga  
 koro koro fingoro ena Yura ari munmane te ari Yura ari moikeimba Yura  
 ka mapunom fi ki singa yokami munmane yai surai mounomdi fime. Ena  
 te Yai Gumam bei nokapu de erongua yokamai nokapu moinga yai surai  
 ka di erere te di yoporam boi erepire.<sup>t</sup>

44 Ena iron kakom tokoi ungua ari yai opai muruwo iki birom ori kei fainga  
 yokamai uro Yai Gumam ka mapunom firaro kuku boime. 45 Ena Yura ari  
 kaninga ari munmane wom uro kuku boingoro yokamai denom minom niki  
 de firo “Pauro yaromi kasu dume,” diro kura kam di tere moimie.<sup>u</sup> 46 Iran  
 Pauro te Banapasi kuri fikere ka yoporam boire, “No yokamai Yai Gumam  
 kam i koma di eropunga faimba ne yokama no kanom dipika mounom wako  
 teinga moi kuwom suwainga akaiyomdi tei morainga ikenaina nenen moingi  
 faingua iran no surai ne yokamai ma dere ari Yura ari moikeinga yokamai  
 moingi tei napuiye.<sup>v</sup> 47 Ari Wanopanom epe di go di norome,

Na ‘Ari yai opai man man muruwo moinga akire di erowaika nokapu  
 moraimie,’ diro na ne surai ewi dowaikoro ne surai furo ari ka di  
 mari de erowaipire. Ne surai epe benaipika ena ari kewa gaingoro  
 dero kon bau boingumere epe ne surai moraipire,

<sup>o</sup> 13:35 Sam 16:10; Ap 2:27    <sup>p</sup> 13:36 Ap 2:29    <sup>q</sup> 13:38 Ap 10:43    <sup>r</sup> 13:39 Ro 10:4

<sup>s</sup> 13:40 Hap 1:5    <sup>t</sup> 13:43 Ap 11:23; 14:22    <sup>u</sup> 13:45 Ap 14:2; 17:5    <sup>v</sup> 13:46 Ap 3:26; Lk  
 7:30; Ap 18:6

Yai Gumam epe di norome,” yai surai epe dipire.<sup>w</sup> 48Ena ari Yura ari moikeinga yokamai ka i fire mun ori wom fire te Ari Wanopanom kam dungua ama mun fi teime. Te Yai Gumam ari yai opai gunom boi erongoro kakom kakom moi kuwom suwainga akaiyomdi tei morainga yokamai fi ki sime.<sup>x</sup>

49Ena Ari Wanopanom kam i man man koi muruwo fume. 50Ka i fumba Yura ari yokamai ure opai mokoinga yokamai Yai Gumam kam akire di teinga te iki birom ori ari mokoinga yokamai ka di ereingoro yokamai fure Pauro te Banapasi surai bei niki de erere ewi ikinomdi mena de ereime. 51Epe beimba yai surai bei moiro “Nuwi mena deinga yokamai mapunom niki dongua bei moinga firaima,” diro kaunom tou kuwan bengua towa towa kei dere ena fu iki birom ori Aikoniam tei fipire.<sup>y</sup> 52Surai fimba Yesu gama yokamai Andiako tei moinga mun ori wom fingoro te Yai Gumam Murom ari yokamai denom minom si di erome.

#### Pauro te Banapasi iki birom ori Aikoniam tei fipire

**14** 1Ena ari yokamai beingamere epe Aikoniam tei ama beime. Surai Yura ka nuwi si ereinga iki tei furo ka mapunom yoporam boiro dipikoro ena Yura ari munmane te ari Yura ari moikeinga yokamai munmane fi ki simba 2Yura ari “No Yesu fi ki si tekenapune,” dinga yokamai moiro ari Yura ari moikeinga yokamai Yesu gama bei niki de erowaro beinga kinanom sime.<sup>z</sup> 3Te yokamai yai surai bei niki de ereimba kakom arari surai Aikoniam tei moiro ka yoporam boiro di erere “Ari Wanopanom bei nokapu de erowame,” epe dipikoro ena Yai Gumam akire di erongoro surai tai ta ta ori beipikoro ari yai opai ganom nouro dire “Surai ka dipikai kawom dipire,” dime.<sup>a</sup> 4Ena iran ari yai opai iki birom ori tei moinga fou surai eire koropane Yura ari nomane towane eingoro te koropane Yesu ewi dongua finga yai surai nomane towane eime.

5Ena Yura ari te Yura ari kiapam beinga yokamai te ari Yura ari moikeinga yokamai surai bei niki de erere te kongo kupa ire “Yai surai ei gorapune,” di fingoro<sup>b</sup> 6ena surai ka wayom fire tongi fu Laikoniam akai tei fipire. Te surai iki birom ori Lisita fure te iki birom ori Deripi ama fure te man koro koro bunamdi ama furo<sup>c</sup> 7ena surai Yesu gunom kam ari akai tei moinga yokamai di mari de erepire.

#### Pauro te Banapasi yai surai furo Lisita te Deripi tei moipire

8Ena iki birom ori Lisita tei yai ta moime. Yaromi kauwom koro koro goime. Yaromi mam kui engua kakom kauwom ama goingoro ena kon

<sup>w</sup> 13:47 Ais 49:6    <sup>x</sup> 13:48 Ap 11:18    <sup>y</sup> 13:51 Mt 10:14; Ap 18:6    <sup>z</sup> 14:2 Ap 13:45

<sup>a</sup> 14:3 Mk 16:20; Ap 19:11; Ip 2:4    <sup>b</sup> 14:5 Ap 14:19; 2 Ti 3:11    <sup>c</sup> 14:6 Mt 10:23

wankere kakom kakom iron moime.<sup>d</sup> <sup>9</sup>Te yaromi Pauro ka dungua fingoro Pauro kanungua yaromi “Yai Gumam akire di narowangua na nokapu moraiye,” di fingoro ena Pauro toren kanere<sup>e</sup> <sup>10</sup>ka yoporam boiro epe di tome: “Epena ne kaunum erowai towame. Ario!” di tongoro ena yaromi kene kene eire arere kon wanume. <sup>11</sup>Ena ari yai opai munmane Pauro tai benguai kanere nenen Laiconia kanom epe u boire “No yai gumanom yai surai Su te Emeiso ako mangi ure no moipungi tawa upire,” dire<sup>f</sup> <sup>12</sup>te Banapasi yaromi kam ta Su di eire te Pauro ka di mari dongua yai moingua iran kam ta Emeiso di eime. <sup>13</sup>Ena yai gumam ta i kam Su ka mapunom ikom iki birom ori dungui bunamdi tei dumie. Te Su ka mapunom iki kiapam yai non burumakau moko koropane iro te faruwa weiro kera giyom beiro iro u iki birom ori kira kipi kori keingi tei bunamdi ume. Ena ka mapunom iki kiapam yai te ari yokamai gere “No yokamai kapu si keiro yai gumam yai surai fi mun erowapune,” dimba <sup>14</sup>Yesu ewi dongua finga yai surai ka i fire kuianom boikeingoro gainom suna bai dire bu dire u ari yai opai moingi suna tei ure u boire dipire. <sup>15</sup>“Yae, tora bengoro ne yokama tai epe beimie? Ne yokamai ari moingamere no surai ama epe moipuiye. Te no surai ure ka mapunom ne yokamai di mari de eropuiye. Ena ne yokamai tai niki dongua ma dere awa tere Yai Gumam yokori moingua yaromi moingui tei wiyoi! Yaromi kamun te man te fui nuwi bei eire te tai mapunom mapunom ikai tei moingua ama bei emie.”<sup>g</sup> <sup>16</sup>Te ari yai opai koma makire moinga nenen mapunom dourom boire waninga Yai Gumam ‘I faime,’ dumba<sup>h</sup> <sup>17</sup>yaromi tai ta ta nokapu bengua ‘Na Yai Gumam moiye,’ opom di erome. Nokapu tarom bengua i epe: Nimi sungoro tai woinga mokongoro ne yokamai nere marenom mokongua denom minom mun ori wom fime,” yai surai epe dire<sup>i</sup> <sup>18</sup>te ne mane di moiro di moipikoro yokamai “Tai fi mun eire yai surai erowapune,” diro di fimba ma deime.

<sup>19</sup>Ena yai surai akai tei moipikoro Yura ari suwo iki birom ori Andiako te iki birom ori Aikoniam ma dere u tei ure ari yai opai nomanenom gure koro deingoro yokamai nomanenom Pauro niki ori wom de fi teime. Ena yokamai kongo kupa iro Pauro sire “Yaromi goime,” di fire gurere iki birom ori mena fiasi deimba<sup>j</sup> <sup>20</sup>Yesu gama ure wanapo de suna de tere kaningai Pauro tokoi arero fu iki birom ori ikai koi fume. Ena yokamai fairo koimoi arirongoro Pauro te Banapasi gere fu Deripi tei fipire.

#### **Pauro te Banapasi yai surai inako dero fu Andiako tei tokoi fipire**

<sup>21</sup>Ena surai iki birom ori Deripi tei moiro Yesu gunom kam di mari depikoro ena ari yai opai munmane fi kun daire Yesu gama fuka dime.

<sup>d</sup> 14:8 Ap 3:2    <sup>e</sup> 14:9 Mt 9:28; Ap 3:4    <sup>f</sup> 14:11 Ap 28:6    <sup>g</sup> 14:15 Sam 146:6; Ap 17:24

<sup>h</sup> 14:16 Ap 17:30    <sup>i</sup> 14:17 Sam 147:8; Ro 1:19-20    <sup>j</sup> 14:19 Ap 17:13; 2 Ko 11:25; 2 Ti 3:11

Ena yai surai inako dero fu Lisita akai fure te Aikoniam akai fure te Andiako akai i suna tei Pisiria man dungui tei fipire.<sup>k</sup> <sup>22</sup> Surai fure Yesu gama yokamai nomanenom bei erowai towaro beinga ka di erere te “Ne yokamai yoporam boire fi ki sire moiyo! No fu Yai Gumam no kiapanom bei norowangua akai ikai koi naro benapungai no ganom kipi kaingua inapunie,” epe ama dipire.<sup>l</sup> <sup>23</sup> Ena yai surai ka mapunom iki koro koro dungui tei furo ari mokoinga Yesu fi ki si teinga yokamai kiapanom bei ereinga yokamai gunom boi erere ena kopuna moi tere ka make eiro “O, Ari Wanopanomyo, yokamai fi ki si ereinga iran kiapanom bei ero!” diro yokamai okonomdi tei ereipire.<sup>m</sup>

<sup>24</sup> Ena yai surai dere wan Pisiria man suna tei furo ena fu Pambiria tei upire. <sup>25</sup> Te surai Peka man tei ka mapunom mora di mari depika ako Ateria tei fure <sup>26</sup> nuwi kopare endire dere nuwi boromdi wan fure u Andiako akai tei wipire. Te koma surai naro beipika kakom tei Yesu gama yokamai Yai Gumam ka make ei teime. “O Yai Gumam, yai surai ne gunum kanum kokonan benaro beipika bei nokapu de ero!” diro ka make ei teime. Ena epena kokonan i goungoro ena surai inako dero<sup>n</sup> <sup>27</sup> u Andiako uro Yesu fi ki si teinga yokamai unom boipikoro yokamai kuku boingoro ena surai taikan muruwo Yai Gumam akire di erongoro beipika te Yai Gumam ari Yura ari moikeinga yokamai fi ki singa konom opon di erongua kam di mari depire.<sup>o</sup> <sup>28</sup> Ena kakom arari yai surai te Yesu gama Andiako tei moinga yokamai gere moime.

### Yai Gumam gama munmane Yerusarem tei kuku boime

**15** <sup>1</sup> Ena ari suwo koropane Yuria akai ma dere u Andiako tei ure Yesu gama ka di ere moime. Yokamai ka epe dime, “Mose mapunom dunguamere epe ari ganom guwo dikenainga Yai Gumam akire di erekenangoro yokamai moi kuwom suwainga ikenaimie,” epe dingoro<sup>p</sup> <sup>2</sup> Pauro te Banapasi ka i fire kura kam di erere kura tokomere yokamai boi erepikoro ena yokamai bei moiro yai surai te ari suwo gere ewi Yerusarem deingoro yokamai fure Yesu ewi dongua finga yokamai te ari mokoinga Yesu gama kiapanom bei ereinga yokamai moingi tei fure ari ganom go duwainga kam duwaro beimie.<sup>q</sup> <sup>3</sup> Ena Yesu fi ki si teinga yokamai bei moiro ewi deingoro ena yokamai fu Fonisia man tei wan fure te Samaria man suna tei wan fure ari Yura ari moikeinga yokamai nomane si awa tere fi ki singa kam wayom di mari deingoro ena Yesu fi ki si teinga akai tei moinga yokamai ka i fire mun ori wom fime. <sup>4</sup> Te yokamai dere u Yerusarem tei wingoro ena Yesu fi ki si teinga yokamai iro te Yesu ewi dongua finga yokamai iro te ari mokoinga Yesu gama

<sup>k</sup> 14:21 Mt 28:19 <sup>l</sup> 14:22 Ap 11:23; 15:32; 18:23; 1 Te 3:3; 2 Ti 3:12 <sup>m</sup> 14:23 Ap 13:3

<sup>n</sup> 14:26 Ap 13:1-2 <sup>o</sup> 14:27 Ap 15:4, 12; 11:18 <sup>p</sup> 15:1 Gar 5:2 <sup>q</sup> 15:2 Ap 11:30; Gar 2:1-2

kiapanom bei ereinga yokamai bei moiro yokamai okonom akoime. Ena Pauro te Banapasi surai taikan muruwo Yai Gumam akire di erongoro beipika kam di mari de erepire.<sup>r</sup> <sup>5</sup>Di mari de erepikoro ena Feresi ari suwo koropane Yesu fi ki si teinga yokamai arere epe dime: “Yae, ari Yura ari moikeinga yokamai ganom guwo dire Mose ka di guwo dungua gore dowaiinga i faname,” epe dingoro <sup>6</sup>ena Yesu ewi dungua finga yokamai te ari mokoinga Yesu gama kiapanom bei ereinga yokamai ure Feresi ari ka dinga di ipo ka duwaro kuku boime.

<sup>7</sup>Ena ari munmane mora ka di ipo ka deinga Pita yaromi arere ka epe dume: “Arinamao, nonon komari Yesu fi ki si topunga Yai Gumam na gunom boi narongoro ena na fure ari Yura ari moikeinga yokamai Yesu gunom kam di mari de ereikoro fi ki si teime.<sup>s</sup> <sup>8</sup>Te no yokamai Yai Gumam Murom Sumuna ipungamere ari Yura ari moikeinga yokamai ama epe ingoro ena no yokamai mora kanupunga Yai Gumam ari yai opai nomanenom ikai koi firo kanongua yaromi bei moiro ari Yura ari moikeinga Yesu fi ki si teinga yokamai ama ekukurome.<sup>t</sup> <sup>9</sup>Te Yai Gumam ka ta ama dume, ‘No Yura ari te ari Yura ari moikeinga yokamai kounom kounom moimie,’ dungoro ena ari Yura ari moikeinga yokamai fi ki singoro Yai Gumam yokamai nomanenom nokapu erome. <sup>10</sup>Ena iran ta bengoro ne yokamai Yai Gumam gumam bauwime? Ne yokamai ganom go dinga kam epe dinga ne yokamai fi ki singa yokamai tai ipun dungua kipanomdi ereingoro te koma no awanoma yokamai te nonon ama tarom i ipun dungua kawiro fupunga faikeme.<sup>u</sup> <sup>11</sup>I faikemba no epe di fipunga Ari Wanopanom Yesu nonon bei nokapu de norongoro Yai Gumam akire di norome. Ena iran Yai Gumam akire di noronguamere ari Yura ari moikeinga yokamai epe akire di erome,” Pita epe dungoro<sup>v</sup> <sup>12</sup>ena Pauro te Banapasi arere Yai Gumam akire di erongua yai surai fu ari Yura ari moikeinga yokamai moingi tei fure tai ta ta ori beire te ari ganom nouro dinga tarom ama beipika kam di erepikoro ari yokamai kuku boinga ka i firo ka mokom baikeime.

<sup>13</sup>Ena yai surai kanom mora goungoro Yemesi yaromi ka epe dume: “Arinamao, na ka duwaro beika fiyo! <sup>14</sup>Saimon yaromi Yai Gumam koma ari Yura ari moikeinga suwo koropane gunom boingoro ariyoma fuka dinga kam wayom epe di norome. <sup>15</sup>Te tarom i epe fuka dungua te ka mapunom ari kanom i kam towane dume. Koma ka mapunom ari yokamai epe boime:<sup>x</sup>

<sup>16</sup>Ari Wanopanom epe dume, ‘Okome na inako dere unaiye. Unaike iki gui dunguamere epe Dawiri gama epe gui di deime. Ena iki tokoi bei nokapu deingamere epe na Dawiri gama tokoi bei nokapu de

---

<sup>r</sup> 15:4 Ap 14:27   <sup>s</sup> 15:7 Ap 10:1-43   <sup>t</sup> 15:8 Ap 10:44; 11:15   <sup>u</sup> 15:10 Mt 11:30; Gar 3:10; 5:1   <sup>v</sup> 15:11 Gar 2:16; Ef 2:5-8   <sup>w</sup> 15:11 Ap 14:27   <sup>x</sup> 15:15 Eim 9:11-12



erowaiye. <sup>17</sup>Na Dawiri gama epe bei nokapu de erowaika ena iran ari yai opai muruwo na Ari Wanopanom wandou naime. Te ari Yura ari moikeinga yokamai na gunom boi de ereika yokamai na arinama moinga yokamai unam boraimie.’ <sup>18</sup>Yai Gumam koma ka epe diro di mari dongua te epena yaromi ka epemere tokoi dume. <sup>19</sup>Ena, arinamao, nonon bei moiro ari Yura ari moikeinga yokamai nomanenom si awa tere Yai Gumam fi ki singa yokamai kokonan ipun dowangua erekenapune. <sup>20</sup>Ma deiyo! Beikenapunba nonon yokamai bei moiro ‘Yokamai kua kopuna yai gumam kasu yai teinga nekero te yokamai ama biange te opai kunei nekero te yokamai kapu nokom a din dinga goingua nekero te kapu akiyom ama nekenaime,’ diro munom ganom boi erowapune.’ <sup>21</sup>Ka munom epe boi erowapunga mapunom i epe: Koma wom te epena ama iki birom ori koro koro Yura ari Mose kam wayom di mari dere te iron kakom kakom yaromi ka mapunom boingua ka nuwi si ereinga iki ikai koi kerere fimie,” Yemesi epe dume.<sup>z</sup> <sup>22</sup>Ena iran Yesu ewi dongua finga yokamai te ari mokoinga Yesu gama kiapanom bei ereinga yokamai te Yesu gama muruwo ama moinga nomane towane eire “Nonon arinama suwo ganom boi erowapungoro Pauro te Banapasi inako dero iki birom ori Andiako tei fipika yokamai ama naime,” dire ka mapunom yai ori surai gunom boime. Yai towane kam i Yurasi Basapa te yai ta i kam Saira. <sup>23</sup>Te yokamai munom ganom boingoro yai surai ire naipire. Munom ganom i epe boime: “No Yesu nowi dongua fupunga yokamai te no ari mokoinga Yesu gama kiapanom bei ereinga yokamai ka boi erowapune. No ne yokamai arinama moipune. Te ne yokamai Yura ari moikeinga moimba Yesu fi ki si teingoro ena no munom ganom boi erowapune. Ne yokama Andiako tei moinga te Siria man tei moinga te Sirisia man tei ama moinga boi erowapune. <sup>24</sup>Nonon mora ka fipunga no arinama suwo ne yokamai moingi tei fure ka di erere ne yokamai nomanenom bei du di ereingoro ena ne yokamai wira dire moikeime. Te no ka dire yokamai ewi dekepune.”<sup>a</sup> <sup>25</sup>Ena iran nonon nomane towane eiro te no arinama suwo koropane gunom boiro ewi ne yokamai moingi tei dowaro bepunie. Te no yai surai kanom fipunga Banapasi te Pauro dere ne yokamai moingi tei unaipika no gunom boipunga yokamai ama unaimie. <sup>26</sup>Yai surai Yesu Kirisito Ari Wanopanom kokonan beipika ari yokamai ‘Ei gorapune,’ dimba yai surai kokonan ipire. <sup>27</sup>Ena no yokamai yai surai Yurasi te Sairo gunom boi erere ewi ne yokamai moingi tei dopune. No yokamai ka boi eropungamere yai surai ka irai ama epe di erowaipire. <sup>28</sup>Te Yai Gumam Murom te no yokamai nomane towane eiro epe boi eropune: No yokamai tai ipun dowangua ne yokamai erekenapunba no ne yokamai ka

† 15:20 Lew 17:10-16    ‡ 15:21 Ap 13:15    § 15:24 Ap 15:1

epe di erowapune:<sup>b</sup> <sup>29</sup>Ari yokamai kopuna yai gumam kasu yai fi mun ei towainga ne yokamai nekeiyo! Te ne yokamai kapu akiyom ama nekeiyo! Te ari kapu nokom a din dowaingoro goraiinga ne yokamai nekeiyo! Te ama biange te opai kunei nekeiyo! Ena iran ne yokamai tarom i muruwo mounom wako tere beikenaiinga nokapu wom moraima. Mora epe,” yokamai epe boi ereingoro<sup>c</sup> <sup>30</sup>ena yokamai ewi deingoro fu Andiako tei fure Yesu gama unom boingoro kuku boingoro ka boinga ereime. <sup>31</sup>Ena Yesu gama ka boinga kerere nomanenom yoporam boi erongua kam mun fime. <sup>32</sup>Te Yurasi te Saira nenen ka mapunom ari moipika iran ka munmane fi ki singa ari yokamai di erere bei erowai te ereipire.<sup>d</sup> <sup>33</sup>Ena yai surai kakom arari tei moingoro surai inako dero naro beipika ari muruwo “Ne surai te Yai Gumam gere fiyo!,” di ereingoro ena surai fu ewi deinga yokamai moingi tei naro fipipa. <sup>34</sup>yai Saira yaromi nenen inokore ei finguamere epe dourom boiro Andiako tei yo moime. <sup>35</sup>Ena Pauro te Banapasi Andiako tei moipika te yai surai te ari munmane Ari Wanopanom yaromi gunom kam di mari deime.

#### Pauro te Banapasi yai surai ipu sire koro koro fipire

<sup>36</sup>Ena okome kakom suwo Pauro bei moiro ka epe Banapasi di tome, “Nonon inako dero fure koma nonon Ari Wanopanom kam di mari de erepika yokamai irai iki birom ori koro koro moinga kanapune. Ena iran nonon firapunga yokamai fi ki ori simbo,” di tongoro <sup>37</sup>ena Banapasi “Yoane Mako yaromi akire ama napuiye,” di fimba<sup>e</sup> <sup>38</sup>koma yai surai Pambiria tei moiro Yai Gumam gunom kam kokonan beipika Mako yaromi surai ma dere kokonan i ikeme. Ena Pauro “Yaromi ama napuika faikeme,” di tongoro<sup>f</sup> <sup>39</sup>ena yai surai kura kam di ipo ka depikoro nomanenom u kapo kapo fungoro ena iran Banapasi Mako akire fure nuwi kopare ire nuwi boromdi fure u Saipasi man fumba<sup>g</sup> <sup>40</sup>Pauro furo Saira yaromi gunom boingoro ena Yesu gama yokamai bei moiro “Ari Wanopanom ne surai akire di erere bei nokapu de erowame,” diro ka make ei teingoro <sup>41</sup>surai fu Siria man suna tei fure te Sirisia man suna tei ama fure Yesu fi ki si teinga yokamai yoporam boi erepire.

#### Pauro te Saira surai uro Timoti akiro fipire

**16** <sup>1</sup>Ena Pauro wan fure fure iki birom ori Deripi ure dere fu iki birom ori Lisita tei fume. Te Lisita tei Yesu gama yokama moingi suna tei yai ta moime. Yaromi kam i Timoti. Ena yaromi mam i Yura opai moiro te Yesu fi ki si tome. Te yaromi nem i Giriki yai moime. <sup>2</sup>Ena Yesu gama Lisita tei moinga te Aikoniam tei moinga yokamai Timoti

<sup>b</sup> 15:28 Mt 23:4   <sup>c</sup> 15:29 Ap 15:20   <sup>d</sup> 15:32 Ap 11:27; 13:1; 14:22   <sup>e</sup> 15:37 Ap 12:12, 25  
<sup>f</sup> 15:38 Ap 13:13; Kor 4:10   <sup>g</sup> 15:39 Ap 4:36; 13:4

kam akire di teime.<sup>h</sup> <sup>3</sup>Ena iran Pauro “Timoti ama napune,” di fimba Timoti nem i Giriki yai moingua Timoti gam guwo dikeme. Ena Yura ari muruwo akai tei moinga “Timoti nem i Giriki yai moiro wam gam guwo dikeme,” dinga iran Pauro Timoti gam guwo dume.<sup>i</sup> <sup>4</sup>Ena yokamai fu iki birom ori koro koro fure ari yai opai tei moinga yokamai “Yesu ewi dongua finga yokamai te ari mokoinga Yesu gama kiapanom bei ereinga yokamai bei moiro ari yokamai ganom guwo dikenainga kam Yerusarem tei nomane towane eire ka di guwo di eingoro ne yokamai dourom boiyo!” di ereingoro<sup>j</sup> <sup>5</sup>Yesu fi ki si teinga yokamai fi ki si mapunom erowai te erongoro aro kakom kakom Yesu gama yokamai munmane fuka diro moime.<sup>k</sup>

### **Pauro kuwan kanungua Maseronia yai ta “Uwo!” di tome**

<sup>6</sup>Ena yokamai Eisia man furo ka mapunom di mari duwaro beimba Yai Gumam Murom “Nemane,” di erongoro yokamai fu Firikia man te Garesia man suna tei fure<sup>l</sup> <sup>7</sup>ena Misia man bunamdi tei finga Bitinia man naro beimba Yesu Murom Sumuna “Nemane,” di erongoro <sup>8</sup>ena iran yokamai Misia suna tei fure u iki birom ori Toasa tei moime. <sup>9</sup>Yokamai fure moingoro ena giruwangua kakom Pauro kuwan epemere kanungua Maseronia yai ta arere Pauro uwom boiro ka epe di tome: “Ne Maseronia man tei ure akire di noro!” di tome. <sup>10</sup>Ena Pauro kuwan mora kanungua nonon “Yai Gumam ‘Ne yokamai Yesu gunom kam Maseronia ari di mari de erowaimie,’ di norome,” di firo ena guwai gainom kenom beiro Maseronia tei naro bepunie.

### **Opai ta Liria Ari Wanopanom fi ki si tome**

<sup>11</sup>Ena nonon Toasa ma dere nuwi kopare ire nuwi boromdi fure fu Samoteisu man moirom bei engui tei ure fairo kamun takongoro dere u iki birom ori Niapori tei upune. <sup>12</sup>Teiri mangi wan uro dero Firipai tei upune. Akai i iki birom ori wom dungoro te koma Roma ari ure iki birom ori irai kei faimie. Ena iran kakom suwo nonon tei moipunie. <sup>13</sup>Te Yura ari iron kakom unguwa no yokamai iki birom ori mena fure nuwi ta dungui tei fure nuwiri teina tei “Ka make einga akaiyom dume,” dinga fire fupune. Ena no yokamai ure kanopunga opai suwo koropane kuku boiro moingoro ena no ame dero ka di eropunie. <sup>14</sup>Te opai ta tei moiro no kanom finguwa i kam Liria. Oparomi iki birom ori Taiyataira ma dere iki birom ori tawa ure gai kou ari erere meina iro moime. Te oparomi kakom kakom Yai Gumam kam akire di tere moime. Ena Ari Wanopanom yaromi bei moiro oparomi nomanenom akire di tongoro oparomi Pauro Yesu gunom kam dungua fi ki sume. <sup>15</sup>Ena oparomi te ariyoma nuwi

<sup>h</sup> 16:2 Fir 2:19-22   <sup>i</sup> 16:3 Gar 2:3-5   <sup>j</sup> 16:4 Ap 15:23-29   <sup>k</sup> 16:5 Ap 2:47   <sup>l</sup> 16:6 Ap 18:23

buingoro oparomi no yokamai unom boi norome, “Ne yokamai ‘Na Ari Wanopanom fi ki si tome,’ di frainga uro na ikinamdi tawa moiyo!” epe diro yoporam boiro di norongoro ena no fupune.<sup>m</sup>

### Pauro te Saira yai surai kan iki faipire

<sup>16</sup>Ena aro kakom ta no yokamai ka make einga akaiyom tei naro bepunga nuwi kokonan opai ta konmori tei gumanom boi norero ama mounomdi fume. Murom niki dongua ta oparomi dem miriyomdi ikai koi moiro akire di tongoro ena oparomi ari yokamai tai okome benainga imari de erere meina munmane ire oparomi ari nuwi kokonan bei teinga yokamai erome.<sup>n</sup> <sup>17</sup>Te oparomi Pauro te no yokamai mounomdi tei ure kakom kakom u boiro “Yokamai Yai Gumam Yai Ori wom nuwi kokongan moiro akire di erongua nokapu moraingana konom ne yokamai di mari de erome,” dume.<sup>o</sup> <sup>18</sup>Aro kakom munmane epe u boingoro ena Pauro niki de fire awa tere murom niki dongua yaromi epe di tome, “Yesu Kirisito yaromi yoporam boi moingua ne oparomi dem miriyom ma dere u mena uwo!” di tongoro ena kuawom murom niki dongua u mena ume.<sup>p</sup> <sup>19</sup>Ena oparomi ari nuwi kokonan bei teinga yokamai kaninga kongo tokoi ikenaima. Ena iran yokamai Pauro te Saira surai a ki sire gure ire fu ka kori finga akaiyom fime. <sup>20</sup>Yokamai yai surai endire fu ka kori finga ari moingi tei fure “Ka kori finga yokamao, yai surai Yura ari moiro nonon iki birom ori tei moipunga bei niki de norepikoro faikeme.<sup>q</sup> <sup>21</sup>Yai surai mapunonom no yokamai di mari de noreimba no Roma ari moiro dourom borapunga i faikeme,” di ereingoro <sup>22</sup>te ari yai opai muruwo surai kianom bei ereingoro ena ka kori finga yokamai “Surai gai suna kui si dere kupa eiyo!” di ereingoro kupa eime.<sup>r</sup> <sup>23</sup>Kupa munmane mora einga yokamai surai endire fure kan si erere te kan iki kiapam bengua yai “Ne yai surai kiapanom nokapu beyo” di teingoro <sup>24</sup>yaromi ka i fire ena surai ire kan iki suna wom tei de erere te surai kaunom koro koro ori giram koingua suna tei eiro keiro kan si ki si erongoro moipire.

<sup>25</sup>Ena giruwangua ongo suna kakom Pauro te Saira surai ka make eire Yai Gumam wi di tepikoro kan fainga ari ka i fi moingoro<sup>s</sup> <sup>26</sup>ena kene kene eiro man imimi ori wom ungoro te kan iki kowiri koka ori wom tongoro kori gumam muruwo opa boingoro te kan fainga ari muruwo okonom kan sen koinga forau sungoro <sup>27</sup>ena kan iki kiapam yai arere kanongua kan iki kori gumam muruwo opa boingoro yaromi kan fainga ari yokamai muruwo “Fu deima,” di firo ena iran sanupui gurere nenen gamdi siro “Goraiye,” diro bamba<sup>t</sup> <sup>28</sup>Pauro uwom ori boiro “Nonon

<sup>m</sup> 16:15 Ap 16:33; 18:8    <sup>n</sup> 16:16 Ap 19:24    <sup>o</sup> 16:17 Mk 1:24, 34    <sup>p</sup> 16:18 Mk 16:17

<sup>q</sup> 16:20 Mt 5:11; 10:17-18; Mk 13:9; Ap 17:6    <sup>r</sup> 16:22 2 Ko 11:25; 1 Te 2:2    <sup>s</sup> 16:25 Kor 3:16    <sup>t</sup> 16:27 Ap 12:18-19

muruwu moipunga ne nenen ganum bei niki dekeyo!” di tongoro <sup>29</sup>ena kiapam yai “Kewa gaiyo!” di erongoro yokamai kewa gaingoro yaromi ire bu di ikai uro gam nouro diro Pauro te Saira moingi tei ako fairo <sup>30</sup>ena tokoi arere yai surai endire mena furo “Yae, na tora kokonan beikoro Yai Gumam akire di narowangoro moi kuwom suwaika inaiye,” diro mina wakoro di erongoro” <sup>31</sup>ena yai surai “Ne Yesu Ari Wanopanom fi ki si towanga Yai Gumam ne te ne arinuma akire di erowangoro ne yokamai moi kuwom suwainga mapunomom inaime,” epe di tepire. <sup>32</sup>Ena yai surai bei moiro yaromi te ari yai opai muruwu yaromi ikomdi tei fainga Ari Wanopanom gunom kam di erepikoro <sup>33</sup>ena iran giruwangua ongo suna kakom i kiapanom yaromi yai surai endire furo numon deinga biyom si erero ena kene kene eire yaromi te ariyoma muruwu nuwi buime.” <sup>34</sup>Ena yaromi yai surai endire ikom ikai fure kua kopuna kei erome. Te yokamai Yai Gumam fi ki si teinga iran ari yokamai mun ori wom fime.

<sup>35</sup>Ena okome kamun mora takongoro ka kori finga ari yokamai kiminem suwo koropane ewi deingoro yokamai fu kan iki kiapam yai moingi tei fure “Ne yai surai ewi dengere mena napire,” di teingoro <sup>36</sup>ena kiapam yai fu Pauro moingui tei fure “Ka kori finga yokamai ‘Ne surai ewi do!’ dinga ena ne surai kan iki ma dere mena firo! Te ne surai wira dire firo!” di tomba <sup>37</sup>Pauro kiminem yokamai epe di erome, “Yokamai Roma ari kanom kereinga yokama no surai kanom ama kereimba ka kori finga yokamai kori di norekere ari yai opai okonom muromdi no surai kupa noire te kan si noreime. Mapunom i faikeme. Te epena yokamai eke dere ‘No surai nowi dowaro beimie,’ di finga ama faikeme. Ena iran yokamai nenen ure no surai no dire mena naime,” di erongoro” <sup>38</sup>ena kiminem yokamai inako dere fu ka kori finga yokamai moingi tei fure Pauro ka dungua di ereime. Ena yokamai yai surai Roma ari gere kanom kereingai kam fire kuri fire ganom nouro dime. <sup>39</sup>Ena yokamai kan iki fure yai surai ka di wira di erero ena surai endire mena fure “Ne surai iki birom ori tawa ma dere firo!” epe di ereime.<sup>x</sup> <sup>40</sup>Ena yai surai kan iki ma dere fu Liria ikom tei fure Yai Gumam gama kanere denom minom bei erowai te de erero dere fipire.

#### Pauro te Saira yai surai fu iki birom ori Tesaronaika tei fipire

**17** <sup>1</sup>Ena Pauro te Saira yai surai wan fure iki birom ori Afipori fuka dire ena tei ma dere wan fure iki birom ori Aporonia fuka dire ama tei ma dero wan fure iki birom ori Tesaronaika fuka dipire. Te Yura ari ka nuwi si ereinga iki tei dunguairai” <sup>2</sup>ena Pauro mapunom koma bengumere epe Yura ari iron kakom suraiye yaromi fu ka mapunom

<sup>u</sup> 16:30 Ap 2:37   <sup>v</sup> 16:33 Ap 16:15   <sup>w</sup> 16:37 Ap 22:25   <sup>x</sup> 16:39 Mt 8:34   <sup>y</sup> 17:1 1 Te 2:1-2

iki gawo ikai fure ka mapunom kerere yokamai ka di ipo ka de erome. <sup>3</sup>Yaromi ka mapunom kerere imari dere “Yai Gumam awi dongua akire di norongua yai gam kipi kaingoro goiro arome. Ena Yesu yaromi ne yokamai epena di mari de ereika yaromi Kirisito Yai Gumam awi dongua akire di norongua yai moime,” di erome.<sup>z</sup> <sup>4</sup>Ena Yura ari suwo koropane “Yaromi kawom dume,” diro Pauro te Saira nomanenom towane eingoro te Giriki ari Yai Gumam kam bawom di teinga yokamai te opai ori munmane yokamai ama nomanenom towane eime.

<sup>5</sup>Yokamai epe beimba Yura ari suwo koropane furo yai surai denom minom niki de fi erere ena iran fure ari niki deinga yokamai endire ari yai opai munmane kuku boire gure gewo diro fu Yeson ikom fure waiyapo de suna dere kori gumam si opa boire yai surai ari yai opai yokamai okonom muromdi i mari dowaro beime.<sup>a</sup> <sup>6</sup>Ena yokamai yai surai wandou wingai kankeimba yokamai Yeson yaromi te Yesu gama suwo gure ire mena fure fu iki birom ori kaunsel ari moingi tei fure ka epe yoporam boire di ereime: “Ari man man tai niki dongua beinga yokamai epena ure tawa moingoro<sup>b</sup> <sup>7</sup>Yeson ari yokamai endire ikomdi furo kua kopuna kei erongoro yokamai ikom tei faime. Te yokama yai ori Sisa kam si dere te ka ta epe dime, ‘Yai ori ta moimia yaromi kam i Yesu,’ epe dime,” yokamai epe dingoro<sup>c</sup> <sup>8</sup>ena ari yai opai muruwo te iki birom ori kaunsel ari yokamai ka i fire binom mem unanan fume. <sup>9</sup>Ena iran iki birom ori kaunsel yokamai Yeson te ari suwo “Ne yokamai ka kori meina ereinga ena mena naimie,” di ereingoro ena meina erere ewi deingoro fime.

### Pauro te Saira yai surai fu iki birom ori Beria tei fipire

<sup>10</sup>Ena kamun kama sungoro Yesu gama yokamai Pauro te Saira ewi iki birom ori Beria tei deingoro surai u tei ure Yura ari ka nuwi si ereinga iki wipire. <sup>11</sup>Te Yura ari Beria tei moinga yokamai bei moiro ari Tesaronaika ari moingamere epe moikeime. Beria ari yokamai inokore eire te ka mapunom fire mun fire te kakom kakom “Pauro kawom dumbo kasu dumbo firapune,” dire ena ka mapunom kerere inokore eime.<sup>d</sup> <sup>12</sup>Ena iran Yura ari munmane Yesu fi ki si teingoro te Giriki ari munmane te Giriki opai ori munmane ama Yesu fi ki si teime.<sup>e</sup> <sup>13</sup>Te okome Yura ari Tesaronaika tei moinga yokamai “Pauro Beria tei moiro Yai Gumam gunom kam ari yai opai di mari de erome,” dinga fire ena yokamai fu Beria tei fure ari yai opai nomanenom bei du di ereingoro Beria ari niki de fime.<sup>f</sup> <sup>14</sup>Ena Yesu gama kene kene eire Pauro awi fui nuwiri tei deimba Saira te Timoti gere Beria tei moipire. <sup>15</sup>Te ari yokamai Pauro

<sup>z</sup> 17:3 Lk 24:26-27; Ap 3:18; 9:22    <sup>a</sup> 17:5 Ap 13:50; 17:13    <sup>b</sup> 17:6 Ap 16:20    <sup>c</sup> 17:7 Lk 23:2; Yo 19:12    <sup>d</sup> 17:11 Yo 5:39    <sup>e</sup> 17:12 Ap 17:4    <sup>f</sup> 17:13 Ap 13:50; 14:19; 17:5

akire kon mori wan fure fu iki birom ori Aten tei wingoro ena Pauro “Ne yokamai Saira te Timoti kanaingai ewi na moiki tei dere ‘Bu di firol!’ di ereiyoi!” di erongoro yokamai inako dero Beria tei fime.

**Pauro fu iki birom ori Aten tei furo Yai  
Gumam gunom kam di mari dome**

<sup>16</sup>Ena Pauro Aten tei moiro yai surai kiapanom beiro ena iki birom ori tei kanongua yai gumam kasu yokamai munmane beingoro ena yaromi dem miriyom niki ori wom de fire <sup>17</sup>fu Yura ari ka mapunom iki gawo fure Yura ari te ari Yura ari moikeimba Yai Gumam kam bawom di teinga yokamai ka di ipo ka deime. Te kakom kakom yaromi ama fu ari ku boinga akaiyom tei furo ena ari yai opai nenta tei kuku boinga ka di ipo ka de erome.<sup>g</sup> <sup>18</sup>Ena ari Epikurian te ari Sitoiki furo Giriki ari kanom mapunom di mari deinga yokamai ure Pauro gere ka di ipo ka deime. Te Pauro Yesu goingua arongua kam mapunom di mari de erongua iran ari koropane “Yaromi ka unanan dungua yai moime. Ena torae duwame?” dingoro te ari suwo ta “Yaromi ari akai ta moinga yokamai kamundi ari kanom imari dome,” epe dime. <sup>19</sup>Ena yokamai Pauro akire fu ari kuku boinga akaiyom i kam Ariopaka tei fure “No yokamai ne ka koi ta ari yai opai di ereingai firaro bepunie. <sup>20</sup>Te no yokamai ne ka koma dinga fikepune. Ena iran nonon mapunom firaro bepunie,” epe dime. <sup>21</sup>Ena yokamai ka epe dinga Aten ari muruwo te ari iki ta kui eimba epena Aten tei kei fainga yokamai kakom kakom ka koi ta dire bo te ka koi ta fimie.

<sup>22</sup>Ena iran Pauro arere ari kuku boinga moinga akaiyom i kam Ariopaka suna tei moiro “Aten ari yo, na kanika ne yokamai nenen kanom mapunom a ki simie. <sup>23</sup>Na iki birom ori i suna tei wan furo kanika tai ta ta ne yokamai kanom akire dingoro te na tarom ta ama kanika kongo boi dungui boromdi tei ka ta epe boime, ‘No yokamai kamundi yai kankepunga boiyom i beimie,’ epe boime. Ena na kamundi yai irai ne yokamai kankeimba kam akire di teinga kam mapunom di erowaikoro fiyo! <sup>24</sup>Yai Gumam man bei eiro te tai mapunom mapunom mangi tei moinga ama bei eme. Yaromi man kamun kapakom moingua iran yaromi fi mun ei teinga iki ari keinga ame dero moikeme.<sup>h</sup> <sup>25</sup>Te yaromi nenen ari yai opai muruwo yokori moi erongua te giram murom erongua te taikan muruwo erongua iran yaromi taikan muruwo ako nongoro ari yai opai tai taromi towainga faikeme.<sup>i</sup> <sup>26</sup>Te Yai Gumam no awanom towane wom bengua ari maki winga no ari yai opai muruwo fuka dire man man muruwo makire si dupune. Te Yai Gumam ari yokamai manom sinom kei fanainga kakom mora firo ka di eiro te

<sup>g</sup> 17:17 Ap 18:19   <sup>h</sup> 17:24 1 Kin 8:27; Ap 7:48   <sup>i</sup> 17:25 Sam 50:12; Ais 42:5

mangi giwi muruwo ama firo di eme.<sup>j</sup> 27Te ari Yai Gumam wandou naro beinga yaromi epe firo di emba yokamai Yai Gumam kanaimbere kankenaimbe. Te yaromi fakai wom moikengua yaromi nonon moipungi teina tei moimie.<sup>k</sup> 28Te yaromi moingua nonon ari kon wan moiro te yokori moipunie. Ena te ne yokamai nenen arinoma munom boinga yokamai ka epe boime, ‘Nonon ama yaromi gama moipunie,’ epe boime. 29Ena iran nonon Yai Gumam gama moipunga iran nonon ‘Yai Gumam i epemere kongo gol bo te kongo siwa bo te kongo wom sumuna moime,’ di fikenapune. Tamanumie. Ari tarom i ire kuianom okonomdi beimie.<sup>l</sup> 30Te koma nonon nenom manom moinga yokamai Yai Gumam kam mapunom nokapu fikeingoro Yai Gumam kan dero ka kori di erekemba epena nonon ari yai opai muruwo nomanenom si awa tere tai niki dongua ma dowaro bepunga Yai Gumam ka di noromie.<sup>m</sup> 31Te yaromi ari yai opai man man muruwo moinga yokamai ipu si erowangua kakom ta mora bai emie. Te Yai Gumam yai ta gunom boi tere yaromi yono manomdi ako arongoro ari yai opai muruwo yo tere ipu si erowamie,” Pauro epe di mari dome.<sup>n</sup>

32Ena ari yokamai yaromi yono manomdi arongua kam fire suwo Pauro kam ka simba te suwo koropane “No ne kanum i tokoi duwangere firapune,” dime. 33Epe dingoro ena Pauro tei ma dere fume. 34Te ari suwo koropane Pauro ka dungua dourom boiro Yesu fi ki si teime. Fi ki singa yokamai suwo kanom i epe: Daionisiu yaromi ari kuku boinga akaiyom Ariopaka yai ori moingua te opai ta i kam Damari te ari suwo ama fi ki sime.

### Pauro fu iki birom ori Korin tei furo moime

**18** 1Ena Pauro yaromi Aten tei ma dero fu iki birom ori Korin tei fume. 2Ena yaromi Yura yai ta kanume. Yaromi kam Akuira. Te yaromi ikom akaiyom i Pandusi dumba yaromi te efem biyai Pisisira surai Itari man tei kei faipire. Kei faipika Roma yai ori Koriyasi “Yura ari Roma tei ma dere akai ta fiyo!” dungua kakom tei surai ma dere fu Korin tei fipire. Ena Pauro surai kanaro fume.<sup>o</sup> 3Te yaromi te efem biyai surai sel iki keipikamere Pauro ama sel iki kengua iran Pauro surai ikinomdi tei fure fairo moiro kokonan ime.<sup>p</sup> 4Te Yura ari iron kakom kakom Pauro fu Yura ari ka mapunom iki gawo fure Yura ari te Giriki ari ka di ipo ka dere “Yokamai Yesu fi ki suworo beingoro fuiye,” dire fume.

5Ena Saira te Timoti surai Maseronia tei ma dere Korin tei wipika kakom i Pauro kakom kakom gunom kam Yura ari di mari de erere te

<sup>j</sup> 17:26 Yen 10:32; 11:9 <sup>k</sup> 17:27 Ais 55:6; Sam 145:18; Yer 23:23 <sup>l</sup> 17:29 Ais 40:18-20; Ap 19:26 <sup>m</sup> 17:30 Ap 14:16 <sup>n</sup> 17:31 Sam 9:8; 96:13; Ap 10:42 <sup>o</sup> 18:2 Ro 16:3 <sup>p</sup> 18:3 Ap 20:34; 1 Ko 4:12



yoporam boiro “Yesu yaromi Yai Gumam awi dongua akire di norongua yai Mesia moime,” di erome.<sup>9</sup> <sup>6</sup>Epe di eromba yokamai kianom bei tere te kam ka singoro ena yaromi yokamai bianom faingua iran kuwan gaiyomdi dungua towa towa keiro bei dere “Ne yokamai guwom akai nainga i nenen moingi tei dumie. Na moiki tei dikeme. Ena na ari Yura ari moikeinga yokamai moingi tei fure gunom kam di mari de erowaiye,” epe di erere<sup>7</sup> ena Pauro nuwi si ereinga iki ma dere fu yai ta ikomdi tei fume. Yaromi kam i Titiyu Yusatasi. Te yaromi Yai Gumam kam bawom di tongoro te ikom Yura ari ka nuwi si ereinga iki bunamdi tei dume. <sup>8</sup>Te Yura ari ka nuwi si ereinga iki kiapam yai i kam Kisipu. Yaromi te gama muruwo Ari Wanopanom fi ki si teingoro te Korin ari yokamai munmane Pauro kam firo fi ki siro nuwi buime.<sup>5</sup>

<sup>9-10</sup>Ena okome giruwangua kakom ta Pauro kuwan epemere kanongua Ari Wanopanom ka epe di tome, “Na ne gere ama moipunga iran kuri fikeyo! Nenta ure ne bei niki de erekenamie. Ne koma ka di mari dengamere epe di mari do! Ari yai opai munmane iki birom ori tei moinga na arinama moime,” epe di tongoro<sup>11</sup> ena Pauro Korin akai tei moingoro noniki towane fungoro te kapa okonom koro muruwo koro towane fungoro yaromi ari yokamai Yai Gumam gunom kam di erere moime.

<sup>12</sup>Ena Roma ari bei moiro yai ori Gario yaromi Akeiya man kiapanom bengua kokonan teingoro yaromi fu Akeiya man tei moime. Ena Yura ari nomane towane eire ure Pauro kianom bei tere ena “Kori di towaro bepune,” dire Pauro akire fu Gario moingui tei fure <sup>13</sup>“Ya, yaromi Yai Gumam kam bawom di towainga kon ta ari yai opai opom di erongua iran ari yai opai Mose ka di guwo dungua kam dourom boinga konom i ma deime,” epe dingoro <sup>14</sup>ena Pauro ka mokom duwaro bempa Gario koma Yura ari di erome, “Ne Yura ari yokamai yaromi ka ta di go dinga si dombo te tai ta bei niki dombo ka kori di towainga firaiye. <sup>15</sup>Te ne yokamai nenen kanom bo te nenen ka di guwo dinga di ipo ka deinga iran ne yokamai nenen di kenom beiyo! Na ka kori epe firaro kam fikeiye,” epe diro<sup>16</sup> ka kori finga akaiyom ewi mena dongoro <sup>17</sup>ena yokamai muruwo fure Yura ari ka nuwi si ereinga iki kiapam bengua yai i kam Soteni ako ki sire ka kori finga akaiyom tei yaromi gumam kupa simba Gario yaromi tai kan i kanero inokore munmane eikeme.

### Pauro yaromi akai koro koro wanumie

<sup>18</sup>Ena kakom munmane Yesu fi ki si teinga yokamai Korin tei moingi Pauro ama moiro ena okome ma dere Siria akai naro beimba koma iki

<sup>9</sup> 18:5 Ap 17:14-15    <sup>10</sup> 18:6 Ap 13:46, 51; 20:26    <sup>11</sup> 18:8 1 Ko 1:14    <sup>12</sup> 18:9 1 Ko 2:3

<sup>13</sup> 18:10 Ais 41:10; Yo 10:16    <sup>14</sup> 18:15 Yo 18:31; Ap 23:29; 25:18-19

birom ori Senia fure ka kawom diro di koi engua birom wiyom muruwo baime. Ena “Siria akai naiye,” di firo te Pirisira te wiyom biyai Akuira surai gere fure nuwi kopare akire nuwi boromdi fure<sup>w</sup> 19 fu iki birom ori Efesasi tei fime. Ena Pauro yaromi fu Yura ari ka nuwi si ereinga iki fure Yura ari ka mapunom di mari de moiro te di ipo ka dongoro<sup>x</sup> 20 ena ari yokamai Pauro “Ne kakom suwo no yokamai moipungi tei morano?” diro mina wako teimba yaromi “E e,” diro 21 te naro bengua kakom tei “Yai Gumam ‘O’ duwangua na inako dero ne yokama moingi tei unaye,” di erere ena Pirisira te Akuira “Ne surai Efesasi tei moiro!” diro ma dere fure nuwi kopare ikai fure nuwi boromdi fure<sup>y</sup> 22 Sisaria man tei fui nuwi kopare ma dere moko iwa fu Yerusalem fure Yesu fi ki si teinga yokamai kanere ena ma dere fu Andiako fume. 23 Te yaromi kakom suwo arari moiro ena okome Andiako tei ma dero fure wan fu Garesia akai ori te Firikia akai ori wan fure Yesu gama yokamai nomanenom bei erowai te erome.

#### **Yai ta Aporo furo Yai Gumam gunom kam nokapu di mari dome**

24 Ena Pauro Gariri akai ori te Firikia akai ori wan fungui, Yura yai ta u Efesasi tei ure moime. Yaromi kam Aporo. Te yaromi iki birom ori Eresandia kapakom moimie. Te yaromi ka di mari dongua kapakom moingua te Yai Gumam ka mapunom boingua mora fime.<sup>z</sup> 25 Te nenta koma Aporo yaromi Ari Wanopanom kam nuwi si tongoro ena yaromi nomaneyom yoporam boi tongoro yaromi ari yai opai Yesu tai bengua kam di eromba yaromi Yoane yaromi nuwi wom sumuna buingua mapunom i towane mora fimie.<sup>a</sup> 26 Ena Pirisira te wiyom biyai Akuira surai fipika yaromi ka nuwi si ereinga iki tei moiro mapunom boiro di mari dongoro ena surai Aporo “No ikinom uwo!” di teipikoro ungoro Yai Gumam konom nokapu wom opom di teipire.

27 Ena okome Aporo bei moiro Akeiya man naro bengua Yesu gama Efesasi tei moinga yokamai fi yoporam boi tere te munom ganom Yesu gama Akeiya man moinga yokamai epe boi ereime, “Aporo yaromi unangua nomane towane ei teiyo!” epe boi ereime. Ena yaromi Akeiya tei uro fi ki si teinga yokamai akire di erome. Te koma Yai Gumam uro yokamai bei nokapu de erongoro Yesu fi ki si teime. 28 Te yaromi ari yokamai okonom muromdi ka mapunom epe di mari dome, “Yesu yaromi Yai Gumam awi dongua akire di norongua yai i kam Mesia moime,” diro yoporam boiro di mari dere ena Yura ari ka dinga ime de tome.<sup>b</sup>

---

<sup>w</sup> 18:18 Ap 21:23-24    <sup>x</sup> 18:19 Ap 17:17    <sup>y</sup> 18:21 Ro 1:10; 1 Ko 4:19; Yem 4:15    <sup>z</sup> 18:24 1 Ko 3:5-6    <sup>a</sup> 18:25 Ro 12:11; Ap 19:3    <sup>b</sup> 18:28 Ap 9:22

## Pauro fu iki birom ori Efesasi tei furo moime

**19** <sup>1</sup>Aporo yaromi Korin tei moingui, Pauro wan fu Eisia man wan furo ena u Efesasi tei ure ungua Yesu gama suwo ekanere<sup>c</sup> <sup>2</sup>“Koma ne yokamai Yesu fi ki si teinga Yai Gumam Murom mora ama imo?” diro mina wako erongoro ena yokamai “E e. No yokamai Murom Sumuna i moingua fikepune,” di teingoro<sup>d</sup> <sup>3</sup>“Ena ne yokamai fi ki singa tora nuwi buime?” diro mina wako erongoro “No yokamai Yoane ka mapunom dungua fi ki supunga nuwi buipune,” diro ka mokom bairo di teingoro <sup>4</sup>ena Pauro tokoi di erome, “Ari yai opai denom minom si awa teinga Yoane nuwi wom bui erere te ka epe ama dume, ‘Ne yokama yai ta okome unangua fi ki si teiyoi!’ epe di erome. Te yaromi i Yesu,” epe di erongoro<sup>e</sup> <sup>5</sup>ena yokamai ka i fire Ari Wanopanom Yesu kam uwom boiro nuwi buime. <sup>6</sup>Ena Pauro okom ei yokamai binom kopu de erongoro ena Yai Gumam Murom uro yokamai denom minom ikai koi fungoro yokamai ka kapo kapo dire te Yai Gumam kam mapunom imari deime.<sup>f</sup> <sup>7</sup>Te yai gan okonom koro koro muruwo te kaunom surai moime.

<sup>8</sup>Ena kapa suraiye Yura ari iron kakom kakom Pauro fu Yura ari ka nuwi si ereinga iki ikai koi fure ka yoporam boiro ka di mari dome. Yaromi “Ari yokamai Yai Gumam kiapanom bei erongua mapunom firaime,” diro ka di ipo ka domba <sup>9</sup>ari suwo koropane denom minom si fere de ki sungoro fi ki sikeime. Ena yokamai fu ari yai opai okonom muromdi tei furo Yai Gumam konom si fere dere ka niki dungua dime. Ena Pauro yokamai moingi tei ma dere Yesu gama endiro fure ena aro kakom kakom yai Tairanu munom ganom iki tei moiro ka mapunom dungua ariyoma ama di ipo ka dero fimie.<sup>g</sup> <sup>10</sup>Ena Pauro epe bei moingua non iki surai fungoro ena iran Yura ari muruwo te Giriki ari muruwo Eisia akai tei moinga Ari Wanopanom kam fimie. <sup>11</sup>Te Yai Gumam Pauro akire di tongoro ari ganom nouro dinga tarom beme.<sup>h</sup> <sup>12</sup>Te ari yokamai Pauro foran boingua bei dungua gaiyom ire bo te Pauro kokonan bengua gaiyom ire fu nupi fainga ari yokamai moingi tei fure ganomdi tei eingoro ena nupi fainga gougoro te murom niki deinga yokamai ari denom minom ikai koi moinga u mena fimie.<sup>i</sup> <sup>13</sup>Ena Yura ari suwo koropane koro koro furo murom niki deinga yokamai ewi mena dowaro beinga “Ari Wanopanom Yesu kam uwom borapune,” di firo epe duworo beime, “Pauro yaromi Yesu kam mapunom di mari dungua Yesu yaromi moingua ne yokamai u mena fiyo!” epe dime.<sup>j</sup> <sup>14</sup>Te fi mun ei teinga yai ori i kam Sewa yaromi wama okonom koro muruwo te koro surai mapunom epe beiro dimba <sup>15</sup>murom niki dungua yaromi ka mokom baire

<sup>c</sup> 19:1 1 Ko 3:6 <sup>d</sup> 19:2 Ap 2:38; 8:15-16 <sup>e</sup> 19:4 Mt 3:11 <sup>f</sup> 19:6 Ap 8:17; 10:44, 46

<sup>g</sup> 19:9 2 Ko 6:14-18 <sup>h</sup> 19:11 Ap 14:3 <sup>i</sup> 19:12 Ap 5:15 <sup>j</sup> 19:13 Mk 9:38

epe di erome, “Yesu gumam kaniye. Te Pauro gumam ama kanipa ne yokamai gumanom kankeye,” di erongoro<sup>k</sup> 16 ena yai murom niki dongua yaromi ikai moingua ure yokamai si ure sire eiro gainom suna bei boi bai di erere ganom bei niki ori wom de erongoro ena yokamai tongi mena fure yoru wake moime. 17 Ena Yura ari muruwo te Giriki ari muruwo Efesasi tei moinga ka wayom i fire kuri ori wom fire ena Ari Wanopanom Yesu kam akire dime.<sup>l</sup> 18 Te fi ki singa ari yokamai munmane ure bianom faingua koma beinga ari okonom muromdi tei di mari deime. 19 Ari yai opai munmane gene mane iro waninga gene mane pepam ire ari okonom muromdi tei tapai kaure eire e dongua gaime. Ena pepam gainga i kongo ori wom dungua epemere 50,000 kina.<sup>m</sup> 20 Ena iran Ari Wanopanom kam koro koro furo te yoporam boime.<sup>n</sup>

21 Ena yokamai epe bei gouingoro Pauro “Na Maseronia man tei wan fure te Akeiya man tei ama wan fure Yerusarem naro beiye. Te na Yerusarem mora naika ena okome na furo iki birom ori Roma ama kanaiye,” epe di fi<sup>o</sup> 22 ena Timoti te Eratusi Pauro akire di teipika yai surai ewi dongoro surai Maseronia man fipikoro Pauro kakom suwo Eisia akai tei moimie.<sup>p</sup>

23 Ena kakom boromdi ari yokamai Ari Wanopanom Yesu konom ari yai opai bei erongua kiam bei tere te gure gewo ori wom dime.<sup>q</sup> 24 Yai ta i kongo siwa ire tai ta ta gawo beiro moime. Yaromi kam i Dimitiyu. Yaromi kongo siwa iro kamundi opai kasu Atemisi iki gawo munmane kei tongoro te ari Dimitiyu kokonanom akire di teinga yokamai kongo munmane iro ako neime.<sup>r</sup> 25 Ena Dimitiyu yaromi bei moiro akire di teinga yokamai te kokonan epe kanere beinga yokamai unom boingoro yokamai kuku boingoro yaromi “Ya, no yokama kokonan epe bepunga meina ori wom ipune. 26 Te ne yokamai mora fire kaningai Pauro yaromi ari yai opai munmane gurero iro furo nomanenom bei du di eromie. Yaromi epe dume, ‘Ari yokamai yai gumam okonomdi beinga yai gumam kawom moikemie,’ epe dungoro te ari yai opai Efesasi tei moinga te Eisia man tei moinga yokamai ‘Yaromi kawom dume,’ dime.<sup>s</sup> 27 Ena kakom kakom yaromi ka epe duwangua nonon kokonanom bepungai bei niki dowamie. Te na epe dipa ka ta ama di fiye. ‘Yaromi kamundi opai ori i kam Atemisi fi mun ei teinga iki ama bei niki de towame. Yai opai muruwo Eisia tei moinga te yai opai man man muruwo moinga kamundi oparomi kam akire di teimba oparomi kam gounaro bemie,’ di fiye,” epe di erongoro 28 ena yokamai ka i firo denom minom niki ori wom de firo ena yokamai u ori wom boime, “Nonon Efesasi ari kamundi opai Atemisi

<sup>k</sup> 19:15 Mk 1:24, 34    <sup>l</sup> 19:17 Ap 5:5, 11    <sup>m</sup> 19:19 Diu 18:10-12    <sup>n</sup> 19:20 Ap 12:24

<sup>o</sup> 19:21 Ap 23:11; Ro 1:13    <sup>p</sup> 19:22 Ro 16:23; 2 Ti 4:20    <sup>q</sup> 19:23 2 Ko 1:8    <sup>r</sup> 19:24 Ap 16:16    <sup>s</sup> 19:26 Ap 17:29

opai ori moimie,” epe diro u boime. <sup>29</sup>Te yokamai epe u boingoro ena iran ari yai opai muruwo iki birom ori tei moingi gure gewo ori wom dime. Ena Maseronia yai surai kanom Gayuso te Aritaka surai koma Pauro wanungua ama wanipire. Ena yokamai fure yai surai a ki sire endire kuku boinga akaiyom tei fime.<sup>t</sup> <sup>30</sup>Ena Pauro “Ari yai opai moingi suna tei naiye,” diro bembema Yesu gama yokamai “Nemane,” di teime. <sup>31</sup>Te Eisia man tei gaman kiapanom ari suwo koropane Pauro yokoi ei neinga yokamai moiro ama ka yoporam boiro di de tere “Ne kuku boinga akaiyom ikai koi kiyoi!” epe di teime. <sup>32</sup>Ena ari muruwo kuku boinga inokore ei unanan dere beimie. Suwo koropane ka towane dingoro te ari suwo ka ta dingoro te ari munmane yokamai ure kuku boingai mapunom fikeime. <sup>33</sup>Ena iran Yura ari bei moiro yai ta i kam Eresanda a sin boi suna ipo de teingoro ari kuku boinga yokamai kanere “Yaromi kuku boipunga kapakom moime,” di fingoro ena Eresanda ari yokamai Yura ari kura kam di erekenaro beinga “Ka duwara beye,” di firo okom akire dumba <sup>34</sup>ari yokamai kaningai yaromi Yura yai moingoro ena iran koimoi u boiro “Nonon Efesasi ari opai Atemisi opai ori moimie,” epe u boiro fu oromene kakom u boingoro goume.

<sup>35</sup>Ena yokamai u boingoro ena iki birom ori kiapanom yai ure ari yai opai yokamai “Ka dikere moiyo!” di erongoro ka dikenaingoro ena yaromi “Ne Efesasi ari yokamao, ari yai opai man man muruwo moinga mora kaningai nonon opai ori Atemisi ka mapunom iki kiapanom moipunie. Te no Atemisi kuiam kamundi iwari ako mangi sungua ama kiapam moipune. <sup>36</sup>Eramom ‘Kam i faikeme,’ duwame? Epe dikenangua iran ne yokamai inokore munmane eikere wira dire moiyo! Te tai ta ta niki dongua beikeiyo! <sup>37</sup>Ne yokamai yai surai endire tawa wimba surai ka mapunom iki tai ta kunei nekepire. Te surai nonon kamundi opai ama kam ka sikeipire. <sup>38</sup>Ena Dimitiyu yaromi bo te kokonan ariyoma nenta ka kori di towangua nonon ka kori duwainga kakom bai epune. Te no ka kori finga yokamai ama bai eropune. Ena yokamai furo ka kori di erowaimie. <sup>39</sup>Dumba ne yokamai ka ta duwainga ena nonon iki birom ori kaunsel kuku borapunga kakom tei di ipo ka dowapune. <sup>40</sup>Epena aro kakom i kura ori wom boipunga yokamai ka kori di norowaimie. Te yokamai nonon kura boipunga mapunom mina wako norowainga ka mokom bairo dikenapunie,” epe di erere <sup>41</sup>ena ari kuku boinga yokamai ewi dongoro fime.

### Pauro fu Maseronia man tei te Giriki man tei furo wanume

**20** <sup>1</sup>Ena yokamai gure gewo dinga i mora goungoro Pauro Yesu gama yokamai unom boi erongoro moingui tei wingoro ena

<sup>t</sup> 19:29 Ap 20:4; 27:2; Kor 4:10; Fmn 1:24

yaromi yokamai nomanenom yoporam borangua kam di erero ena “Mora moipunie,” di erero dero fu Maseronia akai man tei fume. <sup>2</sup>Yaromi koro koi wan fure Yesu gama yokamai nomanenom yoporam borangua kam munmane di erero ena okome Giriki man tei ure <sup>3</sup>kapa suraiye moime. Ena okome Pauro “Na nuwi kopare ire nuwi boromdi fure Siria akai tei naro beiye,” di fimba yaromi Yura ari “Nai gorapune,” dinga fire ena “Inako dere Maseronia man tei tokoi naiye,” di fime.” <sup>4</sup>Pauro fungui ama finga yokamai kanom i epe: Pairu wam Sopata yaromi Beria yai moime. Te Tesaronaika yai surai kanom Aritaka te Sekundu. Ena te Deripi yai ta i kam Gayuso. Te yai Timoti. Te Eisia yai surai kanom Taikiku te Torofimu.” <sup>5</sup>Ena yokamai koma fu iki birom ori Toasa tei fure no yokamai kiapanom moimie. <sup>6</sup>Ena Yura ari iron kakom ari yokamai kaime dori bum boikengua neinga mora goungoro okome no yokamai nuwi kopare endire Firipai ma dere nuwi boromdi fure aro kakom okonom koro muruwo fungoro u Toasa tei ure ari koma winga yokamai gumanom boiro aro kakom okonom koro muruwo te koro surai tei moipune.

#### **Pauro bei moiro yai ta Yutika goingua wiyom yaungoro tokoi arome**

<sup>7</sup>Ena Sarere gawo giruwangua kakom nonon “Yesu goingua kam firapune,” dire kuku boipungoro Pauro yaromi “Ongo dero naiye,” diro ari yai opai ka di erongoro giruwangua ongo suna tei ume.” <sup>8</sup>Te no yokamai iki munomdi keingi ta teme tei akai nere kei iwa deingi tei kuku boipungoro kewa munmane dome. <sup>9</sup>Ena kora gaima ta tei moime. Yaromi kam i Yutika. Yaromi iki bakom kori gumam gawo eingi tei moingoro Pauro ka di moi fungoro ena yaromi iki biromdi moiro u gui sire wi fairo ako maniki iwe faingoro ena ari yokamai okom akire di teingoro yaromi mora goime. <sup>10</sup>Ena Pauro ako maniki furo kora gaima yaromi gome dero kukurero “Ne yokamai ganom nouro dikeiyo! Yaromi yokori moimie,” diro<sup>x</sup> <sup>11</sup>ena Pauro tokoi iki moko iwa furo “Yesu goingua kam firaiye,” diro kaime dori dou diro nome. Ne goungua Pauro ka arari wom di erere kamun takongoro yaromi dere fume. <sup>12</sup>Te kora gaima yokori moingua ari yokamai akire fure denom minom mun fime.

#### **Pauro iki birom ori Toasa ma dere fu Mairitusu tei fume**

<sup>13</sup>Ena Pauro “Ne yokamai nuwi kopare ire Aso tei fiyo! Na kon mangi wan fure Aso naye. Ena ne yokamai u Aso tei unainga na nakire naime,” diro mangi fumba nonon nuwi kopare endire nuwi boromdi fure u Aso tei upune. <sup>14</sup>Ena iran Pauro Aso uro no gumanom boingoro nonon yaromi akire nuwi kopare ikai uro fu iki birom ori Miritini tei upune.

---

<sup>2</sup> 20:3 Ap 20:19   <sup>3</sup> 20:4 Ap 19:29; 21:29; Ef 6:21   <sup>4</sup> 20:7 Ap 2:42, 46   <sup>x</sup> 20:10 1 Kin 17:21

<sup>15</sup>Ena Mitirini tei ma dere nuwi boromdi fure fairo fu aro kakom towane fure Kaiyo man tei ure dere aro kakom ta fure Samo man tei ure dere fu aro kakom ta fure iki birom ori Mairita tei upune. <sup>16</sup>Te Pauro “Na furo iron kakom Pendikosi unangua Yerusarem tei moraiye. Ena kakom arari Eisia man tei moraro kam fikero Efesasi ma dero naiye,” di firo ena Efesasi tei bunamdi furo Mairitusu akai tei ume.

**Pauro bei moiro kon ta nangua kam Efesasi ari Yai Gumam fi ki si teinga yokamai kiapanom bei ereinga yokamai di erome**

<sup>17</sup>Ena no yokamai Mairitusu tei fuka dupungoro Pauro ka di Efesasi dero “Ari mokoinga Yesu gama kiapanom bei ereinga yokamai na moiki tei wiyol!” diro<sup>y</sup> <sup>18</sup>ari yokamai winga yaromi ka epe di erome, “Ne yokamai mora kaninga koma wom na Eisia man tawa uro moika kakom tei ne yokamai ikinom birom ori moiro kokonan ire taikan nokapu beiye.<sup>z</sup> <sup>19</sup>Te Yura ari kianom bei narere bei niki de nareimba yokamai kanom fire kai meire nanan kanam bire eire Ari Wanopanom kokonan towane beiye.<sup>a</sup> <sup>20</sup>Te ne yokamai ama kaninga na ari kuku boinga akaiyom te iki ta iki ta ka mapunom nuwi si ereiye. Te akire di erongua kam muruwo ama di mari de ereiye. <sup>21</sup>Yura ari te Giriki ari nomanenom si awa tere Yai Gumam gumanomdi dere Ari Wanopanom Yesu fi ki si towaro beinga na ka yoporam boiro di ereiye.

<sup>22</sup>Ena epena na tora benaiye? Yai Gumam Murom ka di narongua na Yerusarem tei fuiye. Na naika yokamai tai bei narowainga kankeiye.<sup>b</sup> <sup>23</sup>Kankeipa iki birom ori ta ta muruwo na uka Yai Gumam Murom Sumuna ‘Ne kan faire ganum kipi kai erowame,’ diro imari de narome.<sup>c</sup> <sup>24</sup>Ari Wanopanom Yesu Yai Gumam ari bei nokapu de erowangua gunom kam i imari dongua kokonan narome. Kokonan i narongua iran na kokonan i beiki goraika kuri fikeiye. Ma deiyo! Na Yesu kokonan towane bei gounaika mun firaiye.<sup>d</sup>

<sup>25</sup>Ena koma na ne yokamai moingi suna tei wanere Yai Gumam kiapam bei norowangua kam di mari de ereipa epena na mora kanika okome ne yokamai na gumanam kankenaima. <sup>26</sup>Ena iran epena na kawom duwaika fiyo! Nenta ne yokamai moingi suna tei guwom akai nangua i na moingi tei dikeme.<sup>e</sup> <sup>27</sup>Tamanumie. Tai muruwo Yai Gumam bengua te benangua mora di ereiye. <sup>28</sup>Ena ne yokamai nenen te Yesu fi ki si teinga yokamai kiapanom bei ereiyo! Yai Gumam Murom ka di eronguamere ne yokamai epe kiapanom bei ereiyo! Yesu akiyom fera boire goingua Yai Gumam gama epemere meina bei erome.<sup>f</sup> <sup>29</sup>Te na kanika na ne yokamai

<sup>y</sup> 20:17 Ap 18:21    <sup>z</sup> 20:18 Ap 18:19; 19:10    <sup>a</sup> 20:19 Ap 20:3    <sup>b</sup> 20:22 Ap 19:21

<sup>c</sup> 20:23 Ap 9:16; 21:4, 11    <sup>d</sup> 20:24 Ap 21:13; 2 Ti 4:7    <sup>e</sup> 20:26 Ap 18:6    <sup>f</sup> 20:28 1 Ti 4:16; 1 Pi 5:2-4

ema dero naika ari yokamai epemere kei biom moinga uro ne yokamai bei niki de erowaimē.<sup>g</sup> <sup>30</sup>Te ne yokamai ari suwo koropane fuka dere ari dourom boi erowaro beinga kasu duwaime.<sup>h</sup> <sup>31</sup>Na ka epe dika iran ne yokamai kiapanom moiyo! Ne yokamai inokore ei fiyo! Koma non iki suraiye moiro giruwangua kakom bo te kamun takongua kakom na kai okonam muromdi nurom akongoro na ka ne yokamai di ereiye.<sup>i</sup>

<sup>32</sup>Ena arinamao, epena na ne yokamai Yai Gumam Yai Ori okomdi tei eiye. Yai Gumam ne yokamai bei nokapu de erero kam yoporam boi erowame. Yai Gumam gunom boingua ari tai ta ta eronguamere yaromi ne yokamai ama epe erowame.<sup>j</sup> <sup>33</sup>Te na nenta meinam bo te guwai gaiyom kunei kankeiye.<sup>k</sup> <sup>34</sup>Ne yokamai nenen mora kanninga na okonam surai kokonan ika na te na arinama kua kopuna te guwai gainom ako nopune.<sup>l</sup> <sup>35</sup>Ena na kokonan beiro te ari yoporam boikeinga yokamai akire di erowapunga ne yokamai mora imari de ereiye. Koma Ari Wanopanom Yesu ka dungua ne yokamai inokore eiyo! Yesu epe dume, ‘Yaromi tarom ingua i mun fimba yaromi tarom i ari erongua i mun oriwom fime,’ epe dume,<sup>m</sup> <sup>36</sup>Pauro epe ka di gouro kauwom gurom boiro te kiapanom ari gere ka make eme.<sup>n</sup> <sup>37</sup>Ena ari yokamai kai meire Pauro kukurero denom minom ipun dongoro ena yokamai “Ne fo!” di teime. <sup>38</sup>Te Pauro “Ne yokamai na gumanam tokoi kankenaimē,” dungua ari denom minom ipun dongoro ena yokamai yaromi akire nuwi kopare dungui tei fime.<sup>o</sup>

### Pauro fu Yerusarem tei fume

**21** <sup>1</sup>Ena no yokamai ari eme dere nuwi kopare ikai furo nuwi boromdi fure kon yo tongua fure Ko man tei upune. Ena tei dere furo furo aro kakom gougoro Rosi tei ure dere fu iki birom ori Patara upune. <sup>2</sup>Ure kanupunga nuwi kopare ta Fonisia man naro bengoro ena no nuwi kopare i ikai fure nuwi boromdi fupune. <sup>3</sup>Furo Siapasi man no okonom korari dungua kanere dere fure fu Siria man tei upune. Ena ari yokamai nuwi kopare i guwai mena tei dowainga no yokamai Taiya tei iron moiro maniki fupune. <sup>4</sup>No furo Yesu gama wandouro kanere yokamai gere Sarere towane tei moipune. Yai Gumam Murom Sumuna yokamai “Pauro Yerusarem kiname,” ka di eronguamere yokamai ka epe Pauro di teimba<sup>p</sup> <sup>5</sup>no yokamai tei moipunga kokonan mora gougoro no akai i ma dere fupungoro Yesu gama te efenom biyai te ganoma ama fure iki birom ori mena fure ena fui nuwi bunamdi furo kaunom gurom boiro ka make eime. <sup>6</sup>Ena yokamai “Ne yokamai fiyo!” di noreingoro no

<sup>g</sup> 20:29 Mt 7:15; Yo 10:12    <sup>h</sup> 20:30 1 Yo 2:19    <sup>i</sup> 20:31 Ap 19:8, 10; 1 Te 2:11    <sup>j</sup> 20:32 Kor 1:12    <sup>k</sup> 20:33 1 Sam 12:3; 1 Ko 9:11-12    <sup>l</sup> 20:34 Ap 18:3    <sup>m</sup> 20:35 Mt 10:8    <sup>n</sup> 20:36 Ap 21:5    <sup>o</sup> 20:38 Ap 20:25    <sup>p</sup> 21:4 Ap 20:23



yokamai “Tei moiyo!” di erere dere nuwi kopare ikai fupungoro yokamai inako dero ikinomdi tei fime.

<sup>7</sup>Ena no yokamai Taiya tei ma dere nuwi boromdi fure fure Toremai tei ure Yesu gama “Moi dimio?” di erere yokamai gere aro kakom towane moipune. <sup>8</sup>No giruwangua fairo kamun takongoro akai i ma dere fure Sisaria tei ure yai Firipi ikom tei moipune. Yaromi Yai Gumam ka mapunom ari yai opai di mari de erongoro te komari ewi dongua finga yokamai bei moiro yaromi te ari okonom koro muruwo te koro towane gunom boiro akire di erongua kokonan ereime.<sup>q</sup> <sup>9</sup>Yaromi apoma suwo iro suwo iro moiro yai kau eikeinga yokamai ka mapunom ari yai opai di mari de ereime.<sup>r</sup> <sup>10</sup>Ena no yokamai Sisaria tei kakom suwo arari moipungoro ena ka mapunom yai ta kam i Akapu Yuria man tei dere Sisaria tawa ure<sup>s</sup> <sup>11</sup>no moipungi tei ure Pauro non gam fi forau siro akoro nenen okom kauwom kan koiro ka epe dume, “Yai Gumam Murom i epe dume, ‘Non gam fi ako nongua yaromi Yerusarem tei unangua na okonam kaunam kan koikamere Yura ari yaromi okom kauwom kan epe koire iro ari Yura ari moikeinga yokamai erowaime,’ Murom Sumuna epe dume,” ka mapunom yaromi epe dume.<sup>t</sup> <sup>12</sup>ena no yokama ka i fipunga no yokama te ari tei moinga ka Pauro yoporam boiro “Ne Yerusarem kio!” di topunba <sup>13</sup>Pauro ka mokom di norome, “Tora bengoro ne yokamai kai meire te ‘Na nomanenam si awa towame,’ di fire na kanam fimie? Na Ari Wanopanom Yesu kam fi ki si teika Yerusarem ari yokamai na okonam kaunam kan koiro nai gorainga i faimie. Nai gorainga kanere kenom benaiye,” epe di norongoro<sup>u</sup> <sup>14</sup>ena no yokama mora fipunga yaromi nomanem tokoi awa tere bei towapunga faikemia ena iran no yokama giranom kum siro “Ari Wanopanom tai firangua i yaromi moingui tei fuka duwamie,” epe dupune.

<sup>15</sup>Ena ari kakom suwo mora goungoro no yokamai guwai gainom kenom beire Yerusarem naro fupune. <sup>16</sup>Te Sisaria Yesu gama yokamai ama fure no dire Neison ikomdi tei fime. Neison yaromi Saipasi yai moiro te koma wom Yesu fi ki si tome. Ena nonon yaromi ikomdi tei moipune.

### Pauro Yerusarem tei moime

<sup>17</sup>Ena no yokamai Yerusarem tei upungoro Yesu gama fana gainga mapunom norere te ka nokapu di noreime. <sup>18</sup>Ena no fairo kamun takongoro no yokamai te Pauro gere “Yesu gama kiapanom yai Yemesi kanapune,” diro furo Yemesi moingui tei upungoro te ari mokoinga Yesu gama kiapanom bei ereinga yokamai muruwo ama moingoro<sup>v</sup> <sup>19</sup>Pauro ari yokamai “Moi dimio?” di erere ena Yai Gumam akire di tongua

<sup>q</sup> 21:8 Ap 6:5; 8:5, 40    <sup>r</sup> 21:9 Ap 2:17    <sup>s</sup> 21:10 Ap 11:28    <sup>t</sup> 21:11 Ap 20:23; 21:33

<sup>u</sup> 21:13 Ap 20:24    <sup>v</sup> 21:18 Ap 15:2, 13

yaromi ari Yura ari moikeinga yokamai tei kokonan ingua Yai Gumam tai ta ta ari bengua kam muruwo imari de erome.<sup>w</sup> <sup>20</sup>Ari yokamai ka i fire Yai Gumam kam akire dire Pauro “No arinomyo, ne mora kanenga Yura ari munmane wom Yesu kam fi ki sire te ‘Ari muruwo Mose ka di guwo diro erongua fi gore duwaime,’ dime.<sup>x</sup> <sup>21</sup>Te Yura ari Yesu fi ki singa yokamai ka epe finga ne ka Yura ari yokamai ari Yura ari moikeinga yokamai moingi suna tei moinga epe di erene, ‘Ne yokamai Mose ka mapunom erongua i ma deiyo! Te ne yokamai ganoma ganom guwo dikeiyo! Te ne yokamai koma tai beinga mapunom tokoi bekeiyo!’ epe di mari de erene.<sup>y</sup> <sup>22</sup>Ne tawa unga yokamai mora firaime. Ena iran ari yokamai nomanenom yo towaro beinga nonon tora benapune? <sup>23</sup>No ka di erowapunga benanga yokamai nomanenom yo towaime. Ari suwo iro suwo iro tawa moiro epena Yai Gumam ‘Tai epe benapune,’ di tere ka di koi eime. <sup>24</sup>Ena ne te ari suwo iro suwo iro gere fu fi mun ei teinga iki fure yokamai ‘Tai epe benapune,’ kawom dingamere ne ama epe kawom duwane. Te ne yokamai ‘No nomanenom ikai koi nokapu duwame,’ di firo ganom bi suwainga meinanom gunom boraingoro nen towane erengere yokamai binom wiyom baraime. Ne epe benanga ari muruwo firainga yokamai ne kanum wayom di ereingarai kasu dimba ne Mose ka di guwo di erongua ama gore dine.<sup>z</sup> <sup>25</sup>Te no epe dupunba koma no epe inokore eire ari Yura ari moikeinga yokamai Yesu fi ki si teinga yokamai munom ganom mora boi eropune, ‘Ne yokamai kopuna yai gumam kasu yai fi mun ei teinga nekeiyo! Te ne yokamai non kei akiyom nekeiyo! Te ne yokamai non kei nokonom ako din duwainga gorangua i ama nekeiyo! Te ne yokamai ama biange bo te opai ta kunei nekeiyo!’ epe boi eropune,” epe di teingoro<sup>a</sup> <sup>26</sup>ena iran Pauro fairo arero ari suwo iro suwo iro endiro furo “No nomanenom ikai koi nokapu duwame,” di firo ganom bi sire ena Yura ari fi mun ei teinga iki ikai fure ka kawom dinga gounaro bengua yokamai Yai Gumam non sipsip towainga kakom imari deime.<sup>b</sup>

### Ari yokamai uro Pauro kan iki tei kan si teime

<sup>27</sup>Ena Sarere towane gounaro bengoro yokamai Yai Gumam non sipsip towainga kakom unaro bengua Yura ari suwo koropane koma Eisia man tei dere winga yokamai kaninga Pauro Yura ari fi mun ei teinga iki ikai tei moingoro ena yokamai yai opai muruwo bei nomanenom du dire furo Pauro a ki sire <sup>28</sup>u boiro “Isirae ari ne yokamai uro no yokamai Pauro si gorapunga akire di noreiyo! Yaromi man man muruwo furo no yokamai mapunom te Mose ka di guwo dungua te no fi mun ei topunga ikinom bire norome. Te yaromi tai ta ama bemia i epe: Yaromi Giriki ari endire

<sup>w</sup> 21:19 Ap 15:12    <sup>x</sup> 21:20 Ap 15:1, 5    <sup>y</sup> 21:21 Ap 16:3; Gar 2:3    <sup>z</sup> 21:24 Nam 6:1-20; Ap 18:18    <sup>a</sup> 21:25 Ap 15:28-29    <sup>b</sup> 21:26 1 Ko 9:20

fi mun ei topunga iki ikai tei fure yo tongua akai i bei niki de tome,” epe dime.<sup>c</sup> <sup>29</sup>Te tora bengoro yokamai epe dime? Koma yokamai kaningai koma Giriki yai Efesasi tei kei faingua yaromi kam i Torofimu moime. Yaromi te Pauro gere iki birom ori Yerusalem wan fipikoro ena yokamai di finga “Pauro yaromi akiro fi mun ei teinga iki ikai fume,” epe di fime.<sup>d</sup>

<sup>30</sup>Ena ari yai opai iki birom ori moinga yokamai muruwo nomanenom unanan fungoro ena yokamai bu di uro kuku boiro Pauro a ki sire gure ire fi mun ei teinga iki mena fingoro ena kene kene eire fi mun ei teinga iki kori gumam keime. <sup>31</sup>Ena yokamai Pauro si goraro beingoro ena ka wayom i Roma kiminem yokamai kiapanom bungua yai ori ure epe “Yerusalem ari muruwo nomanenom unanan fungoro ari yai opai gure gewo oriwom dime,” epe dime. <sup>32</sup>Ena yaromi ka i fire kakom boromdi kiminem kiapanom ari enomdire te kiminem ama enomdire bu dire fu ari kuku boingi tei ungoro ari yokamai kiminem te kiapanom yai ori winga kanere Pauro tokoi sikere yo moime. <sup>33</sup>Kiminem yokamai kiapanom yai ori fu Pauro moingui tei ure okom akoro kiminem yokama “Ne yokamai yaromi kan sen surai okom koiyo!” di erere ena ari yokamai ka epe mina wako erome, “Yaromi eramom? Te yaromi tora beme?” epe di eromba<sup>e</sup> <sup>34</sup>ari suwo koropane ka towane dingoro te ari suwo ka ta dime. Ari munmane kuku boinga gure gewo dingoro ena yaromi ka kori duwangua mapunom fikeme. Ena iran yaromi kiminem yokamai “Ne yokamai Pauro akire kiminem ikinomdi ikai fiyo!” di erongoro <sup>35</sup>yokamai yaromi akire fu iki bo bai eingi tei fingoro ari yai opai yokamai yoporam ori boiro “Suwapune,” diro beingoro ena kiminem yokamai Pauro akire diro iro fingoro <sup>36</sup>te ari yokamai muruwo mounomdi ure u boiro “Si gorapune,” epe ori wom dime.<sup>f</sup>

### Pauro nenen kam wayom ari di mari de erome

<sup>37</sup>Ena kiminem yokamai Pauro akire kiminem ikinomdi ikai koi naro beingoro Pauro kiminem kiapanom yai ori “Ya, na ne ka ta di erowaiyo?” diro mina wako tongoro ena kiapanom yai “Ne Giriki ka fino? Oro? <sup>38</sup>Na di fika ne Isipi yai moine. Koma yaromi ari munmanewom epemere 4,000 enomdire ‘Nonon gaman kura boi towapune,’ dire fu mansinom ta ari moikeingi tei fumba ne yaromi moikene,” epe dungoro <sup>39</sup>ena Pauro ka mokom bai tome, “Na Yura yai moimba na iki birom ori Tasisi tei Sirisia man suna tei dungua kei faiye. Tasisi i iki birom orinan dume. Enau ne ‘O’ duwanga na ari yokamai ka di erowaiye,” epe di tongoro <sup>40</sup>kiapanom yai ori “O” dungoro Pauro iki bo bai eingi tei arere ena okom akire di yai opai moingi tei dongoro ari muruwo giranom kum singoro ena Pauro

<sup>c</sup> 21:28 Ap 6:13; Esi 44:7    <sup>d</sup> 21:29 Ap 20:4; 2 Ti 4:20    <sup>e</sup> 21:33 Ap 20:23; 21:11    <sup>f</sup> 21:36 Lk 23:18; Ap 22:22

Yura ari kanom epe di erome.

*Ap 9:1-19; 26:12-18*

**22** <sup>1</sup>“Emenamao, Aunamao, Nenamao, ne yokamai na kanam duwaika fiyo! Nanan koro koro wan fuka mapunom duwaro beye,” epe di erongoro <sup>2</sup>yokamai ka finga yaromi Yura ari kanom dungoro ena yokamai giranom kum wom siro ferako dekero moingoro ena Pauro ka ta dume. <sup>3</sup>“Na Yura yai moimba na manam iki birom ori Tasisi i Sirisia man tei dunguai moiro na kui nongoro okome na iki birom ori Yerusalem tawa ure erowai teiye. Na fu Gamarie munom ganom iki fukoro yaromi no awanoma kanom mapunom muruwo wom di mari de naromie. Ena iran ne yokamai yoporam boiro Yai Gumam dourom boingamere epe na yoporam boiro Yai Gumam dourom boiye.<sup>s</sup> <sup>4</sup>Te na furo ari yai opai Yesu konom dourom boiro wan moinga yokamai bei niki de erere yokamai okonom kan koiro ‘Ei goraimie,’ di fire endire kan iki fure deiye.<sup>h</sup> <sup>5</sup>Te fi mun ei teinga yai ori bo te kaunsel yokamai muruwo ‘Na kanam dika i kawom dume,’ duwaime. Yokamai Yura arinoma Damasusi tei moinga ka munom ganom boi erere nareingoro ena na ‘Damasusi fure Yesu gama okonom kan koiro endiro Yerusalem tei unaikoro yokamai ganom kipi kaingua erowaime,’ diro fuiye. <sup>6</sup>Ena na wan furo Damasusi dungui teina tei fukoro ena oromene kakom kene kene eire kewa ori wom kamundi dere ako na moiki tei uro dongoro <sup>7</sup>na ako mangi tei faikoro ka nokom ta epe di naromie, ‘Sauro, Sauro, ta bengoro ne na bei niki de narene?’ di narongoro <sup>8</sup>ena na ka mokom bairo ‘Ari Wanopanomyo, ne eramom?’ di teikoro ‘Na Yesu Nasareti yai moiye. Ne na bei niki de nare moinie,’ di narongoro <sup>9</sup>ari na gere ama winga yokamai kewa keranom i kanimba yokamai ka di narongua mapunom fikeime. <sup>10</sup>Ena na ka ta di teiye, ‘Yai Ori yo, na epena tora benaiye?’ di teikoro ena Yai Ori i ‘Ne arere fu Damasusi tei fo! Ne akai tei morangero yai ta ure na ne gunom boi ereika kokonan di erowamie,’ di narongoro <sup>11</sup>kewa i keranom ori wom sungua na okonom murom fura domba taikan kanaika faikengoro ena ari na gere winga yokamai na okonom akore nandiro Damasusi tei fime. <sup>12</sup>Ena akai tei yai ta moime. Yaromi kam i Anania. Yaromi Mose ka di guwo dungua kawom gore dungoro Yura ari muruwo Damasusi moingai ‘Yaromi yai nokapu moime,’ dime. <sup>13</sup>Ena yaromi na moiki tei ure ‘Na arinam, Sauroyo, ne okonom murom fura do!’ di narongoro ena kene kene eire na okonom murom fura dongoro na yaromi kaniye. <sup>14</sup>Ena yaromi ka ta dume. ‘Ya, no awanoma Yai Gumanom bei moiro “Yaromi na inokore ei fika firo yai yo tongua yaromi kanero na ka dika ama firame,” diro ena ne gunom boi erome. <sup>15</sup>Yai Gumam ne gunom boi erongua ena ne tai ta ta kaninga te ka finga

<sup>s</sup> 22:3 Ap 5:34    <sup>h</sup> 22:4 Ap 8:3; 22:19

ari yai opai muruwo di mari de erowanie. <sup>16</sup>Ena ta bengoro ne yo kiapam moine? Ne arero fure Yesu kam fi ki si tenga nuwi buiro ne bianum faingua kore dowame,<sup>i</sup> epe di narome.<sup>i</sup>

<sup>17</sup>Ena okome na Yerusarem inako dero furo Yura ari fi mun ei teinga iki tei ka make eiro na kuwan kanika <sup>18</sup>Ari Wanopanom Yesu moiro ‘Ya, ne tawa na kanam mapunom dinba ari yokamai kanam fikenainga iran ne Yerusarem ma dere bu di fo!’ epe di narongoro <sup>19</sup>ena ‘Ari Wanopao, yokamai nenen ka finga koma na “Yura ari ka nuwi si ereinga iki koro koro dungui tei fure ari yai opai ne fi ki si ereinga yokamai kan si erowaipore bei niki de erowaiye,” dire fuiye.<sup>j</sup> <sup>20</sup>Te koma yai Sitiwin ne yai opai imari de erongua yaromi si goinga kakom na ama moiro “Yaromi si goinga i faimie,” diro te yaromi si goinga yokamai gainom suna gai kiapam beiro moiye,<sup>k</sup> epe di tekoro<sup>k</sup> <sup>21</sup>ena Ari Wanopanom i epe di narome, ‘Ne fo! Na ne ewi fakai wom dowaike na ne ewi ari Yura ari moikeinga yokamai moingi tei dowaiye,<sup>l</sup> epe dume,” Pauro epe dungoro<sup>l</sup> <sup>22</sup>ena ari yokamai Pauro ka koma dungua fimba epena yaromi ka epe dungua yokamai niki de firo ka yoporam boiro nokom ori wom diro “Yaromi si goiyo! Yaromi yokori morangua i faikeme,” epe diro<sup>m</sup> <sup>23</sup>ka yoporam wom boiro diro te gainom suna kui sire fiasi iwa dere kuwan ako kumo siro fiasi teme iwa deingoro <sup>24</sup>ena iran kiminem yai ori bei moiro ka kiminem yokamai epe di erome, “Ne yokamai yaromi akire iki ikai fiyo! Te ari yai opai ka u ori wom yaromi boi teinga mapunom firaro beika ena ne yokamai yaromi kupa siyo!” epe di erongoro ena yokamai Pauro akire fime. <sup>25</sup>Ena kiminem yokamai Pauro suworo beinga okom kauwom kan koinga Pauro kiminem yai ori tei arire moingua ka epe di tome, “Yokama Roma ari kanom kereinga na kanam ama kereingai iran ne yokamai ka kori di narekeinga iran kupa nainainga faimbo?” di tongoro<sup>n</sup> <sup>26</sup>ena kiminem yai ori ka i firo dere fu kiminem kiapanom yai ori moingui tei fure “Ya, yaromi Roma yai moingua tora bengoro ne tai epe benanie?” di tongoro <sup>27</sup>ena kiminem kiapanom yai ori fu Pauro moingui tei furo “Yae, ne Roma yai moimbo di naro?” diro mina wako tongoro Pauro “O, na Roma yai moiye,” dungoro <sup>28</sup>ena kiapanom yai “Na meina munmane deika na Roma yai fuka diye,” epe dungoro ena Pauro “Ne epe benba koma na nenam manam Roma ari moipikoro ena yokamai Roma ari kanom kereinga na kanam ama kereime,” epe dungoro <sup>29</sup>ena ari yokamai Pauro kupa suworo beinga dere fingoro te kiminem kiapanom yai ori “Yaromi Roma yai moingoro okom kauwom kan sen koiye,” di firo kuri fime.<sup>o</sup>

<sup>i</sup> 22:16 Ap 2:21    <sup>j</sup> 22:19 Ap 8:3; 26:9-11    <sup>k</sup> 22:20 Ap 8:1    <sup>l</sup> 22:21 Ap 9:15; 13:2

<sup>m</sup> 22:22 Ap 21:36    <sup>n</sup> 22:25 Ap 16:37-38    <sup>o</sup> 22:29 Ap 16:38

**Pauro fu Yura ari kaunsel kuku boingi tei furo  
nenen kam mapunom di mari dome**

<sup>30</sup>Ena ongo kiminem kiapanom yai ori furo Pauro okom kauwom kan koinga bei dere te Yura ari Pauro ka kori di towaro beinga mapunom firaro bengua “Fi mun ei teinga ari ori ne yokamai te kaunsel ari ne yokamai ure kuku boiyo!” ka epe di de erongoro ena ari yokamai kuku boingoro yaromi Pauro akire yokamai kuku boinga suna tei dome.

**23** <sup>1</sup>Ena Pauro ari yokamai kuku boinga toren ekanero “Arinamao, koma kakom te epena kakom ama Yai Gumam na tai ta ta beika te na kokonanam beika kanongoro na ‘Tarom i faimie,’ di fiye,” epe di erongoro<sup>p</sup> <sup>2</sup>ena fi mun ei teinga yai ori i kam Anania ari Pauro moingui teina tei moinga yokamai “Yaromi giramdi siyo!” di erongoro<sup>q</sup> <sup>3</sup>ena Pauro ka epe yaromi di tome, “Ne gai feke finba ne nomanenum i kama sungua moinga Yai Gumam ne einamie. Ne Mose ka di guwo dungua ka kori di narowanba ne na kanam wayom fikere ‘Na giranamdi siyo!’ dinga ne Mose ka di guwo dungua si dene,” di tongoro<sup>r</sup> <sup>4</sup>ari yokamai teina tei moinga “Ne Yai Gumam fi mun ei teinga yai ori kam ka sino? Oro?” di teingoro<sup>s</sup> <sup>5</sup>ena Pauro “Arinamao, yaromi fi mun ei teinga yai ori moingua kankeiye. Ka mapunom munom ganom epe boime, ‘Ne yokamai arinoma kiapanom yai ori kam ka sikeiyo!’ epe boime,” epe diro<sup>s</sup> <sup>6</sup>te kanongua kaunsel ari suwo koropane i ari Sarusi moingoro te suwo koropane i ari Feresi moingoro ena yaromi ka ta epe ori beiro dume, “Arinamao, na Feresi yai moikoro te na nenam te awanam ama Feresi ari moimie. Na ‘Ari goinga yokamai tokoi arowaimie,’ epe dika yokamai firo ka kori bei nareimie,” epe di erongoro<sup>t</sup> <sup>7</sup>ari yokamai ka i firo ena ari Sarusi te ari Feresi moingi suna tei kura fuka dungoro ena kuku boingai foyom sime. <sup>8</sup>Te Sarusi ari epe di fime, “Ari yokamai goinga yono manomdi tokoi arekenaimie. Te Yai Gumam nuwi kokonan gan i moikeme. Te ari kuianom ama moikemie,” epe di fimba ari Feresi yokamai “Sarusi di finga i faikeme,” epe dime.”

<sup>9</sup>Ena ari yokamai au ori wom di koro koro deime. Ena Feresi ari suwo ka di guwo dungua nuwi si ereinga yokamai arere moiro ka yoporam boiro “No yokamai kanopunga yaromi tai ta ta gere tongua moingui tei dikemie. Te Yai Gumam nuwi kokonan gan ka di tombo di tekeme? Ka di towangua nonon tora duwapune?” epe dingoro <sup>10</sup>ena kura kam ori wom dungoro ena kiminem kiapanom yai ori “Yokamai surai moinga iran Pauro koro koro gurere gam toi suwaingoro gorame,” di firo kuri firo ena kiminem yokamai “Ne yokamai fu yokamai moingi suna tei furo Pauro akire ure ne yokamai ikinomdi ikai koi deiyo!” epe di erome.

<sup>p</sup> 23:1 Ap 24:16   <sup>q</sup> 23:2 Yo 18:22-23   <sup>r</sup> 23:3 Mt 23:27   <sup>s</sup> 23:5 Eks 22:28   <sup>t</sup> 23:6 Ap 4:2; 24:15, 21; 26:5   <sup>u</sup> 23:8 Mt 22:23

<sup>11</sup>Ena giruwangua kakom Ari Wanopanom u Pauro moingui tei ure “Ne denum minum erowai to! Ne Yerusarem moingi tei na kanam mapunom di mari dengamere epe ne ama iki birom ori Roma fure na kanam epe di mari dowane,” epe di tome.’

**Yura ari bei moiro “Pauro si gorapune,” diro ka di koi eime**

<sup>12</sup>Ena kamun takongoro Yura ari yokamai kuku boiro “Pauro si gorapune,” di firo ena ka di koi eire ka kawom epe dime, “No kua kopuna te nuwi nekenapune. Okome Pauro mora si goiro kua kopuna te nuwi nowapune,” epe dime. <sup>13</sup>Te ari 40 yokamai ka epe kawom dire ka di koi eime. <sup>14</sup>Ena yokamai fu fi mun ei teinga ari ori te Yura ari mokoinga yokamai moingi tei fure “No yokamai ka di koi eiro kawom dupungoro Yai Gumam kanume. Ena ne yokamai tai bepunga kam fiyo! Nonon kua kopuna nekenapunba no fu Pauro mora si gorapunga kua kopuna nowapune. <sup>15</sup>Ena ne yokamai te kaunsel yokamai muruwo ka epe kiminem kiapanom yai ori di teiyo! ‘No yokamai bei moiro Pauro yaromi tai bengua kawom firapuna akire uwo!’ di teiyo! Ena yaromi u no yokamai moipungi tei kunangua kon yo wanangua yaromi si gorapunie,” epe di erome.”

<sup>16</sup>Yokamai “Yaromi si gorapune,” dimba Pauro kepom wam ka wayom i fire ena fu kiminem ikinom tei fure Pauro ka di tongoro <sup>17</sup>ena Pauro kiminem yai ori ta uwom boiro “Ne uwo! Kora gaima yaromi ne kiminem kiapanom yai ori ka di towama akire fo!” epe di tongoro <sup>18</sup>ena kiminem yai ori gan i akire fu kiminem kiapanom yai ori moingui tei fure “Yae, kan faingua yai Pauro na unam boiro ‘Kora gaima i ka ne di erowaro bengua ena ne akire ne morangi tei fo!’ di narome,” di tongoro <sup>19</sup>ena kiminem kiapanom yai ori kora gaima okom akoro fu bunamdi surai nen moipiki tei furo ena “Ne tora ka na di narowane?” diro mina wako tongoro <sup>20</sup>ena kora gaima ka epe di tome, “Yura ari nomane towane eire ka di koinga iran ongo ka epe di de erowaima, ‘Ongo nonon ka kori yaromi di towapunga mapunomom firaro bepunga ena ne Pauro yaromi akire kaunsel kuku boinga akaiyomdi tei uwo!’ epe di de erowaimba <sup>21</sup>ne ‘E e,’ di ero! Ari yokamai suwo i epemere 40 yokamai fure eke dere Pauro kiapam bei moime. Yokamai epena ‘No yokamai kua kopuna te nuwi nekepune. Ena okome Pauro si gorapunga kua kopuna te nuwi nowapune,’ diro ka epe di koi eime. Te yokamai ka dinga ne ‘O’ duwanga diro kiapam moimie,” epe dungoro <sup>22</sup>ena kiminem kiapanom yai ori kora gaima ka yoporam boiro “Ne na di narenga kam i yai ta di tekeyo!” diro awi dome.

**Kiminem kiapanom yai ori bei moiro Pauro  
awi iki birom ori Sisaria tei dome**

<sup>23</sup>Ena kiminem kiapanom yai ori bei moiro kiminem yai ori surai unom boiro “Ne surai kiminem munmane epemere 200 kenom beiyo!

† 23:11 Ap 18:9; 19:21; 27:24; 28:23    \* 23:15 Ap 25:3

Te ari 70 yokamai non kosi mounomdi moiro finga te ari munmane epe 200 yokamai kurake ako moinga yokamai ama kenom beiyoy! Ena epena giruwangua ari wi fainga kakom i ne kiminem yokamai endire Sisaria tei fiyo! <sup>24</sup>Te ne surai non kosi ta Pauro mouwomdi morangua ama kenom beiyoy! Ena ne surai yaromi akire kiapam nokapu beire fu gaman yai ori Firikisi moingui tei fiyo!” epe di erome. <sup>25</sup>Di erere ena munom ganom epe boime,

<sup>26</sup>Na Koriasi Lisia bei moiro munom ganom ne yai ori nokapu Firikisi boi ereiye. Ne moi dinio? <sup>27</sup>Ena te na kiminenam yaromi akire ne moingi tei wingoro Yura ari yaromi okom a ki sire si goraro beimba na ka fika “Yokamai Roma ari kanom kereingai yaromi kam ama kereime,” dingoro ena na te kiminem yokamai gere fure yaromi moingui tei fure akire di tere akire ikai upunie.<sup>x</sup> <sup>28</sup>Ena na “Yokamai ka kori yaromi di towainga mapunom firaiye,” diro ena yaromi akire yokamai kaunsel kuku boinga tei fure<sup>y</sup> <sup>29</sup>ka epe fika yokamai ka di guwo dungua dourom boinga kam towane ka kori di towaimba nonon yaromi si gorapunbo kan si towapunga kam i fikepune.<sup>z</sup> <sup>30</sup>Ena okome ka epe fika “Yokamai ‘Yaromi si gorapune,’ di fingoro ena na kene kene eiro yaromi awi ne moingi tei dowaiye,” di fiye. Te yokamai yaromi ka kori di towainga na “Ne yokamai fu ne Firikisi gumanumdi furo ka kori mapunom di mari deiyo!” epe di ereiye. Ena ka i mora goume.<sup>a</sup>

<sup>31</sup>Ena kiminem kiapanom yai ori di eronguamere epe kiminem yokamai Pauro giruwangua akire fure fu iki birom ori Antipari tei wime. <sup>32</sup>Ena kamun takongoro kiminem kon maniki wan fure inako dero ikinomdi tei wingoro kiminem yokamai non kosi mounomdi wan finga yokamai Pauro akire fime. <sup>33</sup>Ena yokamai fu Sisaria tei ure munom ganom boingua gaman yai ori tere te Pauro ama teingoro <sup>34</sup>ena gaman yai ori munom ganom kerere ena Pauro “Ne ikinum amai kei faine?” diro mina wako tongoro “Na Sirisia man tei kei faiye,” di tongoro <sup>35</sup>ena yai ori i fire “Ena ari ne ka kori di ereinga yokamai unaingoro na ne kanum kori firaiye,” epe diro ena kiminem ka ta epe di erome, “Ne yokamai Pauro si gaman yai ori Eroti koma kei faingua ikomdi tei deiyo!” epe dume.

### Yai ori Firikisi yaromi furo Pauro ka kori di teinga kam i fimie

**24** <sup>1</sup>Ena aro kakom okonom koro muruwo goungoro Yai Gumam fi mun ei teinga yai ori i kam Anania te Yura ari mokoinga yokamai te ka kori di towangua yai ta i kam Tetarusa yokamai fu Sisaria tei fure ena gaman yai ori moingui tei fure Pauro ka kori di towainga

<sup>x</sup> 23:27 Ap 21:30-33; 22:25-27    <sup>y</sup> 23:28 Ap 22:30    <sup>z</sup> 23:29 Ap 18:14-15; 25:19

<sup>a</sup> 23:30 Ap 23:12-13



mapunom di teingoro <sup>2</sup>ena yai ori Pauro uwom boingoro ungoro Tatarusa ka kori epe Pauro di tome, “Yai ori Firikisi yo, ne nonon kiapanom moinga no kura boikere te nokapu wom moipune. Te ne ‘No mapunom ta benapune,’ di fire imari de norengere ena no manom sinom nokapu dume. <sup>3</sup>Ena iran no yokamai ‘Ne taikan muruwo nokapu no yokamai muruwo de norene,’ di fire no nomanenom mun ori wom fi eropunie. <sup>4</sup>Ena na ka arari duwaika ne niki de fire na kanam fikenanie. Iran na ka gurom towane duwaika ne firo! <sup>5</sup>No yokamai kanopunga yaromi tai munmane niki dongua bemie. Yaromi man man muruwo fure Yura ari moingi tei fure kianom fai erome. Te ari yai opai furo Nasreti yai kam mapunom dungua dourom boinga yokamai ‘Yaromi yai ori moime,’ di fimba yaromi te ari yokamai gere ari nomanenom bei du di ereime.<sup>b</sup> <sup>6</sup>Te yaromi ama ‘Na fure fi mun ei teinga iki bei niki de towaiye,’ diro fumba no yokamai yaromi okom akopune. Ena ‘Nonon ka di guwo dungua dourom boipunga i firo yaromi ka kori di towapune,’ di fipunba<sup>c</sup> <sup>7</sup>kiminem kiapanom yai ori Lisia uro yoporam boi norero yaromi akire furo <sup>8</sup>ena ka epe di norome, ‘Ne yokamai yaromi ka kori di towainga fu ne gumanumdi fure ka kori di towaimie,’ epe di norome. Ena iran ne no ka kori bei topungairai yaromi mina wako towanga yaromi ka duwangoro ne firanga no ka kori bei topunga mapunom i epemere dume,” Tatarusa yaromi epe dungoro <sup>9</sup>te Yura ari yokamai ama Pauro kura kam di teime, “Tatarusa yaromi kam muruwo i kawom dume,” epe di teime.

<sup>10</sup>Ena gaman yai ori moiro Pauro ka duwaro bengua okom i din boingoro ena Pauro ka mokom bairo epe dume, “Na kanika non iki munmane kakom ne akai ori tawa kiapam bene. Ena iran na ka mokom bairo ne di erowaika na denam minam mun fiye. <sup>11</sup>Na koma ‘Yerusarem fure Yai Gumam kam akire di towaiye,’ diro fuiye. Ena epena aro kakom okonom koro koro muruwo te kaunom surai mora goume. Na epe beika ne ari yokamai mina wako erere firane.<sup>d</sup> <sup>12</sup>Te na fu Yura ari fi mun ei teinga iki fure ari kura kam di ereika bo na fu Yura ari ka nuwi si ereinga iki ikai fure ari kianom bei ereika bo na fu iki birom ori koro koro fure ari nomanenom bei du di ereika bo tarom i epe beika Yura ari yokamai nakankeime. <sup>13</sup>Ena yokamai na ka kori bei narowainga yokamai ‘Tarom i kawom dume,’ imari dere dikenaimie. <sup>14</sup>Dikenaimba na ka ne di erowaika firo! Yesu yaromi konom ari yai opai opom di erongua yokamai ‘Kon i kasu dume,’ dimba na konom i dourom boiro no Yura ari awanoma Yai Gumanom kam akire di teiye. Te na Mose ka di guwo dungua te ka mapunom ari ka boinga ama fi kun daiye.<sup>e</sup> <sup>15</sup>Te yokamai ‘Yai Gumam ari goinga winom yaunangoro tokoi arere yokori moraimie—ari nokapu

<sup>b</sup> 24:5 Ap 17:6    <sup>c</sup> 24:6 Ap 21:28-30    <sup>d</sup> 24:11 Ap 21:17    <sup>e</sup> 24:14 Ap 26:22

moinga te ari niki deinga,' di finghamere na ama epe di fiye.<sup>f</sup> <sup>16</sup>Ena iran na Yai Gumam okom muromdi moiro te ari yai opai okonom muromdi ama moiro 'Na gai goikenaiye,' dire kakom kakom tai nokapu beiye.<sup>g</sup>

<sup>17</sup>Ena non iki kakom suwo koropane na Yerusarem kiye. Te okome na arinama meina erowaro beika te na Yai Gumam fi mun ei towaro beika inako dero Yerusarem tei wiye.<sup>h</sup> <sup>18</sup>Te 'Na nomanenam nokapu duwame,' diro na ganam bi sire Yura ari fi mun ei teinga iki ikai tei moikoro yokamai nakanime. Te ari munmane te na gere moikepune. Te gure gewo ama fuka dikemba<sup>i</sup> <sup>19</sup>Yura ari suwo koropane Eisia man tei kei fainga yokamai ure moime. Yokama ka kori na di narowainga yokamai ne moingi tei unaimba epena kuime. <sup>20</sup>Bore na kaunsel kuku boinga akaiyom tei arere moika ari yokamai tawa moinga na tai bei niki deika ne di erowaimie. <sup>21</sup>Te yokamai ka towane epe duwaime, 'Na yokamai moingi suna tei arere moiro ka epe beiro ori wom diye, " 'Ari yai opai goinga tokoi arowaimie,' epe di fika yokamai ka kori di narowaimie," epe beiro ori wom diye,' yokamai epe dime," Pauro ka epe di goume.<sup>j</sup>

<sup>22</sup>Ena yai ori Firikisi yaromi Yesu konom ari yai opai opom di erongua mapunom suwo finga "Ya, epena kakom ka i mora goume. Okome kiminem kiapanom yai ori Lisia unangua na ne yokamai ka kori dinga fi gounaiye" epe dire<sup>k</sup> <sup>23</sup>ena kiminem yai ori ka epe di tome, "Ne Pauro kiapam beyo! Te ne yaromi kiapam benba epena kakom ne yaromi okom kauwom kan koikeo! Yaromi ari yokoi ei nongua yokamai taikan akire di towainga ne 'Mane,' di erekeo!" epe di tome.<sup>l</sup>

### **Yai ori Firikisi te efem biyai Dusira furo Pauro ka dungua fipire**

<sup>24</sup>Ena aro kakom suwo fungoro Firikisi te efem biyai Dusira gere ama wipire. Oparomi Yura opai moime. Ena Firikisi Pauro uwom boingoro Pauro uro Kirisito Yesu fi ki si tongua kam di erongoro surai fipire. <sup>25</sup>Te Pauro kam epe dungua ari yai opai yo tere morainga kam te ari yai opai kuianom boingua "Nemane," diro morainga kam te okome Yai Gumam nonon ipu si norowangua kam epe dungoro ena Firikisi kuri firo "Mora! Epena ne fo! Kipin ta ne unum boraiye," epe di tome. <sup>26</sup>Te yaromi "Pauro 'Na mena naye,' diro kongo narowame," di fire kakom kakom Pauro uwom boingoro ungoro yai surai di ipo ka depire.

<sup>27</sup>Ena non iki surai fungoro Posia Fetasi yaromi fu Firikisi moingui tei ure ena Firikisi kokonanom imba Firikisi "Yura ari denom minom mun fi narowaime," diro Pauro kan iki moingua kan dere fume.<sup>m</sup>

<sup>f</sup> 24:15 Yo 5:28-29   <sup>g</sup> 24:16 Ap 23:1   <sup>h</sup> 24:17 Ro 15:25-26; Gar 2:10   <sup>i</sup> 24:18 Ap 21:26-27  
<sup>j</sup> 24:21 Ap 23:6   <sup>k</sup> 24:22 Ap 23:26   <sup>l</sup> 24:23 Ap 27:3; 28:16, 30   <sup>m</sup> 24:27 Ap 25:9

**Yai ori Fetasi yaromi furo Pauro ka kori di teinga kam i fimie**

**25** <sup>1</sup>Ena Fetasi yaromi Sisaria tei fure yaromi aro kakom suraiye tei moingua dere fu Yerusarem fure <sup>2</sup>tei moingoro ena Yura fi mun ei teinga ari ori te ari mokoinga yokamai ama u Fetasi moingui tei ure Pauro ka kori di towainga mapunom di teime.<sup>n</sup> <sup>3</sup>Di tere ena ka ta yoporam boiro di teime, “No yokamai mun firaro bepunga ne Pauro uwom boingoro Yerusarem uname,” epe dime. Yokama kon bakom bei kou fairo Pauro si goraro beinga ena ka epe dime.<sup>o</sup> <sup>4</sup>Ena Fetasi ka mokom bairo “Pauro yaromi kan iki Sisaria tei moingoro kakom gawo toka gounangoro na fu Sisaria naiye. <sup>5</sup>Epe iran ne arinom mokoinga yokamai na naiki tei ama naimie. Te yokamai di firainga yaromi tai ta gere tongoro yokamai ka kori bei towaimie,” epe di erome.

<sup>6</sup>Ena Fetasi yokamai moingi tei moiro ena aro kakom okonom koro muruwo te koro suraiye boro okonom koro koro muruwo mora goungoro yaromi dere fu Sisaria tei fume. Ena kamun takongoro yaromi ka kori iki tei fure “Ka kori firaiye,” diro ame dere “Pauro akire wiyo!” di erongoro <sup>7</sup>Pauro mora ungoro ena Yura ari Yerusarem ma dero winga yokamai Pauro waiyapo de suna dere ka kori ori wom bei teimba yokamai kanom mukom faikemie.<sup>p</sup> <sup>8</sup>Ena Pauro ka mokom bairo epe di erome, “Na furo nonon Yura ari ka di guwo dupunga bo te nonon Yura ari fi mun ei topunga ikinom bo te Roma yai ori Sisa bei niki dekeiye,” epe dume.<sup>q</sup>

<sup>9</sup>Ena Yura ari denom minom mun fi towaro beinga Fetasi bei moiro Pauro “Ya, yokamai ka kori ne bei ereinga no yokamai dere fu Yerusarem fure ka kori fi gounapuno?” di tongoro <sup>10</sup>Pauro “No yokamai Roma yai ori Sisa ka kori finga ikom tawa moipunga iran yokamai na ka korinam firainga i faimie. Te ne mora kaninga na Yura ari bei niki de erekeiye. <sup>11</sup>Te na tai ta bei niki ori wom dowaika ari yokamai nai goraingai faimie. I faimba ari yokamai ka kori bei nareinga i kawom faikenangua ena ne bei moiro ari yokamai okonomdi tei na ei narowanga faikemie. Ena iran Roma yai ori Sisa na ka korinam firaro bengua na ka diye,” epe dungoro <sup>12</sup>ena koma Fetasi te ariyoma kuku boinga yokamai di ipo ka dere ena Fetasi ka mokom bairo “Ne ‘Roma yai ori Sisa na ka korinam firame,’ dinga iran ne fu yai ori Sisa moingui tei nanie,” epe dume.

**Man sinom ta kiapam yai Akipa yaromi ungoro yai ori Fetasi bei moiro Pauro kam mina wako di tome**

<sup>13</sup>Ena aro kakom suwo mora fungoro yai ori Akipa te kepom i kam Benisi surai u Sisaria tei uro Fetasi “ ‘Ne ari kiapanom bei erongua no surai mun fipuiye,’ duwapuiye,” diro wipire. <sup>14</sup>Surai kakom munmane

<sup>n</sup> 25:2 Ap 24:1; 25:15    <sup>o</sup> 25:3 Ap 23:15    <sup>p</sup> 25:7 Ap 24:5-6, 13    <sup>q</sup> 25:8 Ap 24:27

Sisaria tei moipika ena Fetasi Pauro kam wayom yai ori i di ipo ka depire. Fetasi ka epe dume, “Ferikisi yai ta kan si tere ma dere fungoro yaromi kan iki yo moime.”<sup>r</sup> <sup>15</sup>Te koma na Yerusarem furo moikoro fi mun ei teinga ari ori te Yura ari mokoinga yokamai u na moiki tei ure yaromi ka kori bei tere ka mina epe wako naromie, ‘Ne “Yaromi tai niki dongua bemiau,” duwano?’ di nareimba <sup>16</sup>na ka epe mokom bairo ‘Nonon Roma ari yaromi ka kori di teinga yaromi koma yokamai gumanom kanere ka kori di teinga mapunom fire ka mokom bairo di erongoro ena okome ka kori finga yai yaromi awi mena dombo “Ne tai niki dongua benie,” dumie,’ epe di ereiye. <sup>17</sup>Ena Yura ari yokamai na tawa uka ama winga yokamai yo moikeimba kamun takongua na fu ka kori finga ikom fure yaromi uwom boiye. <sup>18</sup>Na epe di fika yokamai yaromi tai niki ori wom bengua imari dowaimba yokamai arere ka epe dikeime. <sup>19</sup>Tamanume. Yokamai nenen mapunom beinga te yai Yesu goimba Pauro ‘Yaromi arere yokori moimie,’ epe dungua i kura kam di tere ka epe gurom towane dime.<sup>s</sup> <sup>20</sup>Yokamai epe dingoro ena ka kori mapunom firaika na nomanenam unanan fungua iran yaromi ka mina wako teiye, ‘Yokamai ka kori ne di ereinga nonon Yerusarem fure ka kori muruwo fi gounapuno?’ di teikoro<sup>t</sup> <sup>21</sup>ena Pauro ‘Yai ori Sisa na ka korinam firaro bengoro na kan iki moraiye,’ epe di narongoro ena na kiminem yai epe di teiye, ‘Yaromi kiapam beyo! Okome yai ori Sisa moingui tei awi dowaiye,’ epe di teiye,” Fetasi epe di tongoro<sup>u</sup> <sup>22</sup>ena Akipa ka epe “Na nanan yaromi kam firaiye,” di tongoro “Ena ongo ne firanie,” di tome.

<sup>23</sup>Ena kamun takongoro Akipa te Benisi surai eken munmane beiro u kuku boinga akaiyom ikai wipikoro te kiminem kiapanom ari ori te iki birom ori mokoinga ari ama ikai wingoro ena Fetasi “Pauro akire kua wiyoi!” dungoro ari yokamai Pauro akiro wingoro” <sup>24</sup>Fetasi ka epe dume, “Akipa yai oriyo te ne muruwo tawa moinga yokamao, na ka dika fiyo! Yaromi tawa moingua kaniyo! Yura ari muruwo Yerusarem moinga te Sisaria tawa moinga u na moiki tei ure ka kori yaromi bei tere te ka ori wom epe dime, ‘Yaromi yokori morangua i faikeme,’ dingoro<sup>w</sup> <sup>25</sup>ena iran si goraiinga mapunom wandou fuipa mapunom kankeiye. Ena yaromi ‘Yai ori Sisa na ka korinam firaro bengoro na naiye,’ dungua na yaromi ‘Awi dowaiye,’ di fiye. <sup>26</sup>Te na munom ganom yai orinam boi towaipa ka boraika fikeiye. Ena na munom ganom boi towaro beika na yaromi akire ne yokamai muruwo te ne yai ori Akipa moingi tei wikoro ena ne yokamai ka kori firo mapunom imari dowaingere na munom ganom bei towaiye. <sup>27</sup>Te na kan fainga yaromi awi yai ori Sisa moingui tei dere ka kori bei teinga mapunom imari dekenaika i faikeme,” epe dume.

<sup>r</sup> 25:14 Ap 24:27    <sup>s</sup> 25:19 Ap 18:15; 23:29    <sup>t</sup> 25:20 Ap 25:9    <sup>u</sup> 25:21 Ap 25:11-12

<sup>v</sup> 25:23 Mt 10:18; Mk 13:9    <sup>w</sup> 25:24 Ap 22:22; 25:2, 7

**Yai ori Akipa yaromi bei moiro Pauro ka kori di teinga kam i fimie**

*Ap 9:1-19; 22:6-16*

**26** <sup>1</sup>Ena Akipa bei moiro Pauro “Ne nenen ka duwanga firapune. Ena ne ka do!” di tongoro ena Pauro okom akire diro nen kam wayom epe dume, <sup>2-3</sup>“Yai ori Akipao, ne Yura ari mapunom beinga te yokamai kanom di ipo ka deinga muruwo mora finie. Ne mora epe finga na mun fiye. Yura ari ka kori bei nareinga na ka mokom bairo duwaika ne firo! Ne kene kene eire niki de fikeyo! <sup>4</sup>Koma na gan gawo moiro na arinama moingi tei moiro te okome Yerusarem ama moiro erowai teikoro Yura ari kaninga na tai beire te kokonan iye. <sup>5</sup>Nonon kanom mapunom ari i kam Feresi moinga yokamai ka mapunom yoporam boiro dourom boime. Iran epe na Feresi ari mapunom dourom boi moika Yura ari koma kanere te epena ama kanere tarom i imari dowaimba imari dekenaime.<sup>x</sup>

<sup>6</sup>Ena Yai Gumam no Yura ari awanoma ka di koi eiro ‘Ari yai opai goinga winom yaunaikoro arere yokori moraimie,’ di erongua na ka i fi ki sika epena yokamai ka kori bei nareimie.<sup>y</sup> <sup>7</sup>Te no awanoma okonom koro muruwo te kaunom surai gama yokamai ‘Yai Gumam ka i dungua inapune,’ diro ena kama sungua kakom te kamun takongua kakom Yai Gumam kam bawom di tere moimie. Yai ori Akipao, kam i na ama fi ki sika Yura ari yokamai ka kori bei nareimie. <sup>8</sup>Te ari yai opai goinga tokoi arowainga ta bengoro ne yokamai ‘Yai Gumam epe beikenamie,’ di fime?

<sup>9</sup>Ena koma na nanan epe di fika na kokonan yoporam boiro Yesu Nasareti yai kam beiro bire de towaiye. <sup>10</sup>Ena iran na Yerusarem tei moiro kokonan epe beikoro fi mun ei teinga ari ori munom ganom boiro nareingoro ena na fure Yesu gama yo teinga yokamai okonom akoro kan si ereiye. Te yokamai ei goinga na ‘O’ diye.<sup>z</sup> <sup>11</sup>Te kakom munmane na nuwi si ereinga iki iki fure yokamai Yesu kam ka suwaro beinga ganom kipi kaingua ereiye. Te na denam minam niki de oriwom yokamai fi erere ena na yokamai mounomdi fure fu akai ta fuiye.<sup>a</sup> <sup>12</sup>Ena na ‘Epe benaiye,’ diro Damasusi naro beiki fi mun ei teinga ari ori munom ganom boiro nareime. <sup>13</sup>Ena, yai ori Akipao, oromene kakom i na kon bakom suna wan fure kanika kewa ta kamundi iwa dero ako mangi sungua te keranom ori wom sunguamere epe aro dekeme. Keranom ori wom sungua u na te ari yokamai na gere ama wanopunga tei ure wanapo de suna dongoro <sup>14</sup>ena no yokamai muruwo ako mangi fairo na nokom fika Yura ari kanom epe di narome, ‘Sauro, Sauro, ta bengoro ne na bei niki de narene? Non kapakom kupa murom nongua sunguamere ne epe na nainie. Ne epe benga nen ganum bei kipi kainie,’ epe di narongoro <sup>15</sup>ena na ‘Ari Wanopanomyo, ne eramom?’ diro mina wako teikoro ‘Na Yesu.

<sup>x</sup> 26:5 Ap 22:3; Fir 3:5-6    <sup>y</sup> 26:6 Ap 23:6; 28:20    <sup>z</sup> 26:10 Ap 8:3    <sup>a</sup> 26:11 Ap 9:1-2

Ne na bei niki de nare moine. <sup>16</sup>Ena ne ario! “Ne na nuwi kokonan gan morane,” diro na u ne moingi tei uro gunom boi ereiye. Te ne tarom i epena kakom kaninga te na tai okome ne opom di erowaika ne ari yai opai di mari de erowanie. <sup>17</sup>Te na ne nenen arinuma moingi tei te ari Yura ari moikeinga yokamai moingi tei ne ewi dere te ne kui nere te kiapanum moraiye. <sup>18</sup>Te ne fure yokamai inokore einga bei yo te ero! Ena iran yokamai kamun si boingua akaiyom ma dero awa tero u keranom sungui akaiyom tei unaimie. Te ne epe bengoro yokamai na kanam fi ki si narero Satan kiapanom bei erongua akaiyom ma dere Yai Gumam kiapanom bei erongua akaiyom ikai naingoro ena Yai Gumam yokamai bianom faingua kore de erowangoro yokamai te ari yai opai Yai Gumam gunom boi erongua yokamai gere ama moraimie,<sup>a</sup> di narome.<sup>b</sup>

<sup>19</sup>Ena iran, yai ori Akipao, na ka kamundi di narongua gore diye. <sup>20</sup>Koma na fu Damasusi tei fure te okome fu Yerusarem fure te Yuria man ama fure te ari Yura ari moikeinga yokama moingi tei ama fure ka epe ari yai opai di ereiye, ‘Ne yokama inokore einga si awa tere Yai Gumam i gumanomdi deiyo! Ena ari yai opai ne yokamai inokore einga si awa tero moinga kanaro beinga ne yokamai tai nokapu beiyo!’ epe di ereiye.<sup>c</sup> <sup>21</sup>Ena na ka epe di mari deika na fi mun ei teinga iki tei moiki Yura ari ure na okonam akore na nai goraro beimba<sup>d</sup> <sup>22</sup>kakom kakom Yai Gumam akire di narongoro ena epena na tawa arere ari kanom waninga bo te ari kanom wankeinga ka mapunom di mari de ereiye. Te yai Mose te ka mapunom ari ‘Okome tai epe fuka duwame,’ dingamere na ka epe di mari deiye. Ka ta dikeiye. <sup>23</sup>Na ka dikai epe: ‘Yai Gumam awi dongua akire di norongua yai Mesia gam kipi kaingua firo goiro ariro tokoi yokori morame. Koma ari tokoi arekeimba yaromi koma ariro Yura ari te ari Yura ari moikeinga yokamai kewa keranom suwangui tei morainga ka di mari dowame,’ na epe diye,” Pauro ka epe dume.<sup>e</sup> <sup>24</sup>Ena Pauro nenen ka epe imari dongua Fetasi ka au diro “Pauro, ne du dinie. Kakom kakom ne munom ganom kerere te inokore enga iran bei du di eromie,” epe dungoro <sup>25</sup>ena Pauro ka mokom bairo “Yai ori Fetasiyo, na du dikeiye. Na ka epe di ereika i kawom diye. <sup>26</sup>Yai ori Akipa yaromi na ka dika mapunom wom fingoro ena na ka di tere tai muruwo imari deiye. Te ari yokamai bei moiro Yesu kam wayom i eke dekeinga iran tarom i ama kanumie.<sup>f</sup> <sup>27</sup>Yai ori Akipao, ne ka mapunom ari kanom dinga fi kun daino? Na mora fika ne fi kun dainie,” epe dungoro <sup>28</sup>ena Akipa Pauro ka epe di tome, “Ne kakom gurom towane ka di narenga na Kirisito gam teina daraiba daikeiye,” epe dungoro <sup>29</sup>ena Pauro “Ya, na kakom gurom towane dika bo kakom arari dika faimie. Ne te ari muruwo tawa moiro

<sup>b</sup> 26:18 Ais 35:5; 42:7, 16; Ef 2:2; Kor 1:13; 1 Pi 2:9    <sup>c</sup> 26:20 Mt 3:8; Ap 9:22, 28; 22:21

<sup>d</sup> 26:21 Ap 21:30-31    <sup>e</sup> 26:23 Lk 24:44-47; 1 Ko 15:20    <sup>f</sup> 26:26 Yo 18:20

na kanam dika finga na Yai Gumam ka make epe ei teiye: ‘Epena kakom na moikamere ne yokamai ama epe moraimie,’ epe dipa na okonam kan sen koiro moikamere ne yokamai epe moraingna ma deiyo! Epe moikenaimie,” ka epe dume.

<sup>30</sup>Ena yai ori te gaman yai ori te opai Benisi te ari yokamai ama ame dere moingi arire <sup>31</sup>u mena furo ka di ipo ka dere “Yaromi si gorainga bo kan faingua tarom niki dongua beikemie,” epe dime.<sup>s</sup> <sup>32</sup>Te Akipa bei moiro Fetasi ka epe di tome, “Yaromi ‘Yai ori Sisa na ka korinam firaro bengua na naiye,’ dikenangua ne awi mena dengere namba ne awi mena dekenanie,” epe dume.<sup>h</sup>

### Yai ori Fetasi bei moiro Pauro awi Roma tei de tome

**27** <sup>1</sup>Ena yokamai “Pauro nuwi kopare ire Itari man tei name,” diro ena Pauro te kan fainga ari suwo endire kiminem yai ori okomdi teime. Yai ori yaromi kam i Yuriasi. Te yaromi yai ori Sisa nenen kiminem yokamai yai orinom moimie. <sup>2</sup>Ena nuwi kopare ta i Aramitia akai tei ma dere tawa ungua no yokamai moko ikai fupune. Nuwi kopare i Eisia man fui nuwi bunamdi naro bemie. Te Maseronia yarom Tesaronaika tei kei faingua nonon gere ama dere nuwi boromdi fupune. Yaromi kam i Aritaka.<sup>i</sup>

<sup>3</sup>Ena kamun takongoro no yokamai fu Sairon akai tei fupungoro Yuriasi yaromi Pauro fi mun ei tero ena Pauro yokoi ei nongua yokamai moingi tei fungoro akire di towaro beinga “Ne fo!” di tome.<sup>j</sup> <sup>4</sup>Ena okome no Sairon tei ma dere nuwi boromdi tokoi furo kamun kai nuwi kopare gumamdi sungua iran fu Saipasi man bunamdi kamun kai sikengua akaiyom fupune. <sup>5</sup>Te no fure fui nuwi Sirisia te Pambiria teina tei si dou diro ena ma dere fu Maira i Lisia man suna tei dungua uro mangi tei fupune. <sup>6</sup>Ena kiminem yai ori kanongua Eresandia nuwi kopare ta tei dungua i Itari man naro bengoro ena yaromi no yokamai nondire moko nuwi kopare i ikai tei fume. <sup>7</sup>Nonon nuwi boromdi fupungoro te kakom suwo koropane nuwi kopare wira wira diro fungoro ena yokamai kokonan yoporam boiro ingoro no yokamai Naira teina tei fuka diro te kamun kai sungua naro bepunga faikengoro ena iran no yokamai fu Kiriti bunamdi kamun kai sikengua akaiyom tei fure Somoni teina tei fupungoro <sup>8</sup>ena yokamai kokonan yoporam boiro ingoro no wira diro fu man i bunamdi tei furo fu akai ta upune. Akai kam i Akai Nokapu Moinga. Te akai i iki birom ori Lasea teina tei dume.

<sup>9</sup>Ena no tawa upunga kakom arari fungoro nimi sungua te kamun kai ori sungua kakom teina ungua no yokamai naro bepunba kon i niki domie. I niki dongua ena Pauro ka epe di erome, <sup>10</sup>“Ya, no yokamai nuwi

<sup>s</sup> 26:31 Ap 25:25   <sup>h</sup> 26:32 Ap 25:11   <sup>i</sup> 27:2 Ap 19:29   <sup>j</sup> 27:3 Ap 24:23

boromdi napunga nonon niki dowapunie. ‘Guwai gai te nuwi kopare ama gounangoro te ari munmane goraimie,’ di fiye,” epe di eromba<sup>k</sup> 11 kiminem yai ori Pauro ka dungua fikeme. Ma do! Yaromi nuwi kopare kan akongua yai te nuwi kopare ako nongua yai ka dipika fime. 12 Ena nimi sungua kakom te kamun kai sungua kakom akai tei nuwi kopare yo duwangua bo te ari iron morainga faikenangua iran ari munmane epe di fime, “No yokamai akai tei ma dere fu nuwi boromdi fure Finekisi tei fure iron morapune,” epe di fime. Finekisi tei kamun kai nuwi kopare sikengua ena nuwi kopare yo duwangua faimie. Te akai i Kiriti suna tei dume.

### **Kamun kai ori wom uro nuwi kopare sume**

13 Enau okome kamun kai furako fairo si ungoro yokamai koma “Akai nokapu tei napune,” di finga tai kenom beire te tai ipun dongua nuwi kopare okom kan koingua tarom akire dire ikairi gurere fu Kiriti man nuwi bunamdi wom dourom boiro fimba 14 kamun kai ori nan i kam Aro Moko Ungua siro Kiriti man tei ma dere ure 15 nuwi kopare i sungoro no yokamai “Nuwi kopare kamun kai sungua naro bepune,” dupunba faikengoro ena ma dere awa topungoro kamun kai nuwi kopare mouwomdi sungoro yo unanan fume. 16 Ena no yokamai fu akai gawo i kam Korio fure fu kamun kai ori wom sikengua akai yom fure ena nuwi kopare gawo kan akoro 17 gurere kokonan ori wom beiro akire diro nuwi kopare ori ikai tei dopune. Ena yokamai “Nuwi kopare i dou duworo bemie,” diro kan ori wom iro nuwi kopare suna wom tei kan koime. Te yokamai ama epe di fime, “Nuwi kopare i makarawa munmane i Lipia teina tei dungua bauname,” di firo ena kuri fire gai sel kau you dere ikai deingoro ena kamun kai nuwi kopare sire sin boingoro yo fume. 18 Ena kamun kai si moingua nuwi kopare yoporam boiro ako ipo ka dero gura boraro bengoro ena kamun takongua yokamai guwai gai fiasi nuwiri deime. 19 Te kamun tokoi takongoro yokamai nenen okonomdi nuwi kopare kanom te gai sel suwo te tai ta ta fiasi nuwiri deime. 20 Ena kakom munmane no yokamai aro bo kuimokome kankepunga iran akai moipunga kankepune. Ena moi fupungoro kamun kai ori wom si moingua “Okome no yokamai a boiro morapunga faikeme,” epe diro inokore epune.

21 Ena aro kakom munmane ari yokamai kua kopuna nekeinga iran Pauro yokamai okonom muromdi arire moiro “Ne yokamao, koma na ‘Ari Kiriti tei ma dekeiyo!’ epe dika ne yokamai gore duwainga no ganom kipi kokonan ikenapune. Te guwai gai muruwo ako sikenamba nonon Kiriti tei ma dopune.<sup>l</sup> 22 Na epe dipa epena na ne yokamai epe di ereiye,

<sup>k</sup> 27:10 Ap 27:22    <sup>l</sup> 27:21 Ap 27:9-10



‘Ne yokamai nomanenom yoporam boiyo! Nonon ari ta goikenapunba nuwi kopare towane niki dowamie,’ epe di ereiye.<sup>m</sup> 23 Na kapakonam Yai Gumam kam bawom di teika giruwangua kakom yaromi nuwi kokonan gan u na moiki tei ure 24 ‘Pauro, ne kuri fikeyo! Te Yai Gumam bei nokapu de erowangoro ari muruwo nuwi kopare tei ne gere ama finga yokamai ama nokapu moraimie. Te ne fu yai ori Sisa moingui tei fure tei arowangere ne kanum kori firamie,’ epe di narome.<sup>n</sup> 25 Ena iran ne yokamai nomanenom yoporam boiyo! ‘Yai Gumam ka di naronguamere i epe fuka duwame,’ epe diro fi kun dairo moiye. 26 Na epe dipa nuwi kopare fu mansinom ta bauro dou dowame,” Pauro ka epe dume.<sup>o</sup>

### Nuwi kopare fu mansinomdi tei bauro dou dumie

27 Ena Sarere surai mora goungoro nonon nuwi boromdi i kam Meratereinian wan furo fupune. Ena giruwangua ongo suna kakom tei nuwi kopare kokonan beinga yokamai “Mansinom ta dungua teina upune,” diro 28 ena kawom unaro beinga fire ipun dungua tarom kan koiro fiasi nuwiri deingoro tarom i nuwi ikai furo mansinom baungoro ena yokamai akire di iwa dere gureingoro te yai ta kan akoro okom surai wara gairo kan i gure koro dere kanere kakom tei okonom kaunom muruwo kerome. Ena yokamai kakom gurom towane yo moiro kan tokoi dere kaninga kakom tei okonom koro koro muruwo te kaunom koro muruwo kereime. 29 Ena yokamai kuri fire “No yokamai fure kongo ta duwangui tei borapune,” diro ena tai ipun dungua nuwi kopare okom kan koiungua tarom suwo iro suwo iro fiasi nuwiri dere te “Aro kene kene eiro moko uname,” diro moi wanime. 30 Te nuwi kopare kokonan beinga yokamai nuwi kopare gawo kan koiro wira dire ako nuwiri sire te ka kasu epe dime, “No yokamai tai ipun dungua nuwi kopare gumamdi kan korapune,” epe dimba “No tongi napune,” di fime. 31 Ena Pauro kiminem yai ori te kiminem yokamai ka epe di erome, “Nuwi kopare kokonan yokamai ikai tei moikenainga ne yokamai nokapu moikenaimie,” epe dungoro<sup>p</sup> 32 iran kiminem yokamai kan nuwi kopare gawo koinga go dingoro ako nuwiri siro yo fume.

33 Ena aro moko unaro bengoro Pauro ari muruwo kua kopuna nowaro beinga ka epe di erome, “Ne yokamai Sarere surai yo kiapam moiro kua kopuna nekeime. 34 Ne yokamai epe moinga iran na yoporam boiro ‘Kua kopuna suwo neiyo!’ di ereiye. Ne yokamai kopuna nowainga yoporam boi erowaimie. Ne yokamai nenta goikero te ganom niki dekename,” ka epe diro<sup>q</sup> 35 ena kaime dori ta iro yokamai gumanomdi tei arire Yai Gumam “Mun fi ereiye,” di tero dou diro nome. 36 Te Pauro epe nongua

<sup>m</sup> 27:22 Ap 27:10, 31    <sup>n</sup> 27:24 Ap 23:11    <sup>o</sup> 27:26 Ap 28:1    <sup>p</sup> 27:31 Ap 27:24    <sup>q</sup> 27:34 Ap 27:22

ari yokamai nomanenom yoporam boi erongoro ena yokamai nenen kopuna suwo ama neime. <sup>37</sup>Te no ari yokamai munmane epemere 276 nuwi kopare ikai tei moipune. <sup>38</sup>Ena yokamai kua neingoro marenom mokongoro ena yokamai “Nuwi kopare ipun dekename,” diro kui witi mukom fiasi nuwiri deime.

<sup>39</sup>Ena kamun takongoro yokamai akai tei kanimba yokamai mansinom kam fikeime. Ena yokamai kaningai nuwi bunamdi tei makarawa nokapuwom dungoro ena yokamai “Nuwi kopare fu makarawa dungua akaiyom i name,” di firo <sup>40</sup>ena tai ipun dungua nuwi kopare kan akoinga eri paran kan koinga ama ma dero te kamun kai siro nuwi kopare a sin boraro bengua gai sel i nuwi bunamdi akai naro beimie. <sup>41</sup>Naro beimba nuwi kopare makarawa kopu nuwi ikai dungua baungoro nuwi kopare gumam mangi si diro fu ki sungoro te nuwi yoporam boiro nuwi kopare mouwomdi si moingoro ena weyomdi dou dungoro <sup>42</sup>ena kiminem yokamai “Ari kan fainga yokamai ei gorapunga nenta nuwiri furo tongi kinamie,” epe di fimba <sup>43</sup>Pauro nokapu moraro bengua kiminem yai ori yaromi “Nemane,” di erero ena “Ne yokamai nuwiri kupa si kaninga nuwiri koma fure nuwi bunamdi fiyo! <sup>44</sup>Te ne yokamai yo moingi eri tei nuwi kopare dou dungua tai ta ta ako ki siro nuwi boromdi furo nuwi bunamdi fiyo!” epe di eromie. Te kiminem yai ori ka epe di norongua nonon muruwo nuwi bunamdi fupune.<sup>f</sup>

### Ari yokamai man moirom bei engui Marita tei moime

**28** <sup>1</sup>Ena no yokamai muruwo nuwi bunamdi nokapu wom fupunga akai moirom bei engui i kam Marita dime. <sup>2</sup>Akai tei kapam no yokamai kiapanom nokapu bei noreime. Nimi sungua no goi goipungoro yokamai eri gerero iro uro gai norero beingoro no muruwo eri dungua teina tei furo fipune. <sup>3</sup><sup>s</sup> Te Pauro eri gawo koromgere ta iro fu eri dungua gaingoro ena onopa eri ikai tei moingua muro sungua firo u mena uro Pauro okom kai ki sungoro <sup>4</sup>ari yai opai man kapam ari kaningai onopa uro Pauro okom kai ki sungoro ena yokamai ka di ipo ka dere “Yaromi yai ta kawom si goime. Yaromi fui nuwi koi goikere yo moimba yaromi tai niki dungua bengua goramie,” epe dimba <sup>5</sup>Pauro okom koka tongoro onopa ako eri dongui sungoro Pauro okom gam ta niki dekeme. <sup>6</sup><sup>t</sup> Te yokamai kiapam moiro “Yaromi gam yaunambo kene kene eiro ako fairo gorame,” di fire kakom gurom arari kiapam bei moimba tai niki dungua ta yaromi fuka di tekengoro ena iran yokamai nomanenom tokoi si awa tere fire “Yaromi no yai gumanom ta moimie,” epe dime.<sup>u</sup>

<sup>7</sup>Mansinom dungua no yokamai teina tei moipunga kapakom yaromi kam i Pupiusa. Yaromi akai tei yai ori mokongua yai moimie. Ena yaromi

<sup>f</sup> 27:44 Ap 27:22-25   <sup>s</sup> 28:2 2 Ko 11:27   <sup>t</sup> 28:5 Mk 16:18   <sup>u</sup> 28:6 Ap 14:11

ikomdi no yokamai unom boiro kiapanom nokapu bei norongoro no aro kakom suraiye yaromi ikomdi tei moipunie. <sup>8</sup>Te Pupiusa yaromi nem nupi fai moingoro gam murom siro te de arom buiro bengoro ena Pauro fu yaromi moingui tei furo ka make eiro okom de gamdi dongoro ena tokoi moi fime. <sup>9</sup>Ena Pauro epe bengoro akai tei ari nupi fainga muruwo u Pauro moingui tei wingoro yaromi yokamai bei kan i erongoro tokoi u nokapu fime. <sup>10</sup>Epe iran yokamai mapunom nokapunan no yokamai bei noreingoro te okome no akai tei ma dere naro bepunga yokamai tai ta ta kua kopuna no yokamai kon napunga kakom nowapunga noreimie.

### **Yokamai Morota akai ma dere iki birom ori Roma fime**

<sup>11</sup>Ena no yokamai kapa suraiye akai tei moipunga ena nuwi kopare moko ikai fure nuwi boromdi fupune. Nuwi kopare i Eresandia ari tainom dume. Te nuwi kopare gumamdi koro ari Yai Gumam kasu yai gan surai moipika kuianom beimie. Te nuwi kopare i kokonan ari nimi sungua kakom te kamun kai sungua kakom gounaro bengua akai tei moiro kiapam moimie. <sup>12</sup>Ena no yokamai fu iki birom ori Siraku tei ure te akai tei aro kakom suraiye moipunie. <sup>13</sup>Ena no Siraku ma dero furo Rekiom tei fuka diro ena fairo kamun takongua kamun kai furakom fairo Rekiom tei sungoro dere aro kakom surai fu Putiorai tei upune. <sup>14</sup>No yokamai akai tei moiro kanupunga ari yokamai Yesu fi ki si teinga yokamai moire “Ne yokamai no gere Sarere towane ama morapune,” epe di noreingoro ena no yokamai epe upunga u Roma teina tei upune. <sup>15</sup>Te Roma ari Yesu fi ki si teinga yokamai “No yokamai wime,” dinga firo ena yokamai suwo fu kuku boinga akaiyom Apiyu fure no gumanom boingoro te ari suwo fu nuwi neinga ikom suraiye dungui tei fure no gumanom boingoro ena Pauro yokamai ekanero Yai Gumam “Mun fi ereiye,” di tongoro ena nomanem yoporam boime. <sup>16</sup>Ena no yokamai Roma tei upunga yokamai “Pauro nenen iki ta yo kei fanangoro te kiminem ta yaromi kiapam bei morame” epe dime.”

### **Pauro Roma tei moiro Yura ari ka di ipo ka de erome**

<sup>17</sup>Ena Pauro aro kakom suraiye tei moiro Yura ari mokoinga unom boingoro kuku boingoro ena yaromi ka epe di erome, “Arinamao, na nonon arinoma bei niki de erekeiye. Te no awanoma mapunom ama si dero beikeipa yokamai Yerusarem teiri na kan si narere na nakire Roma ari okonomdi eingoro” <sup>18</sup>ena Roma ari na mina wako narere finga na tai ta bei niki dekeika yokamai nai gorainga faikeme. Ena iran yokamai na nawi mena dowaro beimba<sup>x</sup> <sup>19</sup>Yura ari ‘Nemane,’ dinga na ‘Yai ori Sisa na ka korinam firaro bengua na naiye,’ dipa na ka kori Yura ari bei

† 28:16 Ap 24:23    w 28:17 Ap 25:8    x 28:18 Ap 26:31-32

erowaika faikeme.<sup>y</sup> <sup>20</sup>Na epe bei moika ‘Ne yokamai ekanero ka epe di erowaiye,’ diro ne yokamai unom boiye. Te Isirae ari fi ki siro kiapam moingamere na ama epe fi ki siro kiapam moikoro yokamai na okonam kan sen koime,” Pauro epe dungoro<sup>z</sup> <sup>21</sup>ena Yura ari yokamai “Yuria ari yokamai ne kanum wayom munom ganom ta no yokamai boi norekeimie. Te ari yokamai Yuria man ma dere tawa winga yokamai ne kanum ka sikeime. <sup>22</sup>Te no yokamai ne nenen nomanenum engua firaro bepunie. No yokamai fipunga ari yai opai koro koro moiro ne te ne douinom boinga yokamai ka mapunom koi dinga bire de teime,” epe di tere<sup>a</sup> <sup>23</sup>ena yokamai ka firaro beinga kakom imari deime.

Ena imari deinga kakom ungua ari munmane u Pauro moingui ikomdi tei wingoro ena koimoi moi finga aro ako oropo fungoro Pauro Yai Gumam ari yai opai kiapanom bei erongua kam di mari de erome. Te ari yokamai Yesu fi ki si towaro beinga Pauro Mose ka di guwo dungua te ka mapunom ari munom ganom boinga di mari de erome. <sup>24</sup>Ena ari suwo koropane yaromi kam fi ki si teimba ari suwo fi ki si tekeime. <sup>25</sup>Te yokamai nomanenom towane eikere ena dere naro beingoro koma Pauro ka epe di erome, “Yai Gumam Murom ka mapunom yai Aisaiya ka kawom di tonguamere yaromi no awanoma epe di erongua ne yokamai ka i fiyo!<sup>b</sup>

<sup>26</sup>Ne Yura arinoma moingi tei fure ka epe di ero! ‘Ne yokamai ka fi moraimba mapunom fikenaimie. Te ne yokamai toren kanaimba tai ta nokapu kankenaimie. <sup>27</sup>Ena yokamai nomanenom erowai teinga iran yokamai kinanom gi dingoro te okonom murom ama gi dime. Te yokamai epe moikenainga yokamai okonom murom tai kanere te kinanom ka firo te inokore eire si awa tere Yai Gumam gumanomdi dowaingoro ena yaromi bei nokapu de erowame,’ epe di ero!

Aisaiya epe dume. <sup>28</sup>Ena iran ne yokamai fiyo! Yai Gumam ka epe di narome, ‘Ne fu ari Yura ari moikeinga yokamai moingi tei fure “Na yokamai akire di erowai koro yokamai nokapu fuka duwaime,” epe di ero!’ di narome. Ena na yokama ka i di erowai koro yokamai ka i firaimie,” Pauro epe di erongoro<sup>c</sup> <sup>29</sup>ena yokamai dere fure nenen ka di ipo ka dero ka koro koro dime. <sup>30</sup>Ena non iki surai Pauro iki ta moingua yaromi iki kapam meina tere te ari muruwo u moingui tei winga bei nokapu wom de erome.<sup>d</sup> <sup>31</sup>Te yaromi yoporam boiro Yai Gumam ari yai opai kiapanom bei erongua kam di erere te Ari Wanopanom Yesu Kirisito kam ama di mari de erongoro nenta “Nemane,” di tekeme.<sup>e</sup>

Na ka boika u tei goume.

<sup>y</sup> 28:19 Ap 25:11    <sup>z</sup> 28:20 Ap 24:15; 26:6-7    <sup>a</sup> 28:22 Ap 24:14    <sup>b</sup> 28:25 Ais 6:9-10; Mt 13:14    <sup>c</sup> 28:28 Sam 67:2; Lk 3:6; Ap 13:46; 18:6    <sup>d</sup> 28:30 Ap 28:16    <sup>e</sup> 28:31 Ap 28:23